

জগৎ ঈশ্বৰ হাবি ভাৰতবাসীৰে সুখ শান্তিত থদিছ

# ইমা লক্ষণা

(বিষ্ণুপ্ৰিয়া মণিপুৰী ভাষাৰ কবিতা ও ছড়ার লেখিকহান)

লেখক - নৱেন্দ্ৰ চন্দ্ৰ সিংহ

সিঙ্গাৰী, শিলচৰ - ৭, কাছাড়

আসাম

(বিষ্ণুপ্ৰিয়া মণিপুৰী নিয়াম পুৰানা ভাষাহান, তার শব্দ অলঙ্কার পুৰিপুষ্ট)

জানুয়ারী ২০০৯ ইংরেজি



ইমা লক্ষণা লেরিক এহান ইকরানি অকরেছুতা ১৯৬৬ ইংরেজিত বারো লয়ইলতা  
২০০৮ ইংরেজি অক্টোবৰে। বারো শাপানি অইলতা জানুয়ারী, ২০০৯ ইংরেজিত।

প্রকাশক - বীরেন্দ্র কুমার সিংহ (সাহিত্যিক)  
তিনখাল, পাথারকান্দি  
সভাপতি, বিষ্ণুপ্রিয়া মণিপুরী সাহিত্য সভা,  
পাথারকান্দি আঞ্চলিক কমিটি।



বীরেন্দ্র কুমার সিংহ  
লগে  
মইলক সমাজ নিংপি

পেইল ফাম - বন্দনা সিংহ, সিঙ্গারী, শিলচর  
সঙ্গীতে ডাবুল নিপুন

স্বত্ব - নয়নমনি সিংহ (মোর নাতিয়ক)

ছাপানিত - বাবুল সিংহ (নিবা), চন্দ্রপুর



নয়নমনি সিংহ

দাম - ১২০.০০ টাকা

কবি সাহিত্যিক - শ্রী নরেন্দ্র চন্দ্র সিংহ, সিঙ্গারী, শিলচর - ৭, কাছাড়, গিরকে অনেক  
হবা লেরিক ইকরল উতাত কবিতাত প্রথম পুরস্কার পাছেতা ১৯৭৩ ইংরেজীত। শ্রেষ্ঠ  
লেখক পুরস্কার পাছেতা ২০০৪ ইংরেজীত। বারো K.K. Handique State Open  
University সিঙ্গারী শাখাত সাহিত্য রত্ন পেইল ২০০৮ ইংরেজীত। গিরকর লেখা  
লেরিক নিয়াম হবা বারো সমাজর নিয়াম দরকারী। সমাজর প্রতিষ্ঠিত লেখকগ। এ  
লেরিক এহানর অনেক কবিতা শিক্ষার পাঠ্য পুস্তকে নেনা য়াকরতয়।

অনিলকৃষ্ণ রাজকুমার

সভাপতি

৫-১-২০০৯ ইং

বিষ্ণুপ্রিয়া মণিপুরী ছাত্র সংস্থা

কালীঞ্জর, শিলচর - ৭

কাছাড়, আসাম

মোর নাতিয়ক নয়ন মণি সিংহই মোর লেরিক এতা প্রকাশ করতয় বারো  
লয়ইলে বারো এতা শাপানির কাম করতৈ।

নরেন্দ্র চন্দ্র সিংহ

## ইমা লক্ষণা

### মন্তব্য



“ইমা লক্ষণা”র কথা মাতানির অবসর পেয়া মি নিয়াম হারৌ অইলু। বাণী বন্দনাল ইমার চরণে হৃদয়ৌপা ভক্তি নিবেদন করানি মনেয়া, শব্দ ব্রহ্মার ধ্যানে বিভোর, সুর ছন্দর মুচ্ছুনায় আত্মহারা, সমাজনিংপা কবি আগর নুংশি এলা, গুফি সেঙ গাল বানা বিভোর সেবারী আগর ইমা পূজার ফুল ফল পাতা পবিত্র উপচার ছড়ার রাতলে কবিতার জাকাত ‘ইমা লক্ষণা’র ভাব মন্দিরে আরতিত থাকে। ইমা ঠারর সাবলিলতা, সহজ-সরল ভঙ্গিমা-অভিব্যক্তি, সমাজ সংস্কৃতি পরম্পরাগত ঐশ্বর্য্যর প্রকাশে উতার পরম ভাগবতর কঙালা মিত্তাল দেহা রূপ ; যোগীর ধ্যানীর হৌপন-খৌরাং ভখ টাটির তেতনেই হন্মায় পারেঙে স্তবকে স্তবকে ফঙনির মিঙালে মিঙালিত আছে, কবি নরেন্দ্র সিংহ গিরকর ভাব ঠার - ছড়া কবিতা, এলা, য়ারি এতা কনাক-বুজন হাবি থাকর পাঠক-পাঠিকার খৌরাং মিটানিত হন্মা থর এহান দেহিয়া জবর হারৌ অইলু, লিশিং লিশিং লাখ লাখ অসংখ্য লেরিক তামকরানির আয়ু কোনগরতাউ নেই। উহানলো রোমানে মহৎ গ্রন্থর তালিকা হংকরিয়া গ্রীসর নাগরিকরে হবা লেরিক তামকরানি উৎসাহ দেছিল। এবাকা বিশ্ব সাহিত্য ভাণ্ডারেঙ মহৎ গ্রন্থ রচিয়া পৃথিবীময় প্রচারিত অর। নরেন্দ্র কবির “হাগর গাল তেরা” এলার লেরিকহানরে ‘এ গ্রেট বুক’ বুলানি য়াকরের। যেহানরকা গিরকরে সমাজর অন্যতম শ্রেষ্ঠ কবি লেখক আগ বুলিয়া সম্মানিত পুরস্কৃত করানি অছিল। উহানর থাংনাত ‘ইমা লক্ষণা’ এহান বিড এবল, ইন্ট্রাকটিঙ, কনটেমপরারি বারো জিনুইন লেরিক আহান বুলিয়া নিংকরুরী।

শ্রী গোপীমোহন সিংহ

প্রাক্তন হেডমাষ্টার, কাছাড় হাইস্কুল

শিলচর, আসাম

## ইমা লক্ষণা

### মন্তব্য

“ইমা লক্ষণা কাব্যর” গজে

কবি সাহিত্যিক নরেন্দ্র চন্দ্র সিংহর ইকরা কাব্যগ্রন্থ ‘ইমা লক্ষণা’ ফণ্ডরহান ছনিয়া নিয়ামপারা হারৌ অইলু, কবিতা ইকরানির মানসিকতা এহান ভাব এহান দিব্যহান। কবি এগরাং তৃতীয় নয়ান আলো থার যেহান সাধারণ মানুরাং নাথার। এহানেই কবির লগে সাধারণ মানুর পার্থক্যহান। অগ্নি পুরাণরমা ইকরা আছে -

“নরত্বং দুর্লভং লোকে বিদ্যা তত্র হ দুর্লভাঃ।

কবিত্বং দুর্লভং তত্র শক্তিঃ তত্র হ দুর্লভাঃ।।

মনুষ্য জীবন এহান পানা এহান স্বার্থকতাহান। মনুষ্য জনম পেয়া বিদ্যা তামকরানি এহান আরতাউ সু দুর্লভহান। উতারমা কবিতা ইকরানি এহান দুর্লভহান বারো হোভা কবিতা ইকরানি এহান আরতাউ দুর্লভহান। কবি গিরকে প্রায় দুইশত কবিতা ইকরিয়া “ইমা লক্ষণা” কাব্যলৈরিকহান ইকরেছে এহান সুদুর্লভহান যেহানে তার জীবনহানরে স্বার্থক করেছে। কবিতারমা ফণ্ডছে বাক্যই রসর আত্মাগরে ফণ্ডকরেছেহান দেহিয়া পাঠকে মোহিত অইতাই নিংকরৌরি।

মানস সিংহ

(অধ্যাপক)



## ইমা লক্ষণা

### মোর মন্তব্য



ইমাই মি লেরিক তামকরানি এহান নিয়াম মনাছিলি, মোরে কোন কাম করানি নাতল। মি করিম কাম উহান ইমাই করল। ইমাই নিয়াম হীনপেয়া আমাৰে ডাঙৰ করল। কোন বি সম্পত্তি নেয়া নাগই, হাবিৰতাউ আছে আমাৰ ছাত্র জীবনৰ সময়ত প্রায় দশ বসৰ পানিয়ে দাবেইল। ক্ষেতি পানিয়ে নিলগা, উবাকা বারো চাকুরী নেই ক্ষেতিৰ গজে হাবিৰতা, উহানে ক্ষেতি নাইলেই দুঃখ দুৰ্ব্বিক্ষ। উতাত ইমাই ফুতি বুনিয়া মোৰে হীনপেয়া তামকরুয়েইল। বাবা ডাকৰ বিদ্যা করল, উহানে নিয়াম খিয়াল নাকরল যদিও বাবা ও মি লেরিক তামকরিং উহান মনেইল। উহানে লেরিক তামকরে পারলু। এসাদে ইমাৰ কাৰণে ইমাৰ বৰে বাবাৰ বৰে মি এ লেরিক এতা ইকরতে জ্ঞান পেইলুতা। কিন্তু ইমাৰ ঋণ উতা মি হুজানি ক্ষেমতা নাইল, যেতা পারিল সেবা করলু ইমা বাবাৰ শ্রাদ্ধ কৰ্ম করলু তেব মোৰ নিংশিং এহান লেরিকে থাক বুলিয়া এ কবিতাৰ লেরিক এহানৰ নাং দিলুতা “ইমা লক্ষণা” ইমাৰ নাং লক্ষণা উহানল। এহানেই মোৰ ইমাৰ সেবা নিঙে ইকরলু।

ইমাৰ মালক আবক মাইয় সিংহ, মই কুণ্ডল সিংহ, চেংকুরী, মামা সূৰ্যমনি সিংহ, টুক, কাটাখাল মোৰে নিয়াম বানা পেইলাতা তানুৰে মনেয়াও মনমত সেবা করে নুয়ারলু উহানে দুঃখহান থাকেগলগা। উতারমা মোৰে বানাপেইতারা, মোৰ লেরিক পাকরতারা, মোৰে ইকর বুলিয়া উৎসাহ দিতারা, মোৰে ধন্যবাদ দিতারা উতার হাবিৰ নাং দেনা সম্ভব নাগই। উতাত লালা রুৱেল কলেজৰ প্ৰিন্সিপাল শ্ৰীযুক্ত মনোৱঞ্জন সিংহ, গোপেন্দ্ৰ কুমাৰ সিংহ, এ.ডি.সি. শিলচৰ, মহেন্দ্ৰ চন্দ্ৰ সিংহ, হেডমাষ্টাৰ, নৱসিংপুৰ, গোকুলসেনা সিংহ, সভাপতি, সাহিত্য সভা, দুম্ৰভছড়া, ঈশ্বৰবাবু সিংহ, M.A. LLB ডলুগাও, ত্ৰিপুৰা, মহেন্দ্ৰ কুমাৰ সিংহ, এডভোকেইট, শিলচৰ, ৰামদাস সিংহ, প্ৰহ্লাদ সিংহ, অনিল ৰাজকুমাৰ, সভাপতি, ছাত্র সংস্থা, মেহেৰপুৰ, চিৰকুমাৰ সিংহ, দেবদাস সিংহ, ৰামকুমাৰ সিংহ, পূৰ্ণবাবু সিংহ, ভকতপুৰ, সুখজ্যোতি সিংহ, Director of Adult Education, Assam



## ইমা লক্ষণা

কুমকুম সিংহ, J.D.P.I, Assam, Ghy, সুশীল কুমার সিংহ, Director of Education, Nagaland, কামেশ্বর সিংহ, হেডমাষ্টার, দুধপুর, মনিকান্ত সিংহ, জেনারেল সেক্রেটারী সাহিত্য সভা, সিঙ্গারী, দেবেন্দ্র কুমার সিংহ, সিঙ্গারী, মুন্সাই, বিমলা প্রসাদ সিংহ, শান্তি সিংহ, বাটিরগ্রাম, গাগারার এইগা মদন মুখার্জি, গান্ধীনগর, নরসিংপুর, প্রফেসার নামদেব সিংহ, বর্তমান কবিরগ্রাম, নৃত্যগুরু সেনারিক রাজকুমার, কালিঞ্জর, বীরেন্দ্র সিংহ, কবিরগ্রাম, কৃষ্ণপদ সিংহ, নীরেন্দ্র কুমার সিংহ, রমাবতী সিংহ, হেডমাষ্টারনী, সন্ধ্যা সিংহ, সিঙ্গারী, সুভাষ সিংহ, M.A. পাচডালী, দুল্লভছড়া, বীরবাবু সিংহ, উনাম, সুরেশ সিংহ, হেডমাষ্টার, গোকিলা, শ্যামসুন্দর সিংহ, শনিছড়া, বিদ্যাভূষণ সিংহ, মোহনপুর, শান্তি সিংহ, বেতার শিল্পী, ত্রিপুরা। উতাত সমাজে মোরে শ্রেষ্ঠ লেখক দেখি উতারে ভক্তি ও ধন্যবাদ। এলেরিক এহানাত কবিতা ছড়া, দেনা অইল। সমাজর হাবি গুণী গিরিগিথানীয়ে আশা করি পাকরিয়া হারৌ অদিতাঙাই নিংথয়া শ্রদ্ধা জানাউরী।

হাবিয়ে সমাজর হাবি লেখকর মূল্যবান লেখারে গুরুত্ব দিয়া পাকরেদিতাঙায় বুলিয়া হেইচা থাইল। আমার লেরিক, আমার সাহিত্য, আমার কৃষ্টি, আমার এলা, আমার নাসারে নিজর সম্পদ নিঙে ইজ্জত দেনারকা হাবিরাং অনুরোধ থাইল।

নিজরতারে বানাপার উগ, গাং বানাপেইতয়, জাত বানাপেইতয় দেশ বানাপেইতয়। বানা এহানে মানুরে মহৎ প্রেমি হংকরের। সমাজর হাবিরাং প্রেম বানা শ্রদ্ধা ভক্তি থাইল। সমাজে উচ্চ শিক্ষিত নিয়াম অনা থক, যদিও আমারতা অশিক্ষিত সমাজে নেই।

নরেন্দ্র চন্দ্র সিংহ

সিঙ্গারী, শিলচর - ৭ কাছাড়,  
আসাম



## ইমা লক্ষণা সূচীপত্র

	পৃষ্ঠা		পৃষ্ঠা
প্রভুর সৃষ্টির কথা	১	বারো মাহার উৎসব	২৩
হাবিরে মি শ্রদ্ধা করৌরি	৪	মানু শ্রেষ্ঠ	২৪
সন্মান	৫	মধুর বৃন্দাবন	২৫
তি কিতা দিতেয়	৫	পূজা	২৭
বেলি	৬	হবা কাম কর	২৭
ইমার বানা	৭	আসাম	২৮
জ্ঞানর কথা	৭	ইমা লদে শ্রীকৃষ্ণ	২৯
পয়সা কামা	৮	মি মনাউরী	২৯
খেলা	৯	ভারত ইমা	৩০
সমাজর কথা	৯	শহীদ সুদেষ্ণা	৩১
এব আছি হবা মানু	১০	হাবি বেলিয়ে করেৱতা	৩১
হেলা না করি	১১	ভারত মোর জন্মভূমি	৩২
মহত্ব	১২	গুরু দ্রোনাচার্যর কথা	৩৩
মন দিয়া লেরিক চা	১৩	আগুয়া	৩৪
হবা	১৪	তি দুঃখ নাকরি	৩৫
আশা	১৪	লেরিক চা	৩৫
দুঃখী	১৫	মোর সংকল্প	৩৬
কতি হবা পৃথিবীগ	১৬	আমার সৌগ	৩৬
বরিষা	১৭	বিয়ান ফুওইল	৩৭
কাম কর	১৮	ভজন	৩৭
মি জরম অইং বারো এজাতে	১৮	স্কুলে যিক্গা	৩৮
হবা সৌ হংকর	২২	প্রকৃতি (ছড়া)	৩৮
দেশ সেবা	২২	লেরিক চা	৩৯



# ইমা লক্ষণা

## সূচীপত্র

	পৃষ্ঠা		পৃষ্ঠা
প্রভু	৩৯	মনর মহৎ চিন্তা নাইলে	৫৯
গুরু	৪০	নাম সংকীৰ্তন	৬১
হাবিতায় দরকার	৪০	মানবতা	৬১
জীবন	৪১	জীবনে নুঙেই অনা	৬৩
দিন না উবার	৪২	গঙ্গা	৬৩
তি আগে ডাক	৪৩	আহ আহ আহ	৬৪
তোর মোর একতা	৪৪	অৰ্জুনর দুঃখ	৬৪
ক্ষেতি	৪৪	কিহান অইলাতা	৬৬
হমা	৪৫	আমি ভারতর সৌ	৬৭
উপদেশ	৪৬	মহৎ উতাই মানু	৬৮
আমার কৃষ্টি	৪৬	সংজ্ঞান	৬৮
গাং	৪৮	মনা	৬৯
তি কতি হবা	৪৮	বৈশাখ আইলে	৬৯
শহীদর কথা	৫০	কনাকর খুরাক	৭০
বিষ্ণুপ্রিয়া মণিপুরী ইমা	৫১	মুক্তিয়ারর খেলা	৭০
লেখক	৫২	জগতর সৃষ্টি	৭১
বনর শোভা	৫৩	ভারতর কথা	৭২
কঠিন মনুষ্য জনম	৫৪	রাস বিশ্রামর এলার কবিতা	৭৩
গিরস্তির আনন্দ	৫৫	সৃষ্টি (ছড়া)	৭৯
বসন্ত কাল	৫৬	শ্রীকৃষ্ণরে ভক্তি	৮০
আমার মণিপুর	৫৭	হাবি প্রভু তোরতা	৮০
এবাকার বেয়াপা	৫৮	ফিরয়ে চিন পরিচয়	৮১
শ্রী কৃষ্ণর বিলাপ	৫৯	কিসাদে পৃথিবী আছে (ছড়া)	৮২



## ইমা লক্ষণা সূচীপত্র

	পৃষ্ঠা		পৃষ্ঠা
আমার হৌওর মাসেল	৮২	প্রেম বানা কতি ঠুম	১০১
বীরঙ্গনা বেয়াপা	৮৩	বেলিয়ে দের হাবিতা	১০২
ডাক্তার	৮৩	সৌওরে হিকা	১০২
সংজীবন	৮৫	আমার বিয়া	১০৩
প্রেম বানা	৮৫	আমার দেশর কথা	১০৩
সংকর্ম	৮৬	নিংশিং আই ভারতর স্বাধীনতা	১০৪
কৃষ্ণনামর গুণ	৮৬	হমাদউরী	১০৪
দুর্গা পূজা	৮৭	হিদল	১০৫
ঈশ্বর স্মরণকর	৮৭	জারর দিনর কথা	১০৫
এবাকার পত্রিকার পৌ	৮৮	হাবি বেঠিক	১০৬
লেইরা	৮৮	দৌওয়ে জিঙে	১০৬
প্রভু হিংসা দরবার নেয়ক	৮৯	বিভুলা মন	১০৭
এক আই ক্ষত্রিয়	৮৯	কনাকর কবিতা	১০৭
তঙাল তঙাল ছড়া	৯০	গাছর মহত্বতা	১০৮
মানুর প্রেম	৯২	পেনসন	১০৮
ছড়া	৯৩	সত্যর জয়	১০৯
পাহিয়ার কাম	৯৩	বিদ্যা জ্ঞানে থার ব্রহ্মত্ব	১০৯
ফুল	৯৬	আন্দোলন	১১০
বিদ্বানগ	৯৬	মনা সংসঙ্গ	১১০
মানুর মনর গতি	৯৭	কতি হবা আমার জাতহান	১১১
ভারতর স্বাধীনতা	৯৭	ইমা নন্দরাণী	১১১
ইমা আঠাইপি	৯৯	গোলাই বুয়েইলে	১১২
কিহান আইলাতা	১০০	ইচে	১১২



# ইমা লক্ষণা

## সূচীপত্র

	পৃষ্ঠা		পৃষ্ঠা
হবা কাম কর	১১৩	জাগ জাগ তুমি	১২৫
বৈশাখ	১১৩	উন্নতির যুগহান	১২৬
কাম কর বলি	১১৪	ছনার জাতহান	১২৮
গাঙে জিঙে নুঙেই	১১৪	মনুষ্য জনম দুর্লভ জনম	১২৯
জি যওপা জাতহান	১১৫	সাধুসঙ্গ নাইলে	১২৯
ঘুমজে মা পরান ঠাইগ	১১৫	নুঙেই অকা	১৩০
পাপ পুণ্য	১১৬	পরিবেশ হবা অক	১৩১
বরন পরলে	১১৬	তি কতি হবা ইমা	১৩২
যার যার নিয়ম	১১৭	সত্য উহান হুদা থার	১৩৪
মনাউরী	১১৭	গুণর মর্যাদা	১৩৫
কোনদিন চুমইতাইতা	১১৮	বীর ছাত্র	১৩৫
ফিরয়ে পরিচয়	১১৮	কুরিয়া	১৩৭
মানুর কথা	১১৯	বসন্তকাল	১৩৭
লেরিক	১১৯	রাহালর লগে কৃষ্ণ	১৩৮
ধন্য ছাত্র সংস্থা	১২০	আহকা সত্যর মূল পথে	১৩৯
লেইরা এহান কতি বরি	১২০	ইমা সরস্বতী	১৩৯
পুন্যত থাইয়	১২১	পাহিয়াই সময় চিন্তারা	১৪০
পানি	১২২	গুনে জিঙে	১৪১
পরম বৈষ্ণব	১২৩	বেকার	১৪২
ঈশ্বর সর্ব শক্তিমান	১২৪	দুনিয়া	১৪৩
		দেশে শাস্তি নাইল	১৪৪

## ইমা লক্ষণা

### প্রভুর সৃষ্টির কথা

প্রভু তি সৃষ্টি এহান হংকরিয়া,  
কতি হারৌ অয়া চার,  
অসংখ্য লক্ষ লক্ষ কোটি কোটি জীব,  
পক জক পাহিয়া সৃষ্টি করিয়া  
কুরাং থর হিসাব উতার।  
কত কত জাত কত কত নমুনা,  
আকতা মাটিত থাইতারা,  
আকতা পানিত জরম অইতারা  
পানিত থায়া পানিত মরতারা।  
আকতা টেঙারা জঙ্গলে থাইতারা জরম অয়া,  
আকতা থল পানিত দ্বিয়হানাত থাইতারা  
আকতা হাকে ফরদিতারা লামতারা,  
এতাত মনুষ্য তঙাল জ্ঞান গুণ  
বিদ্যা হাবি হারপেইতারা দেখতারা  
বুজতারা হবা শাক্তি,  
আরতা হাবিয়ে উহান হারপা নুয়ারতারা  
মানুরতা তঙাল তঙাল থানা খানা  
নানান ধর্মকর্ম রীতি।  
মানুয়ে হীনপেয়া ক্ষেতি করিয়া  
ফসল ফলেয়া খেয়া জিৎতা থাইতারা,  
আর জীবরতা উহান নাগই  
বিসারেয়া পেয়া খেয়া চলতারা।  
মানুয়ে বিদ্বান গুণী অয়া জ্ঞানল  
চলতারা, জ্ঞানর লেরিক ইকরতারা,  
পাকরতারা অনা মনেয়া জ্ঞানী,  
আর জীবরতা জ্ঞান বিদ্যা নেই,  
উতারমা মহৎ কাম করতারা পররকা  
গাছলতা ফল ফসল ধরিয়া খওয়েইতারা।





## ইমা লক্ষণা

মানুরতা সার্থ লোভ মোহই  
পাপ পুণ্য তঙাল তঙাল দোষে গুণে চলতারা,  
পুণ্যর জয়ধ্বনি অর, পাপ কর্মর শাস্তি  
দুঃখ নরক ভোগ অর,  
বিচারে শাস্তি ভোগিয়া লারচার অইতারা।  
হুদা পুণ্যবান জ্ঞানী বিদ্বান ভক্তিত  
মূল্যবান জীবন কাটেইতারা দিনরাতি,  
আর জীবরতা এতা নেই তানু উহানে মুক্তি।  
আকতাই আকতারে খেইতারা  
খেয়া জিংতা অইতারা থাইতারা  
এসাদে পাপ পুণ্যল চৌরাশি লক্ষ্যুনি ভ্রমণ করতারা।  
পুণ্যবান উগই মরিয়া ও পুণ্য জনম পার,  
যার যার জীবনর আয়ু লয়য়া মরতারা,  
তেব পুণ্যবানর যারী অমর থার।  
এতা হাবি জীব জন্তুর জন্ম মৃত্যু হিসাব  
কুঙগ থার মরের বারো কুরাং জরম অর,  
প্রভু এতা হাবি হংকরিয়া কুরাং হিসাব থর।  
মনুষ্য এতারে নিয়াম বানাপেয়া  
হাবি জ্ঞান গুণ দর,  
তেব কিয়া হবা শাস্তি কামল পাপ পুণ্য  
মহৎ জ্ঞানী গুণী পাপী লেপর।  
হারপা হারপা মানু পাপ কর্ম করতারা,  
উহানল লোভ মোহই মানু কুকর্মত পরিয়া নরকে ছানতারা।  
প্রভু জ্ঞান সৃষ্টি তত্ত্ব মানুয়ে ইজ্জু হারপেইতারা থানি,  
তেব মহৎ জ্ঞানর পথে প্রভুরে পানা  
নিংশিং নায়া ভোগতারা দিনরাতি।  
দোষে জিংতা থাইতে জেল শাস্তি ফাসী মানুরতা অর,  
জ্ঞানী অয়া ভুল করতারা উহানল মাপ নেয়র।  
হাবি প্রভুর লীলা, প্রভুর সৃষ্টির  
কর্মফলল হবা শাস্তি পাপ পুণ্য অরতা,



## ইমা লক্ষণা

উহানল পাপ কর্ম নাকরানি,  
প্রভুরে ভজিয়া পেইল মহৎ কামল সৎপথে যান।  
এহানেই সৃষ্টির সার মূল কথা,  
ইকরা আছে বেদ পুরাণ গীতা ভাগবতে,  
দেহ্যাছে পাপ পুণ্য রামায়ন মহাভারতে।  
আর জীবে এতা হরনাপেইতারি,  
তেব না হরপেইলে এক দোষ,  
মনুষ্যই হুদা হরপা হরপা করতারি ভুলর কত কত দোষ।  
উহানল ধন্য অনা মহৎ কাম করিয়া,  
নাইলে রেহাই নেই,  
প্রভুয়ে মাতেছেহান পুণ্য ভক্ত মুনি, ঋষি,  
জ্ঞানী, বিদ্বান, পুণ্যত থর উতারেই।  
রক্ষা করের ভক্তরে নিজে আয়া শত্রুরে পাপীরে  
পরাজয় করুয়েয়া মারিয়া।  
এসাদে পালন করের সৃষ্টি বেলি জুনাক তেরা পানি জ্বি হাবি দিয়া।  
তেব প্রভুরে নিংশিং অনা  
পাহরতারি মানু মায়া লোভে মোহই বিভুলা অয়া,  
উহানল পাপ পুণ্য বিচার অর  
কোট্টে হুদা মানুরতা।  
পাহরতারি মরলে এতা লোভ লালসা হাবি মিশা অর,  
শ্মশানে পুরিয়া আকৃতি প্রকৃতি স্বভাব হাবি লয়র।  
প্রভুরে স্মরণ কর হে মনুষ্য  
ত্যাগ করো সৎজ্ঞানল হাবি অন্যায় পাপ কর্ম,  
জয় জয় কৃষ্ণ জগৎ ঈশ্বর বুলিয়া ভক্তিত  
পালন করো, রক্ষা করো সৃষ্টির মহৎ ধর্ম।





## হাবিরে মি শ্রদ্ধা করৌরি

মোর প্রেম প্রীতি শ্রদ্ধা ভক্তি, থাইল হাবিরেং,  
হাবিরে নিংকরানিয়ে মোর ইচ্ছাহান।  
বেদাবেদ হিংসা নিন্দা মোরাং নেই,  
হাবির লগে হবা অয়া থানা মোর খৌরাং উহানেই।  
হাবির দুঃখ মোর দুঃখ,  
হাবির হারৌয়ে মোর হারৌ,  
হাবির বিদ্যা উন্নতি মি মাগৌরী,  
হাবি জ্ঞান গুণর মিঙালে ভালকা মি মনাউরী।  
হাবির মন হবা অনা মহৎ জ্ঞানী অনা,  
উসাদে হবা অয়া হাবি হারৌত থানা।  
উসাদে ভালনা গাং সহর রাজ্য রাজধানী,  
ঔ হবার সংবিধান মতেহাবির আশা পুরানি।  
কারৌ দুঃখ না থানা, দুঃখী ও নিজর পরিশ্রমল পালনা,  
উবাকা পৃথিবী হবা অইতয় সাকা নেয়ইয়া।  
বেলিয়ে মিঙাল দের যেসাদে কারৌ বাকী নাথয়া,  
ঔ হারৌ মাগৌরি প্রভুরাং,  
হাবির মঙ্গলে পালক সাহস, গুণ, কৃষ্টি, ক্ষেতি বিদ্যা, মান, সম্মান,  
এ মঙ্গলর কথা হারৌ আনন্দ জ্ঞান মহত্ত্বতা  
শিক্ষার সাহিত্য অয়া অক্ষরে অক্ষরে থাক ইকরা।  
এ মনর জাগরণর শক্তিয়ে সুখ শান্তিত খুলক হাবির হারৌর লেইপাক,  
যুগ যুগ জীবন জীবন চলিয়া এহান থাক।  
দুঃখ নেয়ইবতা এ পৃথিবীত,  
ব্যাধি জ্বালাল না ভোগবাতা হাদি হাদিত।  
পাপ কর্ম পরহিংসা ক্ষতি নেয়ইবতা,  
হাবির মন অইবতা এসাদে হবা।  
উহান মি নিয়াম হবাপাউরী,  
এসাদে হাবি হবা অকা উহান মি মাগৌরী।



## ইমা লক্ষণা

### সম্মান

শিক্ষিত বিদ্বান জ্ঞানী মহান,  
উতारे হাবিয়ে সম্মান করতারা,  
দেশর রাষ্ট্রপতি মন্ত্রী হাবিরে সম্মানল ভক্তি করতারা।  
শিক্ষার জ্ঞানী শিক্ষকরে শিক্ষার ইজ্জৎ দিতারা হাবিয়ে,  
দেশর শিক্ষিতর সংকর্মরে শ্রদ্ধা করতারা সম্মানে।  
সংজন সাধু সন্নাসীরে ভক্তি করতারা,  
দেশর রক্ষক সৈন্য, ক্ষেতিয়ালা, ডাক্তার ইঞ্জিনিয়ার  
বেবসায়ী হাবিরে মান্য করতারা।  
দুঃখীরে দয়া মহৎ সেবারকা  
সম্মান করতারা ও জ্ঞানীরে,  
কিন্তু নিন্দা করতারা চরিত বেবার হবা নাইলে।  
শিক্ষা জ্ঞানর মহৎ জনরে মান্য করতারা,  
উহানল বিদ্বান অইলেও জ্ঞানী মহৎ অনা।  
জগতে জ্ঞানী গুণী উতাই অছি মহান,  
উতাই হাবিরাত পেইতারা সম্মান।  
হাবির গুণীর কথা এহান।

- ০ -

### তি কিতা দিতেয়

বেলিয়ে মিঙাল দের, ফুলে নুংশি গত দিতারা,  
বৌরাজাই বৌ দের মাষ্টারগই শিক্ষা দের।  
গুরুয়ে সেংকম দিতারা, গাছে ফল ফসল দিতারা।  
এসাদে দান পুণ্য কাম,  
তি কিতা দিতেয়,  
পুণ্যবান তি অইতেয়,  
কি পুণ্যর কামল জীবন ধন্য অইতেয়।  
কতি হবা এ জ্ঞানল যেগ চলের,  
মনুষ্য জনমে উগ ধন্য অপারের।





## ইমা লক্ষণা

কততাই শিক্ষার স্কুল হংকরতারা,  
কততাই রূপা দান করতারা সৎকামরকা।  
কততাই পানিরকা পহরি কথা হংকরতারা,  
কততাই মন্দিররকা বি দান করতারা।  
এসাদে জীবনে সৎকামল ধন্য অইতারা,  
তিও দানল ধন্য অনা মনা ঔসাদে অয়া।  
এসাদে ধন্য অইতারা পৃথিবীত জরম অয়া।

- ০ -

## বেলি

বেলি গিরক মিঙাল ধর পয়সা কিতা না লর,  
নিষ্কা নিষ্কা মিঙাল দিতে না নাবুলর,  
আকদিন বাদ নেই মিঙাল দেনা,  
হীন দুঃখ যারৌ নেই মিঙাল দিতে নিষ্কা।  
মিঙাল ধর, হাবিরে গুলকরর,  
কতি জ্ঞানল সদয় অয়া একাম তি করর।  
নিষ্কাকার এ সৎকামে তি হারৌ অর,  
কারাঙও হীনপেইলু বুলিয়া বিলাপ না করর,  
কতি হবা মন তোর।  
তোর রইদর ফাপে বৌ দের বরন দের,  
তোর ফাপর কারনে বৌবরন আনের।  
বরনর পানিয়ে জীব গাছ লতা জিংতা থাইতারা,  
ক্ষেতি ফল ফসল অর বেমলবেঠা  
তোর এ দয়া সৎকামরকা হাবিরে তোরে ভক্তি করতারা।  
হাবিরে তি প্রিয়গ অর উহানরকা,  
হাবিরে তোর গুণ গেইতারা।

- ০ -



## ইমার বানা

ইমার কতি বানা জগতে নেই মান্না,  
উরে লয়া বুনি দিয়া কতি আদর নিক্কা নিক্কা।  
দশমা দশদিন গব্বত থয়া জরম দিল কতি হীনে,  
কতি বানাল ডাঙর করল আদরে।  
হিকেইল বানাপেয়া ঠুম ঠুম কথা,  
ইমাই মাতল নিক্কা চরিত বেবার হবা অনা।  
অভাবে নিজে না খেয়া সৌওরে খওয়েইরি,  
সৌওয়ে অনাচার করলে আল্লিনেয়া নিকেইরি।  
সৌ শিক্ষিত অনারকা কতি ইমার চেষ্টা,  
সৌ বিদ্বান গুনী অইলে ইমার হারৌর নেই সীমা।  
হুজানি নার ইমার বানা,  
হুনা রূপা কিন্ডায়উনার ইমার বানার মান্না।  
ইমারে মুরগত করিয়া পৃথিবী বুললেও নারগা,  
নিক্কা আদরে ইমার সেবা করলেও উতার বিন্দু আগ নার পারা।  
উতাউ ইমার ঋণ থার লইনায়া,  
ইমারে হমাদেউরী নিক্কা নিক্কা।

- ০ -

## জ্ঞানর কথা

আহিগিরে মাত তি  
চেই হবা উতা, নাচেয় হবানেইতা,  
কানহানিরে মাত তি  
হুন হবা হবা কথা।  
থতাহানরে মাত তি  
হবা কথা টটরা,  
মনহানরে মাত তি  
জ্ঞানল হবা গদে চলা।  
গারিগরে মাত তি  
থাক হবা কামল,





## ইমা লক্ষণা

আতহানিরে মাত

তি হবা কাম করো।

জাংহানিরে মাত তি

হবা পথে আটো,

এ জ্ঞানে চলের জ্ঞানী অর উগ।

উহান অইলে ভুল কাম নার,

বিপদ আপদ তারে লাগাল নাপার।

মঙ্গল অর উগর হাবি কাম,

সংজনর জীবনে এহান রীতিহান।

চরিত বেবার হবা অর

দয়া মায়া সং জ্ঞান তারতা ঠয়র।

উহানল তা মহং জনগ অর।

- 0 -

## পয়সা কামা

কাম কর পয়সা কামা, ছয়াত্তা খেইবেতা,

কাম করিয়া পয়সা পেইলে হারৌত থাইবেতা।

পয়সাই ইমা বাবা পারা আদরে ছয়াত্তা খওয়ার,

ইমা বাবার সেবা অর পুন্য কাম করুয়ার।

দান দহিনা সেবা পূজা তীর্থ ভ্রমন অর,

দলান গাড়ী বি সম্পত্তি হাবি পয়সাই হঙর।

পয়সা কামা, পয়সা কামা, কর ক্ষেতি বেবসা,

হীন কামে হারৌত থাইতেয় কামা পারলে পয়সা।

বিদ্বান ইঞ্জিনিয়ার ডাক্তার হাবিয়উ পয়সাই অইতারাতা,

পয়সাই হাবি আশা থুঙর, পয়সা নায়া নার আকতা।

পয়সা কামা কুরিয়া নাই লাজ নেই কাম করতে,

কাম না করলে কিতা খেইতেয় মরতেয় উপাসে।

কুকামে শাস্তি লাজ জেল অপমান,

হবা কামল রোজগারী কর পয়সাই দের মান সম্মান।

- 0 -



### খেলা

আহ আহ খেলেইক হা ডুডু বন্দি,  
কাঞ্চেই টাঙ্গল চিনচিকি মিনচিকি।  
খেলেইক বল বলিবল ক্রিকেট টেনিস ধাপ ফাল হকি,  
হবাকরে খেললে সম্মান কতি।  
দেশে দেশে খেলাত যেইতারাগা, হবা খেলুয়ার উতা,  
খেলারকা বুলিয়া রূপা চাকুরি পেইতার।  
হবা করে খেললে সুনাম অর কতি,  
খেলাই দেব ব্যায়াম হারৌ গারিত নার ব্যাধি।  
খুলামনে খেলা অর নেই ঠকঠকামি,  
মনে হারৌ থার, কতি অর শান্তি।  
ছাত্র লেরিক তামকরে তামকরে খেলা খেলতারা,  
ছাত্রর দায়িত্ব নিয়াম জীবন হংকরানিরকা।  
শিক্ষার স্কুল কলেজ ইউনিবাসিটিত আছে খেলার ব্যবস্থা,  
খেলারকা দেশে দেশে কত আছে ক্লাব সঙ্গ সাজেয়া।  
খেলাত জয় অইলে কত আনন্দ গৌরব, নিজরতা দেশরতা,  
খেলাই দেশর মান পৃথিবীরমা।

- ০ -

### সমাজর কথা

যেবাকা খালকরৌরি উপেয় সমাজর হাবির কথা, নিংশিং অউরী,  
কুরাং কুরাং কিসাদে আছি অয়া অসহায় সম্বলহীন দুরদুর্বালী।  
মণিপুরে আকতা থাইলা পরভাব হিংসার আহির মাজে,  
আসামে আছি ত্রিপুরাত আছি, মুম্বাই, গুজরাট, দিল্লীত আছি  
আকতা আছি বাংলাদেশে, আকতা আছি ব্রহ্মদেশে।  
নিজর সরকার নেই, সহাই নেই, কতি দুঃখ,  
কোন সুযোগ সুবিধা নেই, কোন রকম চলতারা সততা জ্ঞানল।  
নিজর মণিপুর পররাং দিয়া উদ্দাসী দুঃখী,  
অত্যাচার জারে নুয়ারিয়া চারিবেদে ছিতারাশি।  
অন্যায় কাম না করতারা সত্যতার গুনে দিন কাটেইতার,  
কাইকারবার না করতারা, তেব আছি





## ইমা লক্ষণা

লেইরা গিরস্তিল হাবির লগে হবা অয়া ।  
খালকরলে দুঃখ লাগের কতি দুঃখ জারিয়া থাইতারাতা,  
নিজর কৃষ্টি রূপ দিয়া নুয়ারতারা ।  
উতার গজে চাকুরী নেই বেকার হাবির বুজে,  
তেব ঈশ্বর আছে কৃপা করতয় বুলিয়া থানা চেয়া আশার হাকে ।  
দুঃখী নিম্বর এলা কুংগই ছনতয় এপেয়,  
আমার দুঃখ দেহিল জগতে আকগউ নেই ।  
তেব থানা লাগতয় মান ইজ্জতে গেলগা দিন উতার ডেকি,  
সততাল সৎকামল জিংতা অনা লাগতয় ঙালকরিয়া কলা কৃষ্টি ।  
গৌরিয়া রীতি লুলাকাং, অয়া চলানি বৈষ্ণবর আচরনল,  
কাম করানি, হিন্দ দ না হারানি, থাইলেও কপালে চিরদুঃখ ।  
হুদা বিদ্যাল আণ্ডয়ানা বিদ্যাই দিতয় জ্ঞানর শক্তি,  
বিদ্যাই দিতয় জ্ঞানর প্রেম বানা সততা ভক্তি ।  
এ রীতিত জ্ঞানল জগতে থানা ঙালয়া,  
হিনেয়া সেঙয়া ঙকখি অয়া রাধিয়া থানা পিনা লুকরে,  
মাংসেং বাছিয়া শুভ কাম মঙ্গলর কাজে ।  
কতি হবা গৌরিয়া সমাজর রীতিনীতি,  
কারৌ লগে তিল নেই, কতি হবা জিঙে বিষ্ণুপ্রিয়া মণিপুরী ।  
কৃষ্টির বিদ্যাই শক্তি, বিদ্যাই সাহস জ্ঞান গুন দিতয়,  
উতাই আমার ধন সম্পদ খালকরানি লাকতয় ।  
চরিত বেবার হবা অনাই মহতর জ্ঞান গুন সম্মান,  
হবা অয়া থানার চেষ্টাই আমার পরম জ্ঞান ।  
হুদা গুনল জিঙিয়া থানা জগতে,  
গুনী বুলবাতা হাবিয়ে ।

- ০ -

## এব আছি হবা মানু

এব আছি হবা মানু সৎজন জ্ঞানী,  
এব আছি বিদ্বান গুনী সাধু সন্ন্যাসী ।  
এব আছে গ্রহ নক্ষত্র বেলি জুনাক তেরা,  
এব আছে পৃথিবী কতি হবা অয়া ।  
এব ফুল সাতর ফল ধরের,



## ইমা লক্ষণা

এব বরন পরের, এব রইদ দের।  
এব ক্ষেতির ফসলে অর বেমল বেঠা,  
এব জাগাতা উতাই নুঙেইত থাইতারা।  
এব আছে তীর্থ ভক্তি মহৎ জ্ঞান বুজে,  
এব আছে কৃষ্টি কলা রূপে অপরূপে।  
এব কুরিয়া উতা দুঃখী অয়া খেইলতা নাপেইতারা,  
এব ভিক্ষা মাগিয়া খেইতে লাজ নাপেইতারা।  
এব চর ডাকাটি উতা চরকরতারা, কত শাস্তি পেইতারা,  
এব খুনির শাস্তি অর, তেব না এরতারা।  
শাস্তিতা কত থাইলেও উতারে শাস্তি বুলতারা,  
এব হবা মানু জ্ঞানল হবা অইতারা।  
হবা মানু আছি আরো সৃষ্টি ধ্বংস নারতা,  
শাস্তি মানু নিয়াম অইলেও সৃষ্টি আছে টিকিয়া।  
এব আছে মহত্ত্বতা।

- ০ -

## হেলা না করি

হুচিগরে ও হুরু বুলিয়া হেলা নাকরি,  
বিরাত আন্তিগউ আটকের জাংহানাত বিধের যদি।  
সাধারণ বেদগাছে ঘরগ বান্ধিয়া থর,  
সহজে না বাঘের বৌবরন ভৈচালেও ওঁ ঘর।  
হুরকাং আঠিগন্ত বিরাত গাছজার অয়া ফল ধরের কতি,  
তুচ্ছ পেপুরা ও কাইতারা, লালইতারা টেঙারা গাট মরুভূমি।  
কারেও হেলা নাকরি কোনগউ কম নাগই,  
তুচ্ছ জালহানাত হমেইলে বাঘ ও মরিয়া থাইতয়।  
হাবিরতাউ গুন আছে হুরু ডাঙর বাদ নেই,  
উহানল অহঙ্কার নাকরানি ডাঙর অইলেই।  
মান্না অইতারা গুনল সৃষ্টির মাজে,  
উহানল হেলা নাকরি আকারে হুরু অইলে।

- ০ -



মহত্ব

হে মানু ! এ পৃথিবীত মহামানু অয়া জাগ,  
 মহামানবতার স্নেহর প্রেমল কর্ম উৎসবে আগরে আগই ডাহ।  
 আদর প্রেম নিং কতি হবা গুন, মানবতার জ্ঞানরমা,  
 মহাজ্ঞানল পাপ কর্ম হাবি পাছর পবিত্র মনরমা।  
 মহামানবতার মহৎ লেরিক ধর্ম কর্ম যারী,  
 হাবি পাকর জ্ঞানর লেরিক ইকরেছি মহৎ জ্ঞানী।  
 আগরে আগর কতি মায়া, বানাপেয় অন্তরল,  
 ও হৃদিল প্রেমর নিংল, আদর করিয়া মহৎ জ্ঞানল চল।  
 কতি বানার কতি আদর আগরাং আগই উপভোগ কর,  
 সৃষ্টির আনন্দর পুন্য পৃথিবীত ধন্য ধন্য বুল।  
 যোগই থার এহানর দুরেইত,  
 নিন্দা হিংসার কুমেইত, তারে পুন্য জ্ঞান দেই,  
 আর নাকরবতা পাপকর্ম পুন্যর পথগ দেহেয়।  
 উগই যেবাকা হারপেইতয় এহান, হুতুমৌ পুন্য হান,  
 ও সৎকর্মর কতি হারৌ দেহিয়া পেয় আনন্দহান।  
 মহান উতাই পরর অনিষ্ঠ পর নিন্দা নাকরতারার,  
 পরর উপকার করিয়া আনন্দ পেইতারার মহৎ জ্ঞানরমা।  
 এ সৎকর্মরমা যদি আহের ভিগ্ন লালয়া যেইগা গণ্ডিগ,  
 জয় অইতারার শ্রেষ্ঠত্বর খৌরাংল লিতয়া আধার পথগ।  
 যে হৃদিগত প্রেম জাগের সৌ ইমা বাবা হাবির অন্তরে,  
 উহান নাইলে হারৌ নেই পারা জিংতা অয়া থাইতে।  
 দুঃখী উগরে দেহিয়া যেসাদে ছয়াত্তা নাদিয়া খানা নাহের,  
 উগরে দিয়া হারৌ করিয়া বাটিয়া খেইলে নুঙেই জাগের।  
 উহানল জগতে দুঃখী নেয়ইলে কতি হবা শান্তি,  
 দুঃখীর দুঃখ দেখলে মনে জাগের দুঃখ অশান্তি।  
 যেসাদে চিরিয়া খানাত জন্তু পালতারার কতি বানাপেয়া,  
 কত মানু দেহাত যেইতারাগা কতি হবাপেয়া।  
 কতি হবা জাগের পাহিয়া পলি জীবর সৌ দেহিয়া,





## ইমা লক্ষণা

কতি বানা লাগের হাবির প্রেম দয়া মায়া ।  
এ প্রেম উপভোগ কর, সৎজ্ঞানরমা,  
সৎজ্ঞান গুন হাবিরাজ জাগক হিংসা নেয়ইবতা ।  
কত ফুল ফল ধরের পররে হারৌ দেনারকা,  
কত রাজা সম্রাট সৎমনল দান করিয়া পুন্য পেইতারা ।  
উদিন হারপার ঔ রাজাই কতি প্রেম বানার কতি মধুরতা,  
সার্থক নার কারৌ জনম পাপ কর্মর হৃদিত জিৎতা থায়া ।  
মহা মানবতার মহান সিংহাসন মহান দেশে থার,  
মহান রাজার পরিচালনাই হৃদা হারৌ জাগার ।  
উপেয় লেইরা বরা বিদ্বান অশিক্ষিতর নেই ব্যবধান,  
হাবি হাবিরকা দুঃখ দরদী অইতারা হাবি মহান ।  
যেপেয় হৃদা হারৌ সুখ শান্তি শোভা পার,  
উপেয় মহামানবতার সৎ ধর্ম কর্মত,  
এ পৃথিবীতহৃদা হারৌ জাগার,  
উবাকা আনন্দর স্বর্গহান পারার ।  
মহৎ জ্ঞানর মহাজ্ঞান চারিবেদে ছিতারার উপেয়,  
নুংশি ফুলর গতে মাতের পন্য আছে পাপ এপেই নেই ।

- ০ -

## মন দিয়া লেরিক চা

মা মন দিয়া লেরিক চা, লেরিক চানাত বয়া  
বারাবুরা চেইলে হিকানি নার পড়া ।  
একিন অয়া না চেইলে পড়া না হিকতেয়,  
হীনপেয়া হিকলেউ তেল্লাম পাছরতেয় ।  
এক মন অয়া পাকর পরা তেল্লাম হিকবেতা,  
একিনে কাম করলে কামহান লয়র ত্বরা ।  
পড়ার সময় পড়া খেলার সময় খেলা,  
মনহান একিন অইলে হাবিতা পারতারা ।  
মন দিয়া পাকর পরীক্ষাত হবা ফল করতেয়,  
হবা ছাত্রগ অয়া হাবিরে জিৎতেয় ।

- ০ -



## ইমা লক্ষণা

### আশা

মোর মনর লেমগ না নিবি ঙালনীৰ আগে,  
মোর ধূপৰ গতহান থাক গঙালেয়া পূজাৰ ও পিছে।  
যদি সাতয়া কেলৰ বসন্তৰ ফুল বারো লয়ৰ শুকসারীৰ এলা,  
তেব লইনাক তোর বানা, থাক চিরদিন প্রেম অন্তররমা।  
আহের যদি দুঃখ বজ্জাট অভাব আহিয়া যাক্করিছ,  
দুঃখই জুলী ধরিয়া ভিক্ষাত নুকুললেউ না কাদিছ।  
কত বিপদ ভিগ্ন অইলেউ না আলইছ পিঠিয়েদে,  
ধৈর্য্যত সহ্য করিয়া হাব্বিতআগুয়েইছ সাহসে।  
ছদা ঠইকরিছ মন বল বিদ্বান গুনী অনারকা,  
উসাদে চেষ্টাত দুঃখী ও বিদ্বান অইতারা সুখী অইতারা।  
ঔ জ্ঞানল না আলইছ পিছে ঙালনির খৌরাঙে,  
মোর মনর লেমগ না নিবিছ জীবনে ঙালনির আগে,  
মোর ধূপৰ গতহান থাইছ গঙালেয়া পূজাৰও পিছে।

(প্রথম পুরস্কার পাছে কবিতাহান)

- ০ -

### হবা

বেলিয়ে মিঙাল দিয়া পৃথিবী ঙালর কতি হবা,  
জুনাকে ঙালর রাতি কতি হবা অর প্রকৃতির শোভা।  
ফুল সাতর নুংশি গত দের হবার সীমা নেই,  
খুয়া অর, বরন পরের কতি হবা শোভা তুলনা নেই।  
ক্ষেতি ধান হৌপাত ফল নিয়াম নিয়াম ফলের,  
ক্ষেতিরকা অভাব দুঃখ নেয়র হাব্বিরে আনন্দ দের।  
ধন থাইলে পুরের হাব্বি মনর আশা,  
হাব্বিতা অর হবা।  
মানু সাত হবা চরিত হবা বিদ্বান জ্ঞানী অইতারা,  
বিদ্যা হিকেয়া বিদ্বান হংকরতারা।  
দলান গাড়ী হংকরিয়া চলতারা বৈদ্যুতিক লেম জ্বলের, জ্বলকের,



## ইমা লক্ষণা

স্ন পাউডার খৌ হঙর ক্ষেতিয়ে খেইলতা বেমলবেঠা করের।  
পাক্কা পথ ঘাট দলানে বন গাং সহর ঙালর,  
সহর গাং মান্না হবাই ইঙাল ঙালয়া পালর।  
অভাব নেই দুঃখ নেই কতি হারৌ আনন্দ  
সংজনর সংকামে মহৎ জন অর ধন্য।  
হাবি হবাই তিলয়া সুখ শান্তি অর কতি আনন্দ,  
শান্তিরতা নিন্দা অপবাদ ছুদা,  
হবা কামর হবাই অর হাবিতা হবা উহানল।  
প্রেম বানাই হবা অর আত্মীয়তা,  
প্রেমর হবার কারনে পৃথিবী অর রক্ষা।

- ০ -

## দুঃখী

বি নেই সম্পতি ধন নেই দুঃখী,  
রোজি কাম করতারা ঠেলা, রিক্সা চালেইতারা।  
রইদে বরনে হীনে কামে পরর ঘরে থাইতারা,  
আধা পেট উপাস থায়া কতি দুঃখ জারতারা।  
সৌওরে ছয়াত্তা খওয়া নুয়ারতারা,  
হবা ফিরই দেনা নুয়ারতারা।  
বরন পরের গজে ঘুমজিতে জার ইঙে নেই ফুতি,  
কতি দুঃখ দুর্গতি, অগতি কাদলে লয়র আহির পানি,  
দুঃখ জ্বালা দুঃখী উগর নিয়াম কতি।  
মানুর লেহাত গস্তি নেই লেত্‌তারা গাদ্দা,  
পরিষ্কার অইল সাবন নেই লাজ মান নেই দুঃখীরতা।  
ফারা জিরা ফুতি খেইলতা নেই পেটে,  
পেটর বকে বুক জ্বলার খেইলতা নেই ঘরে।  
ভিক্ষা কুঙগই দিতয় নিক্কা,  
কতি দুঃখই না মরিয়া থানা।  
দুঃখীর জাত লকেই সাকেই গোত্র নেই,  
নিজরতা কাদারতা বুলিয়া স্নেহ আদর নেই।





## ইমা লক্ষণা

পথে জীবন কাটের ঘর দোওয়ার নেই,  
আদর বানা প্রেম আকতাউ দুঃখীরতা নেই।  
কানা লেংগারা আতুর হাবি দুঃখীর জীবন এহানেই।  
মনে নেই মন, জ্ঞানে নেই ধন, কতি ইলেই লেই,  
নুয়ারাত নেই চিকিৎসা, নেই দয়া বানা অগতি দুঃখী অইলেই।

- ০ -

## কতি হবা পৃথিবীগ

কতি হবা পৃথিবীগ বলে বলে চেইতে,  
কতিহবা গোল হাকহান নীলুয়া অয়া গজে।  
বেলি জুনাক তেরা মিঙাল্ল গালকরতারা,  
দিন রাতি অর মান্না মান্না।  
বেলির রইদর ফাপে বৌ দের বরন পরের,  
সৃষ্টির হাবিরে জিৎতা করের।  
গাছে গাছে ফুল ফল ধরের বুজে দেশে দেশে,  
ক্ষেতির ফসলে বেমল বেঠাই থাইতারা হারৌয়ে।  
মানু জীব জন্তু কত তঙাল তঙাল জাত দেশে দেশে,  
লেহানি নার অজস্র সংখ্যা থল পানিত পৃথিবী চম্ম বুজে।  
সাগর সমুদ্র টেঙারা থল গাট বন জঙ্গল,  
কত জীব কত গাছ বুজে পানি টেঙারা থল।  
হাবিয়ে থাইতারা হারৌত সৌ জিপুত অয়া,  
কতি হবা পৃথিবীর প্রকৃতির শোভা,  
নেই উপমা দিলতা।  
ছয় ঋতুর ছয় নমুনা অর,  
তঙাল তঙাল ফল ফসল ক্ষেতি অভাব নেয়র।  
সৃষ্টি, ধ্বংস অর পৃথিবীর মাজে,  
এ সৃষ্টির আনন্দে পৃথিবী হারৌ অয়া থার নিজে।

- ০ -



## ইমা লক্ষণা

### বরিষা

আষাড় হাওন দ্বিয় মাহাই বরিষা,  
হাবি ঋতুত বরিষার তঙাল, হাওয়া ।  
বরনর পানি দিয়া সৃষ্টির হাবিরে প্রান দেব,  
বরিষার বরনে ক্ষেতি অর, খংবিল সাগর পানিয়ে বুজের ।  
পানি নাইলে খরা ফাটা কিত্তাউ জিংতা নার,  
পানির নাং জীবন পানি কতি দরকার ।  
পানিয়ে ক্ষেতি পানিয়ে গাছ মাছ লতা,  
পাতা জীব জিংতা অইতারা,  
পানি নাইলে সৃষ্টি ধ্বংস মরুভূমি ধূলী হুকানা ।  
বসরলেহে বরিষা অর গোলার পানি অর,  
পানিরকা বরিষার কতি সমাদর ।  
হাবি ঋতুর প্রকৃতির শোভা বরিষার বরনে অরতা,  
লাংপালেও ক্ষেতি অর ফুল ফল ধরের হুদা পানিরকা ।  
পানি নায়া নার জীবন পানি নাইলে মরন,  
চাতকে উহানল খৌরাঙে ডাহের হুদা বরন ।  
বরিষা অইতে ডুল বায়েয়া আহের,  
দিন গুজুরের দৌ জ্বিলকার হাকহান মেঘলাই জাবদের ।  
কেরবং রকতারা গাতে গাতে,  
মাছর কতি হারৌ ইকাকায়া উজেইতারা ঘাটে ।  
সংসারে কিত্তাউ নার বরিষার পানি নাইলে,  
উহানল বরিষারে আদরে ডাকতারা হাবিয়ে ।  
বরনর পানিত হাবি জীব হারৌত নাসতারা,  
বরনে তিঙিয়া গাছ লতা পাতা ডেমার নুয়াতা ।  
বরিষাই শ্রেষ্ঠ ঋতু মাত্তারা হাবিয়ে,  
সৃষ্টি রক্ষা অর বরিষার বরনে ।  
ফুলর শোভা গাছর শোভা সমুদ্র সসাগরা হবা,  
হাবি পালর ঙালর বরিষার বরন পেয়া ।  
পৃথিবীর হাবি শোভা অর হুদা বরনর পানিরকা ।  
বরিষাই প্রাণ প্রকৃতির সৃষ্টির হাবিরকা ।



## কাম কর

কাম কর

কাম নাকরতারা উতাই লাহলা বুলতারা,  
লাহলা বাবু অয়া ডাঙর সাইতারা, কাম না করতারা,  
নুঙেইপা উগর জিরন নেই কাম, ক্ষেতি ব্যবসা কততা,  
তানু না দেখতারা।

যত করতেয় তত পেইতেয় অভাব নেই,  
ইনকামর পিছে আটতে দিন মাদান হের নেই।  
দুঃখী উগও পেটবুজে খার রোজি রোজগার করিয়া,  
দুঃখী লেইরা অভাবী, কাম করিয়া নুঙেই অইতারা।  
কামে ব্যায়াম, কামে ধন, কামে রূপা পয়সা,  
কামর পয়সাই হারৌ পিয়ম প্রেম বানা দয়া।  
কুরিয়া অয়া পথে বুললে কুঙগই য়াকরতাই,  
লাহলা সস্তা মানুরে কুঙগই সম্মান দিতায়।  
শিক্ষিত অ কাম কর হাবিরতা দেহিয়া,  
পশু পাখী জীব হাবিরয়ও খেইলতা বিসারতারা।  
জ্ঞানল চল, কাম কর, এহান জ্ঞানী মানুর কথা।

- ০ -

## মি জরম অইং বারো এজাতে

মি বারো জরম অইং এজাতে,  
এজাতর সংধর্ম ভজন, পুন্যকর্মর মাজে,  
সততার সংজ্ঞান মন্ত্রর মহান মঙ্গলর ফিরালর তলে  
উবা অইং গালয়া বিদ্যাধনে।  
এ পবিত্র তীর্থভূমি ভারত মাটিত আহিং জরম অয়া,  
মুনি ঋষি ভক্ত জ্ঞানী য়েপেয় জরম অয়া মরতারা আকপেয় যুগ যুগ গালয়া।  
নীতিজ্ঞান বিদ্যা উদার সততাই য়েপেয় ধর্মপ্রাণ,  
গৌরিয়া রীতিল পবিত্র গালছি য়েপেয় য়েপেয় থাছি,  
পালয়া বিষ্ণুপ্রিয়া মণিপুরী মহান।





## ইমা লক্ষণা

যেতার মাঙইলে সকাশকি নেই, বিধান রীতি কতি হবা,  
উহানল জিঙে ঠই হাবিতা পবিত্র থানা খানা ।  
চারিযুগর তীর্থ মন্দির যেপেয় যেপেয় পালছে,  
যেমাটিতঈশ্বর আয়া আয়া অবতার অছে ।  
ঔ জ্ঞান ধ্যান ল পূজার ধূপ বরতি দিং,  
সৃষ্টি কর্তার মন্দিরে মন্দিরে আরতি করিং ।  
হিনেয়া তুলসী সকয়া নামসা পিদিং  
কাঠি নুকুন গারে পরম বৈষ্ণব আচরনে,  
সংজ্ঞান নামাবলী উরিয়া ভজিং ঈশ্বর আরাধনে ।  
অন্যায় আচরণ যেপেয় নরক পাপ জ্ঞান,  
যেপেয় বিচার অর পাপ পুন্য তঙাল দুহান ।  
যেতাই নাকরতারা অন্যায় আচরণ,  
কতি মহান যেতার হৃদি মন,  
দয়া মায়া প্রেম বানা যেতার অন্তরে থায়া অর জ্ঞান ধন ।  
ঔ জাতর ইমার বানা আদরর উরে জরম অইং বারে বারে,  
জয়ধ্বনি দিং জয় ইমা বিষ্ণুপ্রিয়া মণিপুরী বুলিং লৌদে লৌদে ।  
কতি হবা ভক্তি নাসা, রাসলীলা,  
কতি হবা পালা, সংকীর্তন, শ্রাদ্ধ, কৃষ্ণলীলা ।  
দোওয়ার ডাকুলা হাবির কতি হবা ফিজেং রাসর পলেই জ্বকজ্বকা,  
কতি হবা কৃষ্টি যেতার জ্ঞান মহান সভ্যতা ।  
যে কৃষ্টি জাতর আর্য্যর মান,  
ভারতবাসী যে ভক্তিত হাবি মহান ।  
হিন্দুর হিন্দুস্থান যে মাটি অছে,  
মঙ্গলিয়ান, খৃষ্টান, মুসলমান তঙাল যেপেয় লেপছে ।  
যেতার ঈশ্বর ভক্তি ধ্যান মান আরাধনা,  
যেজাত বিষ্ণুপ্রিয়া মণিপুরী বৈষ্ণব পরম হিন্দুরমা ।  
ঔ বভ্রু, অর্জুন চিত্রাঙ্গদার মণিপুর  
ভারতে আছে মুঙে ইকরা মহাভারতে,  
ঔ জাতে জরম অইং জীবনে জীবনে মণিপуре ।  
মণিপুর মোর ইমা মাটি  
হস্তিনার হাবি আমার বপাবপি,



## ইমা লক্ষণা

পাণ্ডবর রকত বুজে ঙাল হাদি।  
ঔ জাতর ধর্ম কর্ম রীতি গৌরীয়া মহান কৃষ্টি হাবি আমারতা,  
আমার রাস, রাখুয়াল, কাং, লক্ষাকাণ্ড, রামায়ণ,  
জয়দেব আমার ভক্তি কৃষ্টির এলা।  
ভারতর আর্য্যই মণিপুরী, চিন থাইলেও মঙ্গলিয়ানে নাগই,  
উতাত আর্য্য বিষুপ্রিয়া মণিপুরী একথা ইতিহাসে মাতুই।  
বাকী মুসলমান খৃষ্টান জার জার ধর্ম কর্ম মন নমুনা রং তঙাল,  
ভজন শাস্ত্র জার জারতার জার জার জ্ঞান।  
কতি পবিত্র হিন্দুত শ্রেষ্ঠ বৈষ্ণব বিষুপ্রিয়া মণিপুরী,  
কতি উচ্চ মান যেতার কৃষ্টি।  
যেতার ফিরই তলফুতি ইনাফি আঙালুরি  
আঙেই ফেইচম খুঙেই কতি হবা,  
কতি চুওর লিকসই কাঠি খৌনানাকপি খারৌ বাজু কানবেরি জঙ্কা।  
ঔ জাতে জরম অইং জয় কৃষ্ণ বুলিয়া,  
বৃন্দাবন নবদ্বীপ পুরী তীর্থ ভক্তি করিং নিক্কা।  
ঔ ধর্মই ইমা বাবা বেইবুনি সাকেই গোত্র আমারতা,  
আমি আসল মণিপুরী ভারতরতা।  
যেতার ভক্তিত অর রাস শ্রাদ্ধ কীর্তন অধিবাস সংকীর্তন,  
যেতাল পবিত্র স্বর্গ জীবন মরন।  
যেতায় তরপন দিতারা গয়াত পিতৃ উদ্ধাররকা,  
পিতৃর অস্থি গারে বাদ্দিয়া, তীর্থ কয়ইতারা  
গয়াত বেলতারা, তরপন দিতারা।  
যেতাই ইমা বাবার ঋন উসাদে হুসতারা,  
পিতৃর ভক্তিত জয়গান নিক্কা গেইতারা।  
ঔ ভক্তি স্মৃতিরকা জরম অইং মণিপুরে  
বিষুপ্রিয়া মণিপুরী অয়া,  
গেইমতা পৃথিবীত মোর জাতর এলা।  
উহানল ধন্য মি জরম অয়া এ জাতে,  
কৃষ্ণগুন গাউরী কতি ভক্তির মাজে।  
হুদা বিদ্বান অয়া সৎকর্মত সৎজ্ঞানল পালনা মনাউরী,



## ইমা লক্ষণা

আমার ধর্ম কর্ম কৃষ্টিল জয়ধ্বনি দউরী।  
এহানে মোর স্বর্গর চিন্তা ভাবনা ভক্তি আরাধনা,  
এ মহাজ্ঞান মোর জীবনর তপস্যা।  
উহানল জরম অইং এ জাতে এ পুন্য জ্ঞানরমা,  
জয়ধ্বনি দিং বিদ্যা জ্ঞানল পালয়া।  
জয় ইমা বিষ্ণুপ্রিয়া মণিপুরী বুলিং  
হাবিরে ছেনেয়া এ পৃথিবীরমা,  
ঈশ্বরর কুপাল গালয়া গালয়া।  
এহানে সাধন ভজন আন্দোলন অক জীবনে জীবনে,  
ইমার গুন গেয়া ধন্য অইং জনমে জনমে।  
দেশে দেশে ইমার গুন গেইং মঙ্গলর ফিরাল ধরিয়া,  
জনমে জনমে মি না পাছরিং এ কথা।  
সত্যর সৎ পথে আটে আটে থাইং সমাজর হাবিরেল,  
জীবন জীবন এ জ্ঞান অক হাবির লগে থাইং হারৌল।  
যেতার বেয়াপায় খাংচেৎ বাদ্দিয়া বালা আটিয়া ধান রুয়েইতারা হেইচিং অয়া,  
হারৌত এলা দিয়া ধান কাপতারা করেই চিধু ফলাল খেচুরি খেয়া খেয়া।  
সৌ মানু অকা বুলিয়া লেরিক তামকরুয়েইতারা ঘরে ঘরে,  
যেতার মনর চিন্তা নিয়াম গজে।  
শিক্ষিত অয়া বেয়াপাউ চাকুরি করতারা সাহসল উকিল অইতারা,  
বেয়াপা মুনি চপপ মান্না উচ্চ শিক্ষাল গালনা মনেইতারা।  
গুরু মইষ পালতারা, আল ধরতারা,  
ক্ষেতি করতারা ধান রুয়েইতারা।  
ঘর দোওয়ার হংকরিয়া হবা অয়া থানা মনেইতারা,  
এ চিন্তা খৌরাং আশা, পালনা গালনার  
আন্দোলন করতারা বীর বীরাঙ্গনা।  
ঔ জ্ঞান গুণ মি নিয়াম হবা পাউরী,  
উহানল বারে বারে এ জাতে জরম অনা মনাউরী।  
এ আশাল সমাজ সেবা করিং নিক্কা,  
সমাজর কথা ধর্ম কর্মল লেরিক ইকরিং ভক্তিরমা,  
প্রভুয়ে পুরাদক এখৌরাং আশা মাগৌরি বারে বারে হমাদিয়া।





## ইমা লক্ষণা

### হবা সৌ হংকর

হবা সৌ হংকর হিকেই সৎজ্ঞান বিদ্যা,  
সৎজন বিদ্বান গুণী অয়া নুকুলকা।  
জাতর সুসন্তান অকা দেশর সুনাগরিক হংকর,  
সৎ উপদেশ দেই আদরে যত্ন কর।  
ডাক্তার ইঞ্জিনিয়ার, মাষ্টার বারিস্টার শিক্ষাল অকা,  
সৎজ্ঞান হাবি গুণর শিক্ষা পাকা।  
গাছে ধরের যেসাদে ঠুম ফল বুজে,  
খেইতারা হাবিয়ে, শ্রেষ্ঠ মানু অকা জ্ঞানর জগতে।  
সৎজন বিদ্বান অইলে জাতর দেশর উন্নতি অইতয়,  
হিংসা পাপ অনাচার কুকর্ম সুপ নেয়ইতয়।  
মন হবা পবিত্র সরল জ্ঞানী গুণী অকা,  
সৎজ্ঞান প্রেমল জাত দেশ ভালকরকা।  
দেশর হাবির দরকার লেইরা বরা হবা সৌ হংকরানি,  
হবা সৌ সৎ সাহসী নাগরিক অইলে পালইতই সুখ শান্তি।  
এ খৌরাং হাদিত থয়া হাবিয়ে সৌওরে হংকরকা হবা জ্ঞান দিয়া,  
আকগউ বাদ না যেইবাগাতা হবা জ্ঞান পানা।  
উদিন হাবির জয় অইতয় দুঃখ নেয়ইতয় পৃথিবীত,  
প্রেম বানা হারৌ পালইতয় হাবির হাদিত।  
উবাকা অইতয় হাবির মঙ্গল, দুঃখ নেয়ইতয় জগতে,  
কতি আনন্দ পৃথিবীত অইতয়,  
প্রেম বানা আদর নিং জাগিয়া হাবির অন্তরে।

- ০ -

### দেশ সেবা

দেশ সেবা মানুর সেবা মহতে করতারা,  
কত রূপার খরচ হীন জারিয়া ভোটে উবা অইতারা।  
আকতাই বেবসা করিয়া রূপা জমেয়া দুঃখীরে দান করতারা,  
অন্তরে মানুর সেবা, দেশ সাজেইতারা দেশর দুঃখ নেয়নারকা।  
পানির পহরি কল স্কুল কলেজ হাবি হংকরতারা,  
পথ গাড়ী বৈদ্যুতিক লাইট হাবির সুবিধা করতারা।



## ইমা লক্ষণা

আকতাই ডাক্তার অয়া চিকিৎসা করতারা হারৌয়ে,  
দুঃখী বুলিয়া হেলা না করতারা পবিত্র মনে ।  
শিক্ষক অয়া শিক্ষা দিতারা, দেশর নাগরিক হবা অকা বুলিয়া,  
আকতাই সৈনিক অয়া দেশ রক্ষা করতারা ।  
দেশর মঙ্গল অক মনেইতারা কাম করতারা হারৌয়ে,  
অফিসে কাম করতারা দেশর উন্নতির কাজে ।  
শিল্প ক্ষেতি ব্যবসা করতারা, দুঃখীরে দান করতারা,  
দুঃখীরে দান করিয়া মহৎ কাম নিংকরতারা ।  
হাবি দেশবাসী দেশর নাগরিক হারৌ অইতারা দেশর মঙ্গলে,  
একিনে কাম কাজ করতারা সংবিধান যেসাদে ।  
সুখী দুঃখী হাবি মান্না, দয়া মায়া আকতা,  
দেশে দুঃখ নেয়ইলে হাবিয়ে হারৌ অইতারা ।  
ঔ দেশে নেয়ইতারা দুঃখী হাবিয়ে উন্নতি করতারা,  
পৃথিবী শ্রেষ্ঠ ঔ দেশে অর যেপেয় দেশ সেবা করতারা এক অয়া ।

- ০ -

## বারো মাহার উৎসব

বৈশাখে বিষু লামর দৌ হমাদেনা,  
নুয়া বসরর হারৌ দশপচিশ, গিল্লা খেলা, সেংকমর ক্ষির খানা ।  
জেঠমাহাত জেঠাজেঠির বিয়া নার, আষারে কাং নয়দিন উৎসব,  
খেচুরির পালি ফিরাকাং পেয়া ।  
হাওনে বুলন মন্দিরে রাধা কৃষ্ণর জুলন পাচদিন পেয়া কতি হারৌ,  
ভাদ্রত কৃষ্ণজন্ম নন্দ উৎসব রাধা অষ্টমী ক্ষেতি লয়নির হারৌ কতিয়উ ।  
আশ্বিনে মহালয়া পূজা পিতৃ তরপন দিবস, হারৌ কততা,  
জিরন নেই নিমন্ত্রণ রাস, লক্ষী পূজা ।  
কার্তিকে গোবর্দ্ধন, হরিউত্থান, ফিরাল, কাপকর পালি, লেরিক থিকরানি,  
আগ্রনে দওয়া ধান কাপানি, মারা চানৌ ধান বরানি ।  
পৌষে সংক্রান্তি, তিলুয়া বাতাসা, উটুং চাক, কত আঠুমপা খানা,  
মাঘত শ্রীপঞ্চমী, সরস্বতী পূজা ছাত্রর হারৌ কততা ।  
ফাল্গুনে মহাপ্রভু জন্ম ফাগুয়া রং খেলা ।  
চৈত্রত লামর দৌ মহাদেব হমাদেনা,  
মাগতারা নুয়া বসরর শুভকামনা ।



## মানু শ্রেষ্ঠ

বানা প্রেম শ্রদ্ধা সততা নিং এতা মানুর গুন, মানুরাং আছেতা,  
মানুর মধুর প্রেম আর কোনতারাং নেই,  
উহানেই মানু শ্রেষ্ঠ সৃষ্টির জীবরমা।  
মানুর গুন জ্ঞান বিদ্যা পালয়া জীবন গুলর,  
এতা গুণল গুলয়া মানু সৃষ্টি উজ্জ্বল অর।  
চরিত বেবার আদর মানুরাং আছেতা,  
অতিথি সেবা শ্রদ্ধা ভক্তি এতা মানুরতা।  
মানুয়ে নুয়ারিল কাম নেই জগতরমা,  
মানুরতা ঠই জ্ঞান বুদ্ধি বিবেক চিন্তা।  
মানুর গুনে গুলছে পৃথিবী সাজেয়া সহরে সহরে,  
মানুয়ে হংকরেছি গাড়ী রেল মটর  
জাহাজ আকাশ গাড়ী চলের দেশে দেশে।  
বিজ্ঞানল কত আবিষ্কার করলা সীমানেই উতা,  
গ্রহ উপগ্রহতগেলাগা, নেই নুয়ারিলতা।  
মানুয়ে ধার্মিক অয়া ভক্তি দান ধর্ম পুন্য করতারা,  
কোনগ বিপদে পরলে দয়াল উদ্ধার করতারা।  
মানুয়ে হাবি হারপেইতারা নিজে জ্ঞান করিয়া,  
মানুর কারনে গুলর শ্রেষ্ঠ গুন জ্ঞান মর্যাদা।  
মহৎ কাম করিয়া দেহেইতারা শ্রেষ্ঠ মানবতা,  
সংধর্মল পালইতারা মানু পরম ধার্মিক অয়া।  
উহানল সৃষ্টির জীবত মানু শ্রেষ্ঠ অছিতা,  
স্কুল কলেজ ইউনিভার্সিটি হংকরেছি মানুরে পরম জ্ঞান দেনারকা।  
কতি মহৎ চিন্তা কতি মহৎ হৃদি মানুরতা,  
বিদ্যা গুনে জ্ঞানে মহৎ গুল উহানল মানু শ্রেষ্ঠ হাবি জীবরমা।  
এতা গুন জ্ঞান নেই পাহিয়া পলি জীব হাবিররাং,  
তানু হারনাপেইতারা স্নেহ বানা আদর যতন নিং কতিহান।  
উহানল শ্রেষ্ঠ অনার গুন নেই তানুরতা,  
গুনল প্রেম বানার ঔ শিক্ষাল মানু জীবত শ্রেষ্ঠ অছিতা।





## ইমা লক্ষণা

### মধুর বৃন্দাবন

গোলুকপতি বিষ্ণুই শ্রীকৃষ্ণ দ্বাপরে তার বাল্যলীলা ভূমি ব্রজ বৃন্দাবন,  
নন্দরাজার ঘরে পরম আদরে ডাঙর অইল উহানল নন্দর নন্দন।  
বিভূর অয়া ব্রজর মানু জীব বানাপেইতারা,  
নওয়াং করের খেলার হারৌ হারৌ অয়া।  
রাহাল অয়া গুরু রাখল কৃষ্ণ বৃন্দাবনে,  
বাশী বাজেয়া নয় লক্ষ গুরু ফিরেইল আইলা কৃষ্ণর ডাকে।  
ননী চরকরল ব্রজবাসীর ঘরে মোরতা বুলিয়া,  
নন্দরানীয়ে কিলেইতে বিশ্বরূপ দেহেইল থতাহান মেলেয়া।  
জগৎ ঈশ্বর লীলারকা আহেছে বুলল গর্গ মুনিয়ে,  
মোহিত অইতারা হাবি মোহিনী রূপ দেখলে।  
হিষ্ণাপা পুতানা অকাসুর বকাসুর তৃনাবর্জরে মারল, সৃষ্টির শান্তির কাজে,  
বৃন্দাবনে অসুর বিনাস করল এসাদে।  
জীবরে প্রেম মায়া হিকেইল রাধারে প্রেম করিয়া,  
সখীর লগে রাসলীলা করল মধুর প্রেমরমা।  
মধুর সুরে বাশীগ রহেইলে আইলা সখি হাবি,  
বাশীর রৌ হনলে থানা নুয়ারতারা ঘরে কতি মধুর বংশীধ্বনি।  
সাতগ কানে সাত নমুনা রহের, হনতারা তঙাল তঙাল ভাবে,  
তঙাল তঙাল নাং ধরিয়া ডাহের বয়া তমালজারে।  
তালবন তমালবন নিকুঞ্জ কানন পুলিন বন  
কেশিঘাট, বংশীবট হাবি যমুনার পারে,  
পরম জ্ঞান দেনারকা বস্ত্রহরন করল সখিরে,  
কিতার লাজ বুলল মোরতা মোরাং সমর্পিতে।  
নাসিয়া রাসে মধুর প্রেমে রাধার লগে মিলন অর,  
হাবি সমর্পিয়া ভজতারা সখি, কতি মধুর প্রেম মিলনর।  
হাবি সখির খৌরাঙে হাবির মিলনে একগোপী এক শ্যাম করল,  
কৃষ্ণলীলার এ মধুর প্রেম করল সখি ভক্তরেল।  
নবলক্ষ গুরু ব্রহ্মাই লুকেইলে,



## ইমা লক্ষণা

হাবি হংকরিয়া রং মিলেয়া দিল রাহালে কাদতে,  
ইন্দ্রই বৌবরন বজ্র বেলতে গিরিগোবর্দন তুলিয়া রক্ষা করল রাহালরে।  
ইশ্বরে এসাদে মধুর লীলা করে হারপাছিল মহাদেব,  
ধ্যানে পিছে হারপেইলা ব্রহ্মা ইন্দ্রদেব।  
বিভুর রাহাল সখি হাবি মধুর কৃষ্ণ সঙ্গ পেয়া,  
জগতে নেই যেহানর উপমা অপরূপ অপরূপ মধুর কৃষ্ণলীলা।  
দেহিয়া ধন্য ব্রজবাসী, পাহিয়া পলি জীব হাবি,  
গাছে গাছে ফুল ফল ধরিয়া ধন্য, সেংকম দিয়া ধন্য সুরবি গুরু হাবি।  
ভক্ত অয়া জরম অছি কত মুনি ঋষি মানু মাতারা জয় মধুর কৃষ্ণলীলা,  
রাধার কতি ভক্তি প্রেম অভিরাম দিন রাতি নেই আর জীবরমা।  
সখিয়ে রাশে যুগল মিলন দিয়া কতি হারৌ অন্তরে,  
রাধা কৃষ্ণর মধুর মিলন দিলা নিকুঞ্জ মন্দিরে।  
হারৌত স্বর্গর দৌওয়ে ফুলর বরন বেললা,  
মলয়া পবন বহের হারৌরমা।  
ফুলে ফুলে গত গঙালার নুংশি,  
ছয় ঋতু বসন্ত বহের দিনরাতি।  
বিয়ান মাদান নিক্কা,  
কোকিল রকতারা সুকসারী কৃষ্ণনাম জপতারা।  
সখির পলেই পচুয়াল খওয়াল চুরা চুওর কতি হবা,  
কৃষ্ণর ধরা চুড়া ফেইচম বিজুরী কতি লকলকা।  
জয় রাধা জয় কৃষ্ণ মাতারা হাবিয়ে,  
কৃষ্ণলীলা কতি মধুর ঠুম ভক্তর ভক্তির মাজে।  
ধন্য ভক্ত জীব গাছ লতা, ধন্য হাবির ভক্তি  
মন্দিরে মন্দিরে কতি হবা ভক্তি ভজন মন,  
রাধাকুণ্ড শ্যামকুণ্ড গিরিগোবর্দন,  
ধন্য ধন্য কৃষ্ণ লীলা ধন্য ধন্য মধুর বৃন্দাবন।  
হমাদের নরেন একিন অয়া মন।



## ইমা লক্ষণা

### পূজা

কিতাল পূজা দিতু প্রভু কিন্ডাউ নেই মোরতা,  
ফুল ফল গাছ লতা হাব্বিয়উ তোরতা।  
ধন সম্পত্তি হুনা মনি মুক্তা তোরতা হাব্বি,  
জগতর হাব্বি তোর সৃষ্টি।  
মোরতা বুলিয়া কিতা আছে, কিতাল দিতু পূজা, মোরতা নেই আকতা,  
দেহ মন জীবন আহি কান হাব্বি তি দেহততা।  
তোরতা তোরাং দিয়া কিতা অইতয় মোর পুন্য,  
এহদি মন দিয়া পূজাত কিতা অইতয় ধন্য।  
হুদা হাদির নিং ভক্তি এতা মোরতা,  
উদালা একিন হমা ল হারৌ অয়া।  
উতাও তোর দুনিয়াত তি দেহততা,  
আরাকও পানার কত লোভে দোষ অর,  
তোরতা খেয়াই থানা অর ভবে, দোষ হাব্বি ক্ষেমা কর।  
হমাদউরী চরণে তোর, তি দর জীবন, তি দর মরন,  
হাব্বি গাছ লতা তি সৃষ্টি করর তি দর হাব্বির জীবন।  
তি হাব্বি বুলিয়া তোরে হমাদউরী,  
রাতি দিন প্রভু তোর নাম জপৌরি।  
ভক্তির ধূপ বরতি লদে কাদকরতে চরণে,  
হাব্বি ক্ষেমা করিছ অজ্ঞান নিঙে।  
জনম জনম দাসী অইং চরণে প্রভুর কৃপা গুণে।

- ০ -

### হবা কাম কর

তি হবা কাম কর, তোরে হবা বুলতাই,  
হাব্বিরে বানা পা, হাব্বিয়ে তোরে বানাপেইতায়।  
শান্তি কাম যদি করর, শান্তি অয়া থাইতেয়,  
জেল ফাশী যত শান্তি তি উতা পেইতেয়।  
হবা হবা কাম কর, হবা উহান মনা,  
হবা কামর আনন্দ করিয়া হারপা।  
হবা কামর গজে জগতে ধন নেই,





## ইমা লক্ষণা

হবা কামর হবা ফল — করলে হারপেইতেয় ।  
হাবিয়ে হবা অইলে জগতে কতি হবা অইতয়,  
হবা কথা টটরা হবা বেবার দেহা,  
মধুর ব্যবহারে হাবিয়ে সলকরবাতা ।  
হাবিয়ে হবা অইলে জগতে কতি হবা অইতয়,  
হাবিয়ে হবা কাম করলে দুঃখ নেয়ইতয় ।  
হাবিয়ে হবা মন অইলে ধনে মানে কতি হারৌ অইতয়,  
জগতে শান্তি কাম দুঃখ আর নেয়ইতয় ।  
কতি হারৌ জগতে পালইতয় ।

- ০ -

## আসাম

আমার আসাম কতি হবা প্রকৃতির সাজে,  
মেঘলাই বরন পাহিয়া পরের টেঙারা থল বুজে ।  
গাছে গাছে কতি হবা ফুল ফল ধরের,  
ক্ষেতির ফসলে বেমলবেঠা চারিবেদে ফলের ।  
হু হু বৌ দেব কতি হারৌ কাম করতে,  
প্রকৃতি রানীগ পারা কতি হবা চেইতে ।  
ছয় ঋতুর ছয় নমুনা বরিষা লাংপাল খেই খেই অয়া,  
বহু জাতর মানু থাইতারা প্রেমে টেঙারা থল বুজিয়া ।  
জিলাই জিলাই সহর গাং গালইল জুরক জুরক করের,  
দিসপুরে রাজধানী কতি হবা জ্বলকের ।  
স্কুল কলেজ বিশ্ববিদ্যালয় বুজে শিক্ষারকা,  
বরাক ব্রহ্মপুত্র কত নদী বুজে কত আছে টেঙারা ।  
কত জীব দেহানিরকা আছে চিরিয়াখানা কাজিরাজা,  
হাবি জাতর জীব আছি হারৌ হারৌ অয়া ।  
প্রকৃতিত আসাম কতি হবা প্রকৃতির রানী,  
কত লেখকর কলমে ইকরা আছে, আসামর কত যারী ।  
বরন খুওয়ার দৃশ্য কতি চেইতে হবা,  
ইকরিয়া লইনাইতয় আমার আসামর কথা ।  
ভারতর নানা সম্পদ খনিজ বুজে,  
এসাদে স্বয়ং সম্পূর্ণ রাজ্য নেই ভারতে ।

- ০ -



## ইমা লক্ষণা

### ইমা লদে শ্রীকৃষ্ণ

হমাদেউরী প্রভু শ্রীকৃষ্ণ তোর চরণে,  
কৃপা করিছ তি, বানাপেয়া মোরে ।  
রক্ষা করিছ প্রভু বিপদ মোরতা আইলে,  
তোর কৃপায় হারৌত থাইং এ জীবনে ।  
মঙ্গল করেদিছ মোর হাবি কাম,  
ভিগ্নই না থেৎকরক মোর কাকেইহান ।  
কুকর্ম পরহিংসা ক্ষতি উতা মি নাকরিং,  
সৎ কর্ম বিদ্যা জ্ঞান গুনল সৎ ধর্মত মরিং ।  
সৎজ্ঞানর এ আশা পুরেইছ প্রভু মাগৌরী তোরাং,  
পানারকা ঈশ্বররাং এ ভিক্ষাহান ।  
প্রেম বানা দয়া মায়াত এ জীবন কাটেইং মাতৌরী প্রভুরে,  
তোর কৃপাল লাল পারিং জীবনর কাকেয়ে কাকেয়ে ।  
অন্তরর ভক্তিল তোর নাম লইং নিক্কা নিক্কা,  
মন্দিরে গিয়া আরতি করিং প্রভুরে হমাদিয়া ।  
এসাদে লয়ক জনম সৎজ্ঞানর মিঙালে,  
পুন্যত জরম অইমতা পরজনমে ।

- ০ -

### মি মনাউরী

মি মনাউরী ফুলর জীবন,  
মি মনাউরী মহৎ জ্ঞানীর মন ।  
বিদ্বান অনা মনাউরী,  
সৎজ্ঞান দয়া মায়া হবাপাউরী ।  
দুঃখীরে দয়া করানি খৌরাং,  
হাবির লগে হারৌত থানা মনার মনহান ।  
কাম করতৌ সুখী অইতৌ,  
চিরজীবন কামল হারৌত থাইতৌ ।  
কর্মই জাগার হারৌর জীবন,  
ফুলর ডেকি হারৌ করতৌ হাবির মন ।

- ০ -



## ইমা লক্ষণা

### ভারত ইমা

জয় ভারত ইমা, জয় ভারত ইমা, হাবি ইমার গজে তি,  
জগতর গিরক জগত ঈশ্বর অবতার অর তোরাং পবিত্র ইমা তি।  
জগতর হাবিয়ে তোরে ধন্য ইমা বুলতারা,  
অবতার অয়া জগত ঈশ্বর করেছে কত লীলা।  
ইমা বুলিয়া তোরে গুণ গেইতারা ভারতবাসী,  
হিন্দু মুসলমান খৃষ্টান বৌদ্ধ তোরাং আকতা অছি।  
কত জাতর মানু হাবি ধর্মত আকতা অয়া আছি,  
হাবি জাতর হাবি ঠার তঙাল তেব তিলয়া আছি।  
বিদ্যা গুণে জ্ঞানী অয়া তোরে গুণ গেইতারা,  
ছয় ঋতু বিরাজ প্রকৃতি পূর্ণ তি কতি হবা।  
পবিত্র নদী পবিত্র টেঙারা তোরাং পালছি,  
পবিত্র মনর সংজন সাধু সন্ন্যাসী মুনিঋষি হাবি তোরাং আছি।  
শয্য শ্যামলা ক্ষেতির শোভা তোরাং কতি অর হবা,  
সুখ শান্তিত সং অয়া থানা ইমা তোরে কথা।  
তোরে সংবিধানে হাবি মান্না হাবির মঙ্গল ইকরেছি,  
ঔ পথ ইলয়া তোরে ইমা বুলিয়া হাবিয়ে চলেছি।  
আকবেদে টেঙারা থল আকগদে সাগর বুকুত ইমা তি থাছত,  
সংধর্মর জয়ধ্বনিল পবিত্রতার গুণে গুলয়া আছত।  
হে তীর্থময়ী ইমা লদে লদে হমা নিঙে তোরে আদরর জিপুত হাবি,  
বর দে বর দে শান্তিত থাকা তোরে গুণে অয়া জ্ঞানী।  
তোরাং বিরাজ দৌ তেত্রিশ কোটি জগৎ ঈশ্বর কৃষ্ণ,  
তোরাং আয়া দশঅবতার অছে ঈশ্বর আকখুলাগ।  
দয়া মায়া প্রেম হাবিরে হিকেইল ভারতে অবতার অয়া,  
উহানল জীবনে মরনে হাবিয়ে তোরে গুণ গেইতারা।  
তোরাং বারে বারে জরম অনা হাবিয়ে মনেইতারা,  
ধন্য ভারত স্বর্গত্ব শ্রেষ্ঠ তোরে হাবিয়ে মান্তারা।  
তোরে উপমা দিলতা নেই, এমাটিক হবা পরলেই,  
হাবিয়ে ধন্য বুলতারা ভারতে জরম অইলেই।





## ইমা লক্ষণা

### শহীদ সুদেষণ

শহীদ হাবিগই নাইতারা,  
শহীদ অনা পরম ভাগ্যর কথা,  
তি পারলে সুদেষণ কতি তোর ভাগ্য হবা।  
মরিয়া নামরিল খাতাত তোর নাং ইকরলে,  
পৃথিবীর হাবি শহিদর লগে তিও উবা অয়া থাইলে।  
হাবি ছাত্র হাবি সমাজর মানু তোরে নিংশিং অইতারা,  
১৬ই মার্চ আইলে তোর বেদিত গিয়া ফুল ধূপ বরতি দিতারা।  
স্মৃতিরকা ঘরে ঘরে মাংকলে তোর ছবি টাঙেছি,  
কত লেখকে তোর কবিতা এলা রচেছি।  
ছাত্রর বিষ্ণুপ্রিয়া মণিপুরী ঠারর রেল বন্ধ আন্দোলনে পুলিশর গুলিত জীবন দিলে,  
উহানল চিরজীবন যুগ যুগ নিংশিং অইতারা তোরে।  
শ্রদ্ধাল তোর বেদি ফামে ফামে হংকরেছি,  
দেখলে হাবিয়ে করতারা শ্রদ্ধা ভক্তি।  
অমর অয়া আছত হাবির হাদিত উহানল ধন্য ধন্য তি।।  
চিরদিন সমাজে পালইতয় তোর স্মৃতি।

- ০ -

### হাবি বেলিয়ে করেৱতা

বেলি গিরকে রইদদের গুলকরের হাবিরে,  
তার রইদে বরণ আনের হৌপাত ক্ষেতি অর  
বুজে গাঙে গাঙে।  
বরণ পেইলে আলুয়াই প্রভুরে হমাদিতারা,  
প্রভু তোর কৃপায় পেইলাং বরণ, কতি প্রভুর দয়া।  
হীনপেয়া ক্ষেতি করিয়া ফসল পেইতারা বুজে,  
যেসাদে কাম উসাদে ফল দেৱ প্রভুয়ে।  
রইদ বরণ বৌ ঠিক আইলে নুয়ারা পানি নার,  
কাম করিয়া খানাই অর হারৌর সংসার।

- ০ -



## ভারত মোর জন্মভূমি

ভারত মোর ইমা মাটি, ভারত মোর জন্মভূমি,  
ইমা বুলিয়া নিক্কা হমাদউরী।  
যেহানর কতি হবা রাজ্য সাজেয়া থছি,  
যেহানর কতি হবা রাজধানী।  
যেহানরে তীর্থ নিঙে দরশন হাবিয়ে মনেইতারা,  
নিজর ক্ষেতি শিল্প বেবসাল উন্নতি করতারা।  
বিল আউর টেঙারা নদী সাগর সমুদ্র আছে,  
প্রকৃতির শোভাই ভারত ইঙাল ঙালছে।  
বহুজাত বহু ধর্মর মানু হারৌত আছি,  
হাবি ধর্মরে শ্রদ্ধা করতারা হাবি ভারতবাসী।  
হিংসা নিন্দা পাপ নিংকরতারা হাবিয়ে,  
সৎ ধর্মত মরানি মনেইতারা ভারতে।  
যার যার জাতর ফিরই বেশ তঙাল,  
যার যার বেশে জ্ঞানে হাবি মহান।  
মহত্বতাই ভারতর মানবতার যারী,  
উহানল ঙাল পবিত্র তীর্থ ভারতমাটি।  
পৃথিবীর হাবিয়ে সমাদর করতারা,  
এহানেই ভারতবাসীর মহৎ চিন্তা।  
বিদ্যা বুদ্ধি জ্ঞানে ভারতে থানা মনেইতারা,  
সৎধর্মত মহৎ জীবন অক হাবিয়ে খৌরাং অইতারা।  
ভারতর উন্নতির এলা নিক্কা গেইতারা,  
ভারত ইঙাল ঙালয়া পালক উহানল হাবিয়ে সাজেইতারা।  
পত্র পত্রিকা লেরিকে একথা ইকরতারা লেখকে,  
মহতর কত ছবি ইকরিয়া টাংতারা দেওয়ালে।  
উহানল ভারতর কথা হাবিয়ে হারপাছি,  
রামায়ণ মহাভারত গীতা ধর্মর পুন্য লেরিক পাকরে পারেছি।  
উহানল ভারতে মরলে বারো জরম অনা মনেইতারা,  
ভারত পুন্য মাটিরে ভারতবাসীয়ে ইমা বুলিয়া হমাদিতারা।  
ভারত অক মোর জনম জনমর ইমা ॥



## ইমা লক্ষণা

### গুরু দ্রোনাচার্য্যর কথা

দ্রোনাচার্য্যই মাতের ছন হে কর্ণ বীর মোর শিষ্য অর্জুনর গজে কোনগউ বীর নেই,  
অর্জুন মোর প্রিয় শিষ্য বীর যুদ্ধা, তারে জিঙিলতা নেই।  
মোর হাবি বিদ্যা হিকিয়াও অর্জুন স্বর্গতউ শিক্ষা করলগা,  
বীরর যুদ্ধর হাবি গুন হিকেছে, নেই তা না জানেতা।  
নিংশিং অ কর্ণ বিরাট রাজ্যত যুদ্ধ করতে  
তি মি বীর মহাবীর আমি হাবি অর্জুনরাং পরাজিত অছিলাং,  
অর্জুনে উদিন না মারতে আমারে কুরুক্ষেত্র আয়া পেইলাং।  
মারলইছতে নেয়ইলইছ তোর এ গরীমার কথা,  
তোর এ অহঙ্কার মাঙইলইছ চিকিয়া।  
তি কিহনাত নাপ্পাল কররগ,  
গুন বিদ্যা গুরু ভক্তি হাবিত অর্জুন পারদর্শিগ।  
অন্তরর নিং ভক্তি দয়া মায়া কোনতা ও কম নাগই তারতা,  
জেঠা বেয়ক ধর্ম যুধিষ্ঠীরর কথার বাহিরে না চলানি তার প্রতিজ্ঞা।  
স্বর্গ মর্ত পাতাল ত্রিভুবন হাবি তা দেহেছে,  
ও অর্জুনর কথা আর কিতা মাত্তু তোরে।  
লাজর কথা তি অভিমূন্যরে জিংলে অন্যায় যুদ্ধ করিয়া,  
রথর চাকা তুলিয়া মারলে পিঠিয়েদে বারেয়া।  
মুঙেদে অইলে বীর অভিমূন্য পরাজয় নাইলইছ তোরাং,  
ব্যুত বেরিয়া হাবিয়ে মারলাই তোর কিহান বীরত্বহান।  
না খালকরর কতিহান কার কতি পাঙ্কাল,  
পাঙ্কাল্লা অভিমূন্যই না হারপাছে ছদ্দা বুত্ব নুকুলানি কিহান।  
নাইলে অভিমূন্য দ্বিতীয় অর্জুন বুলতারাগ তারে,  
উহানল তি নাপ্পাল নাকরি ধ্রোন বিশ্বরে ইলেইলেয়করে।  
কারে তি জয় করেছত ধর্মর যুদ্ধ করিয়া,  
অন্যায় যুদ্ধত জয় অইলেও বীরত্ব নাগই বুলতারা।  
কুরুক্ষেত্র যুদ্ধত কিহান তোর বীরত্ব দেখলা যুদ্ধা হাবিয়ে,  
অর্জুন ভীম পঞ্চপাণ্ডব হাবিয়উ যুদ্ধ করলা নিজর নিজর জ্ঞানে।  
তি না আংকরিয়া না খালকরিয়া নিজর বেইবুনি মারতে করলে প্রতিজ্ঞা,  
উহান কি বীরর চরিত্র তি খালকরিয়া চা।





## ইমা লক্ষণা

কুস্তির হৃদির ভিতরর জ্বালা হারনাপেইলে কিহান কিহান,  
ইমার ধর্ম ইমা অনা, তি বেয়াপাগ নাগই, কিসাদে হারপেইতে উহান।  
বেইবুনির ভিতরে এ হিংসার যুদ্ধ বিরাট গাছজার অইল,  
কুরুক্ষেত্রের যুদ্ধ চলেছে কিহানাত লয়ইতই কারৌ জ্ঞানে এব না লেপইল।  
নরেনে মাতের মহাভারতর এ পাপ পুন্য সত্য বিচারর যারী হুনিল মাহেই নারগা,  
হুনিলে পুণ্যবান অইতারা এহান কাশীরামর কথা।  
উহানল এ যারী সঞ্জয়ে পরীক্ষীতরে পুন্যরকা পাকরিয়া হুনারতা।

- ০ -

## আগুয়া

যেসাদে জীবনর দিন, আকদিন আকদিন আগুয়েয়া লয়র,  
তিও আগুয়া সাহস হিম্মদ পাক্কাল লগে আছে তোর।  
আহি আছে আত জাং আছে তোরতা,  
জীবনর হাবি কামে তি আগুয়া।  
বিদ্যা জ্ঞান গুন পুলকর আগে,  
ভিগ্নত হিম্মত নাহারেয় না আলইয় পিছে।  
আকতাই ডাক্তার, ইঞ্জিনিয়ার, বিদ্বান, বৈজ্ঞানিক অইতারা,  
বিদ্যার সিংনা জগতে চলের মানুরতা।  
আকতাই বিপ্লব আন্দোলন করতারা উন্নতিরকা জীবনে,  
ধন গুনল পালনা ঙালনারকা চেষ্টা করতারা এ হারৌর জগতে।  
আকতাই খ্যাতিল অমর থানারকা কত জ্ঞানর লেরিক ইকরতারা,  
আকতাই জাতর দেশর সেবা করিয়া জীবন কাটেইতারা।  
পুন্যরকা দান দহিনা, তীর্থ ভ্রমণ করতারা ভজতারা নিক্কাদিনে,  
হাবিয়উ জীবনে উন্নতি করতারা, পারতারা একিনে কাম করলে।  
হাবি বিদ্বান গুনী এসাদে ঙালছি জীবনে,  
কত শিক্ষাবিদ গুনী মানী ঙালছি পালছি বিদ্যা গুনে মানে।  
হাবিয়ে গেছিগা এপথ ইলয়া,  
এহানেই নীতির মূল কথাহান হাবিয়ে পাকরিয়া হুনিয়া এ যারি হারপেইতারা।  
এসাদে গুনীয়ে গুনীর স্মৃতির যারী দিতারা,  
যেতাই জীবনে উন্নতিল আগুয়েয়া গেছিলা।

- ০ -



## তি দুঃখ নাকরি

তি মনুষ্য জ্ঞানী জীবগ  
হতাশ নাই দুঃখরমা,  
বিভুর নাই মায়াত পরিয়া, এহান জ্ঞানর কথা।  
জ্ঞানীয়ে হারপেইতারা কাম করিয়া খানা,  
হাবি জীবও বিসারেয়া খেয়া থাইতারা।  
ধনর লোভে পাগল নাই ধন পেয়া বিভূলা নাই,  
খেইলে লয়র ভাণ্ডার, মরলে লয়র জীবন,  
উহানল সর্বত্যাগী সাধু সৎজন উতাই।  
জ্ঞানল কাম কর জ্ঞানল চল নিক্কা,  
এহান সৎজন জ্ঞানীর চিন্তা।  
লোভর দলান, গাড়ী অগাদ ধন সম্পত্তি কত কততা,  
কতি দিনর এ হারৌ উতাউ ব্যাধিয়ে নাপেইলে অরতা।  
সাহস জ্ঞান বুদ্ধি উপায় হাবিরতা,  
না আলয় দুঃখত কাম কর যুগার কর খেইলতা।  
কামাই করলে দুঃখ যারগা, কুরিয়া না খেয়া মরতারা কাম নাকরিয়া,  
সৎ মনল সৎকামল চল দুঃখ বেলেয়া যিতইগা।  
এসাদে মানু জ্ঞানী মহাজ্ঞানী জ্ঞান ধন সম্পদ বুলিয়া মহৎ  
কামল পালইতারা।

- ০ -

## লেরিক চা

লেরিক চা, লেরিক চা মন দিয়া লেরিক চা,  
পরা হিকতেয় জ্ঞান অইতয় নিয়ামপারা।  
পরীক্ষা পাশ করতেয় কতি হারৌ অইতেয়,  
কনাকর কাম লেরিক চেইলে পরীক্ষাত হবা ফল করতেয়।  
কনাক অয়া হাবিয়ও লেরিক তামকরতারা,  
লেরিক তামকরিয়া বিদ্বান অইতারা।  
বিদ্বান অইলে মানুয়ে ইজ্জৎ দিতায় কতি,  
বিদ্যার গজে ধন নেই, লেরিক তামকর দিনরাতি।

- ০ -



## মোর সংকল্প

মি লেরিক পাকরতৌ বিদ্বানগ অইতৌ,  
ইমা বাবা গুরুজনর উপদেশ মনদিয়া হনতৌ।  
লেরিক চানা মোর কামহান,  
পরীক্ষাত হবা ফল অনা মোর খৌরাংহান।  
বিদ্বান অনার সংকল্প মি পুরেইতৌ,  
বিদ্বান অয়া ইমা বাবা হাবির সেবা করতৌ।  
মহৎ উতাই দেশর সেবা নিজে করতারা,  
দুঃখীর দরদী অয়া সহায় করতারা।  
হাবিরে নিংকরতারা প্রেম বানাল,  
কতি হবা তানুর অন্তর দয়া মায়া।  
জনসেবাই ভগবত সেবা তানু হারপেইতারা,  
পরম জ্ঞানী অয়া এ সেবা তানু করতারা।  
এসাদে মহৎ অয়া হাবিরে নিংকরতৌ,  
এ সেবার ক্ষেমতা দক বুলিয়া প্রভুরাং মাগতৌ।

- ০ -

## আমার সৌগ

আমার সৌগ স্কুলে যারগা হাবিয়ে চেই চেই,  
লেরিক ধরেছে আতে কতি হবা উপায় নেই।  
স্কুলর ফিরইর আঙেই খঙগর লাগাছে কতি চুওছে,  
রাশি হবা, চরিত হবা হাবিত্ব জিঙে।  
লেরিক চার মনদিয়া স্কুলর পড়া হিকল,  
শিলটে বুজেয়া পরা হাবি ইকরল।  
হাবিয়ে বানাপেইতারা আমার সৌগরে,  
পুরস্কার দিও পরীক্ষাত হাবির গজে অইলে।  
ইমা বাবার সৎ উপদেশ মন দিয়া হনতয়,  
ডাঙর অইলে বিদ্বান অইলে দেশর সেবা করতয়।  
উহানল জীবনে মঙ্গল অইতারাতা,  
উপেয় তুমি মাস্তারাই তারে কতি হবা।

- ০ -



## বিয়ান ফুওইল

কওয়া রকলা বিয়ান ফুওইল উঠ উঠ চেই,  
বেলিহান নুকুলিল মুঙে ঘুমে আকগউ নেই।  
সৌওয়ে লেরিক চানা অকরলা হাবিয়ে কাম অকরলা,  
জগতে নুঙেইত থানা হাবিয়ে মনেইতারা।  
বিদ্বান অয়া কাম হিকলে মঙ্গল অইতারা যার যার কামে,  
হারৌর জীবন অর সাহসী জগাতা অইলে।  
আকদিন তোমার জয় অইতয়,  
জীবনর চেষ্টার ফল আকদিন ধরতয়।  
মনদিয়া লেরিক চেই, মন দিয়া কাম কর,  
কর্মর জীবনর পথগ তুমি ঙালকর।  
হাবিয়ে সিংনা দেই, সিংনাল লেরিক চেই,  
শ্রেষ্ঠ জীবনর পথগ এসাদে আটিয়া দেহেই।  
বিদ্যা নায়া নার উন্নতি জীবনে,  
জ্ঞানর উপায় অর বিদ্বান অইলে।  
বিদ্বানে মহৎ সৎজন জ্ঞানী সুখী অইতারা,  
মহৎ জীবনর মানবতার যারী তানু হুনেইতারা।

- ০ -

## ভজন

জয় কৃষ্ণ জয় কৃষ্ণ জয় কৃষ্ণ কৃষ্ণ নাম মহামন্ত্র,  
কৃষ্ণনাম মধুর নাম জপ মন অভিরত।  
কৃষ্ণ বিনা জগৎ মিশা,  
কৃষ্ণই সৃষ্টির বেলি জুনাক তেরা।  
কৃষ্ণই ভগবান জগৎ ঈশ্বর,  
কৃষ্ণই জীবন মরণ তোর।  
জীবনে মরণে জপতেয় এ সঙ্কল্প কর,  
কৃষ্ণই ইমা বাবা বেইবুনি হাবি তোর।  
হমাদে কৃষ্ণর চরণ মহারত্ন।।

- ০ -





## স্কুলে যিক্কা

স্কুলে যানার সময় অইল  
হাট যিক্কা স্কুলে,  
অজাই স্কুলে হমানি নাদেরগ  
নক্খানি ডিলইলে।  
বেঞ্চর গজে উবা করের  
যদি কোনগই পরা না হিকের,  
উবা অয়া পাকরিয়া হিকিয়া  
পর দে বুলের।  
আমার অজার লেরিক বাগাদেনা  
বারো বুজার কতি হবা,  
হাবিয়ে পরা পারলে হারৌ অর  
বানাপার নিয়ামপারা।

- ০ -

## প্রকৃতি (ছড়া)

পৃথিবীত মাটিহান আছে আরো  
আমি বসতি অয়া থায়ার,  
ফল ফসল ফলেয়া ছয়াত ছয়াত্তা খেয়ার।  
বেলির মিঙালে ঙালইয়ার আমি দিনে,  
রাতি ঙালকরের জুনাকে।  
বৌ আছে আরো নিংশা কারিয়ার,  
পানি আছে আরো পিয়া জিংতা থায়ার।  
প্রকৃতির এ সম্পদ জীব রক্ষারকা,  
এসাদে সৃষ্টি সাজাছি কতি হবা।  
প্রকৃতির কারণে আমি রক্ষা পাছি,  
প্রভুর এ সৃষ্টি প্রভু রক্ষাকারী।  
কিয়া সৃষ্টি করেছে প্রভুয়ে হারপার,  
তার লীলা খেলা হারপানি সম্ভব নার।

- ০ -



## ইমা লক্ষণা

### লেরিক চা

অ মা লেরিক চা লেরিক চা,  
স্কুলে গিয়া পরা পারবেতা।  
তি হাবির গজে অইলে, হাবিয়ে বা বা বুলতায়,  
তি বিদ্বান অইলে তোরে সম্মান দিতায়।  
এক মন অয়া পাকর বারাবুরা না চেই,  
হাবিয়ও পাকরতারা মনদিয়া হবা ছাত্র অইলেই।  
পরা পারলে খওয়েইতৌ ছয়াস্তা,  
জীবনে বিদ্বান অয়া পালইবেতা।  
ঠকেইলে ঠকগ অইতেয় লেরিক না চেইলে,  
ঠকর জীবন অধপতন হারপেইতেয় ঠকর যারী ছনলে।  
কতি দুঃখ কতি শাস্তি নিন্দার কুকাম করিয়া,  
নরকগামী পাপীর যারী দেহিয়া তি হারপা।  
নিজে মনেয়া হবা উতায় শিক্ষিত অইতারা,  
শিক্ষিত অনা মনার উগরে মাতানি না লাগের লেরিক চা বুলিয়া।  
হবা ছাত্র উতা লেরিক তামকরানি মনেইতারা,  
উহানল উতাই শিক্ষিত জ্ঞানী অইতারা।

- ০ -

### প্রভু

প্রভু তি সৃষ্টিকারী রক্ষাকারী পালনকারী জগতর হাবিয়ে মাস্তারা,  
মোরে তি রক্ষা করিছ জ্ঞান দিছ মাগৌরী এহান ভিক্ষা।  
জীবনে সৎ মনল সৎকাম করানি মনাউরী,  
অন্যায় পাপ কর্মল না ভোগিং মি।  
সৎপথগ দেহা দেহা নেগা জ্ঞানর পথে,  
কুকর্মই নাবেলবতা মোরে বিপদে।  
তোর কৃপায় যুধিষ্ঠির ভক্ত অয়া জিংতা স্বর্গত গেলগা,  
মোরে পুন্যত থদিছ পাপ না দেহিমতা।  
এসাদে জীবন অক বিদ্যা গুণে ইঙাল ঙালে,  
তোর এ কৃপা পেয়া হমাদিমতা চরণে।

- ০ -



## ইমা লক্ষণা

### গুরু

গুরুগই মাতিরি মি তোরে সেংকম দিতৌ  
তি যত্ন কর মোরে খওয়া, খওয়া,  
মি সেংকম নিয়াম দিলে নুঙেই অইতেয়  
সেংকমর মূল্য পেয়া।  
কুরা, বুসি ঘাস খের খুচাম যত খওয়েইতেয়,  
তত সেংকম পেইতেয়,  
বসর বসর সৌ দিতৌ কত গুরু অইতায়  
তি নুঙেই অইতেয়।  
তি বানাপেইলে মি বর দিতৌ তোরে,  
মোর গোবরে ফাস অর  
না মাঙর আকতাউ লেমেদে।  
ক্ষুতি কর ফসল ফলতয় থাইতেয় অভাব নায়া,  
গিরস্থিত হাবি অভাব নেয়ইবতা।

- ০ -

### হাবিতায় দরকার

চে হনাত ছাপেয়া লেরিক, মি শ্রেষ্ঠ লেখক অউরী,  
চেহান নাইলে মোর নেয়র ইকরিল কোন গতি।  
চেহানে সাহায্য করিয়া মি কতি অগ্রসর অউরী,  
চেহানরেতে মি কিস্তাউ নাদউরী।  
কার গুণ কতি হারপানি নুয়ারিয়ার,  
উহানল মি জিঙে বুলিয়া মাতানি ঠিক নার।  
আগর সহাই নাইলে আগই থানাও নুয়ারিয়ার,  
উহানল হাবিরে সন্মান ইজ্জৎ দিয়ার।  
হুরু ডাঙর হাবিরে দরকার নিংকরিয়ার,  
মেস্তুরিগউ দর্জিগউ লাগের হনারিগউ লাগের,  
সংসারে থাইতে হাবির দরকার।  
হেলা করলে না চলের।

- ০ -



## ইমা লক্ষণা

### জীবন

কতি দুর্গম ডিগল পথ আয়ুর খং বিল আওর টেঙারা, লাল লাল আটানি,  
দুঃখী অইলে কুরাং রাতি কুরাং অর দিন,  
কুরাং বাঘ বন্ধুকর সম্মুখিন,  
বরন বৌবরন বৈচাল কতি দুর্গতি।  
কুরাং মিত্র কুরাং বিরোধী অন্তহীন জীবন যাত্রা,  
কুরাং কার সৎভাব প্রেম কুরাং কার দয়া মায়া।  
কুংগই নিষ্ঠুর অয়া ধা ধরিয়া উবা অয়া আছে,  
খুন করিয়া চিরজীবন কারাগারে আছে।  
দুঃখী উগর গতি নেই ঘর দোওয়ার আদর প্রেম নেই,  
হবানেই উতার হবানেই কাম ডাকাটি, খুনাখুনি, এতাই কাম,  
মায়া দয়া বানা নেই।  
নিশ্ব অয়া কত কাততারা জীবনে,  
কোন উপায় নেই উবা অনি দ্বিয় জাঙে।  
যেগই পারেছে বিদ্যা গুনে কানা একিনে হিমালয়র চূড়া,  
ভিক্ষা মাগতারা কত কাদে কাদে, রইদে বরনে গিয়া গিয়া ঘরে ঘরে,  
অথচ অন্ধ, আতুর, খঞ্জ, চিরদুঃখী কত তানুও আছি কাদেকাদে নামরে নামরে।  
কোনগই বিদ্যা গুণে সম্মানে ধনে জনে পালছি,  
বিদ্যাই ধন বুলিয়া বিদ্বান কত অছি,  
মেরাকতাই হাবি কাম হিকিয়া করতারা চাকুরী রোজি রোজগারী।  
কততাই লেরিক তামকরিয়াও বেকার,  
চাকুরী নেই কইকারবার রূপা নেই হাহাকার।  
অসংখ্য মানু জীব বুজে খেইল বিতে ঠইনার,  
কিসাদে ক্ষেতিল চলানি উপায় খালকরিয়া অন্ত পানা নার।  
এসাদে হারৌ দুঃখই আটে আটে যেইতারাগা,  
জীবনে জালইল আশাই হাবিয়ে ভক্তি করতারা।  
হারৌ আছে দুঃখ আছে,  
চিরসুখী নাইতারা কুঙগউ জীবনে।  
পৃথিবীত জিংতা থানা এসাদে,  
তেব চেষ্টা করতারা হারৌত থানা কিসাদে।





## ইমা লক্ষণা

জ্ঞানীয়ে পালইতারা চেষ্টাল ধৈর্যরমা,  
উহানল অমর থার তানুর জীবনর গুণর কথা।

- ০ -

### দিন না উবার

আকদিন আকদিন গিয়া বসরহান সুওর,  
বসর বসর গিয়া আয়ু হাবির লয়র।  
উবা অয়া নাথার দিন কারেউ,  
এসাদে জনম লয়র বাছেয়া নাথার আকগরেউ।  
উহানল যেহান পারর করিয়া লয়কর,  
জীবনর হাবির আশা পূরন কর।  
অবহেলা করলে হেলাই যারগা জনম,  
না জিরেয়া মনেইল কাম কর ঙালইতয় জীবন।  
লেরিক তামকর, হবা জ্ঞান হিক, বিদ্বান অ,  
সময়র কাম সময়ে কর, জীবন ঙালকর চেষ্টাল।  
একিনে হবা কাম করলে উন্নতি অর,  
হবা কামর ফলল জীবন ঙালর।  
কনাকর কাম কনাকে, যৌবনর কাম কর যৌবনে,  
হাবির আশা পুরতয় জীবনে।  
পৃথিবীত অমর থাইতারা সৎকামর ফলল,  
হাবির গুনী ঙালছি এসাদে চেষ্টাল।  
জীবনে মনেয়া নিজে ঙালনা পালনা,  
ইমা বাবার সেবা শ্রাদ্ধ কর্ম করানি তরপন দেনা।  
কৃষ্টি রক্ষা জাতর অস্তিত্ব রক্ষা  
দেশ রক্ষা এতাউ পরম কর্ম,  
হাবির লগে হবা অয়া থায়া সৎকর্মত মরানি এ জীবনর পরম ধর্ম।  
জীবন যানা এপথ ইলয়া,  
সৎকর্মল অর সৎপথে যানা।

- ০ -



## ইমা লক্ষণা

(মহাসভার কবি সম্মেলনে প্রশংসিত কবিতাহান)

### তি আগে ডাক

তি ডাক, ডাক হাবিরে ডাক,  
হাবিরে নিংকরিয়া ডাক, হাবিরে ছনকা তোর নিঙর ডাক।  
তোর এ মনর ডাক,  
তোর হৃদির স্নেহ আদর হারপেইলে আইতায়,  
বনর জীবও হবা পেয়া আয়া থাইতারা আদর যেপেয় পেইতায়।  
তানুও আদর নিং বানা হারপেইতারা,  
তি কি মনল চলর আহিল দেখতারা।  
তোর অন্তরে উহান যদি না মনার নিমন্ত্রণ দিলেও নাইতায়,  
তোর ডাক আকগউ না ছনতায়।  
অন্তর হবা অনাই স্নেহ প্রীতি বানা জাগেরতা,  
সৎজ্ঞান সৎমন উপেয় হঙরতা।  
উপেয় সার অর মনুষ্যর জনমর সার্থকতা,  
উপেয় ফুলগ অয়া ফুটের নিজর গুন বিদ্যা।  
মহৎ জ্ঞানর মানবতাত আছি জগতে  
সাধু সৎজন জ্ঞানী জ্ঞানর মন্দিরে,  
স্কুল, কলেজ, বিশ্ববিদ্যালয় হাবি আছে পবিত্র তীর্থ নিঙে।  
উপেয় জাত বেজাত নিজপর বিচার নার,  
হাবির শ্রদ্ধা মর্যাদা উপেয় সন্মান পার।  
ঔ মনে পবিত্র অয়া ডাক হাবিরে হারৌ অইবাতা,  
হাবিরে পেয়া হাবি কিসাদেতা আহিল দেখবেতা।  
ভুল অইলেউ তোর হবাল বুজা হবাহান দেহা,  
আকদিন জগতর হাবি এসাদে হবা অইবাতা।  
মহামানবতার জ্ঞানর ঙালে জগতে সুখ শান্তি হারৌ পালইবতা,  
কতি হবা অইল এ দুনিয়া উদিনেঙ হাবিরে মাতবাতা।

- ০ -



## ইমা লক্ষণা

### তোর মোর একতা

তি মি এক অইক, তিলইক হৃদির প্রেমল,  
আগর দুঃখ আগই দেহিয়া নিংকরিক হৃদিল।

মোর হারৌ তোর হারৌ,  
তোর দুঃখ মোর দুঃখ, এ জ্ঞানল,

তোর হবারকা মি জীবন দিতৌ,  
মোর হবাত তি থাইছ হারৌল।

তোর বিপদে মি খিয়াল করতৌ তোরে,  
মোর বিপদে তি সহায় করিছ মোরে।

নিসার্থ প্রেম মোর হৃদিরমা,  
এহানে মোর জীবনর কথা।

তোর মোর পাঙ্কালে করতাঙাই জীবনর কাম,  
দুঃখ নেয়ইতই তোরাং মোরাং।

এ হবা দেহিয়া হবা অকা হাবি,  
হাবির হবাই অইবতা চিরশান্তি।

মি মনাউরী জগতে হাবি হবা অকা,  
হাবি হারৌত জগতে পালকা।

দুঃখ নেইয়ক জগতরমা,  
সুখ শান্তিত হাবিয়ে হারৌত থাইবাতা।

হাবি গুণে অকা হাবি গুণী,  
উপেয় অইতাঙায় দ্বিয়গিয়উ শান্তি।

এহানে অক জগতর য়ারি।

- ০ -

### ক্ষেতি

বরিষাত ধান ক্ষেতি বরন পরলে আল ধরতারা, বি হজকরতারা,  
আলি বেলেয়া খুলিয়া ধান রুয়েইতারা,  
ছনার ফসল ফলের ধান পেইতারা বারন বুজেয়া।

বরিষাত ক্ষেতি ধান, লাংপালে হৌপাত,  
ক্ষেতিয়ে বেমলবেঠা লক্ষীবাস।  
ক্ষেতি করলে রূপা কামানি অর,



## ইমা লক্ষণা

ক্ষেতির ফসল বেছিয়া রূপা পেইতারা দুঃখ নেয়র।

কত ক্ষেতি আলা নুঙেইপা অছি,

ক্ষেতির রূপাল নুঙেইত থাছি।

খেইতারা ছয়াস্তা হৌপাত ফলেয়া,

দুঃখী নাইতারা পৃথিবীত কোন জগাতা,

ধান ক্ষেতি হৌপাত ক্ষেতি হাবি ক্ষেতিত রূপা পেইতারা।

এবাকার ক্ষেতি কতি নুঙেই আলর মেসিন গাড়ী আছে,

রোজির কামিলা আছি হীননেই আগেকার সাদে।

হবাক চা দিলে হবা ফসল ফলের,

যতনে করলে ক্ষেতির ফসলে বারন বুজের।

ক্ষেতির পরিশ্রমে ব্যায়াম স্বাস্থ্য হবা অর,

পরিশ্রম নাকরলে গারি ব্যাধিয়ে মাঙর।

হাবিতা ফললে কিতার দুঃখ অইতয়তা,

ক্ষেতি ফসল নাইলে কিতা খেইতায়তা।

ক্ষেতিয়ে হাবিরে খওয়েয়া থরতা।

- ০ -

## হমা

বেলিরে মি হমাদেউরি মোরে মিঙাল দেনারকা,

দুর্গা মহাশক্তিরে মি হমাদেউরি পাঞ্চাল পানারকা।

পৃথিবীরে হমাদেউরী হারৌত থানারকা।

বৌরাজারে হমাদেউরি মোরে শান্তি দেনারকা।

বিদ্যা জ্ঞান দে বুলৌরি হমাদিয়া ইমা সরস্বতীরে,

ইমা লক্ষীরে মি হমাদেউরি থদেনরাকা নুঙেয়ে।

ইমা বাবারে হমাদেউরি এ জনম জরম অছু উহানল,

ঈশ্বররে হমাদেউরি জরম অনারকা পৃথিবীত তার কৃপাল।

জগতর হাবিরে হমাদেউরি হাবির বানা প্রেমরকা,

মি যেন হারৌত থাইং হাবির লগে এ ভক্তিরমা।

হাবির কৃপায় মোর সুখ শান্তি,

হাবির আশীর্বাদে মোর মঙ্গল অর হাবি।

হমাদিয়া প্রভুরাং মাগৌরি হাবির সুখ শান্তি।

- ০ -





## ইমা লক্ষণা

### উপদেশ

তি লেরিক তামকর বিদ্বান অ,  
বিদ্যার গুন জ্ঞানল গুল।  
তি হবা কাম করিছ, হবানেই কাম নাকরিছ,  
জীবনে এ কথা তি না পাহরিছ।  
পরর হিংসা পরর ক্ষতি না করানি,  
প্রেম বানাল হাবিরাং শ্রদ্ধা ভক্তি থনি।  
এ উপদেশ ছনলে থাইতেয় হবা অয়া,  
এ জ্ঞান ধনল গুলইছ হিন্দু সাহসরমা।  
নিজর জাতর ধর্ম আচরণ কৃষ্টির মান রক্ষা করিছ,  
জাতর মর্যাদা রক্ষার কাম করিছ।  
পুষ্টি পালইছ জীবনে হবা কামর মাজে,  
হবানেই কামর পাপে না ভোগবেতা নরকে।  
পরর হবা পরর মঙ্গল অক এহান খালকরিছ,  
মানুয়ে দুঃখ পেইবা কথা থতাল না মাতিছ।  
মধুর বচনে মধুর ভাবে মাতিছ হাবি কথা,  
মানুয়ে তোরে হবাপেইবাতা।  
মহৎ জ্ঞানীয়ে না সৌওইতারা,  
কাছিল শিরাপ নাততারা,  
ধৈর্য্য জ্ঞানল হাবি দুঃখ সহ্য করতারা,  
উহানল প্রেমল হাবির লগে থানা পারতারা।  
এহানেই মহৎ বিদ্বান গুনীর লক্ষনহান,  
উহানল অধর্ম পাপ নেই উতারাং।  
উন্নতিল পালইতয় জীবনহান।

- ০ -

### আমার কৃষ্টি

কৃষ্ণলীলারমা আমার নাসা কীর্তন, রাসর এলা হাবি,  
রাখুয়াল লক্ষাকাণ্ড খুপাকিচেই জয়দেব, অধিবাস, কীর্তন, সংকীর্তন,  
বাসক পদাবলী আচরণ বিধি এতা হাবিয়ে আমার কৃষ্টি।



## ইমা লক্ষণা

কতি হবা ডাকুলাই ডাক বারেইতারা,  
কতি নুংশি ইসালপাই এলা গেইতারা,  
কতি হবা দোওয়ারর চলন পালা শ্রাদ্ধ সেন্ধানাম অধিবাস হাবিতা।  
কত হবা গোপীর রাসর নাসা, রাধা কৃষ্ণর নাসা,  
এলা পদফামর নাসা হাবি,  
খুপাকিচেই ডুল ডুলবর চলন ভঙ্গি জয়দেবর চলন হাবি হবা কতি।  
কতি হবা পলেই, পালার কয়ত যাত্রার ফিরই চুওর,  
কতি হবা খুপাকিচেইর চলন, নাসা, বাসক, পদাবলী, করতান লঙ্কাকাণ্ড লুওর।  
নিরামিস খেয়া কাঠি লিকসই নামসা পিদিয়া ফিরই পলেই কতি অর হবা,  
কয়ত ফিজ়েত অবিয়ব কতি ঙাল লকলকা।  
এতাই আমার কৃষ্টির কতি হবা রূপ দেব,  
শ্রেষ্ঠ আমার কৃষ্টি হাবিয়ে অপরূপ সাজের।  
শ্রেষ্ঠ আমার গোপীর রাস খুপাকিচেই নাসা চলন,  
শ্রেষ্ঠ আমার পালা শ্রাদ্ধ অধিবাসর লীলাকীর্তন।  
এতা হাবি আর্য্যর ভক্তি প্রেম রস হাবি,  
এতা হাবি আমার বিষুপ্রিয়া মণিপুরীর জাতীয় কৃষ্টি।  
পৃথিবীত হাবিপেয় গিয়া গিয়া পরিবেশন করতারা,  
কতি মধুর ভাব ভক্তি কৃষ্টির উজ্জ্বল কৃষ্ণলীলা।  
উহানল কৃষ্টিত হাবিরে জিঙের আমার এলা নাসা,  
কতি গুণী অজারেল ইসালপা ডাকুলা দোওয়ার, রাসধারী, সূত্রধারী,  
কতি গুণল ইকরেছি এলা নাসা তাল রাগ রাগিনী।  
হিকতারা এতা বিদ্যা অজারেলর ঘরে গিয়া থায়া,  
এতা বিদ্যার ডিগ্রী নেই তেব অইতারা গুণী ডাঙর অজা।  
পৃথিবীত হাবি তঙাল তঙাল কৃষ্টি নাসা,  
ইকরা লেরিক তঙাল তঙাল ভাষা।  
কৃষ্টিহীন মানু উতা গতনেই ফুলপারা,  
কৃষ্টির আনন্দই মানুর চিন আঠইপা।  
কৃষ্টির গুণী অজার কতি সম্মান,  
কৃষ্টিয়ে দেব তঙাল ইজ্জৎ মান।  
হাবি জাত মানুর কৃষ্টিয়ে পৃথিবী অর ইঙাল ঙাল।



## ইমা লক্ষণা

### গাং

টেঙারার থলে ঘাটর বিলর পারে গাং গাছ বিরোগ বুজে বুজে,  
ফুলে ফুলে গাছে গাছে বেমলবেঠা ফলে ফলে, চেইতে কতি হবা,  
পাহিয়া পলি গুরু মইস ছাগি লপুকে গাস খেইতারা হাবি হারৌ অয়া।  
গাঙর পথে মানু তিলয়া হীল দিতারা পথ হংকরতারা,  
স্কুল হংকরেছি সৌওয়ে লেরিক তামকরিলতা।  
ক্ষেতির ফসল ফলের বেমলবেঠা মান্না গরমে জারে,  
কোন অভাব নেই ঘরে ঘরে।  
হাবিয়ে ক্ষেতি করতারা জগাতা,  
মাস, সেংকম আছে অভাব নেই আকতা।  
সৌও স্কুলে যেইতারাগা শিক্ষিত অইতারা,  
মালঠেপ দৌওর মন্দির আছে দিন রাতি আরতি করতারা।  
নাসতারা খেলতারা কুমেই কীর্তন করতারা হারৌয়ে,  
ঠাণ্ডা বৌ বহের, শান্তি দেব হাবিরে।  
ফুতি বুনতারা সিলাই করতারা, পারন, পেলি, খলেই বুনতারা,  
ইংচিল, জাল বেয়া মাস ধরতারা বিল হিছতারা।  
কুমেই উৎসব করতারা কত হারৌ হারৌয়ে,  
আগরে আগই নিমন্ত্রণ করতারা আদর নিঙে।  
ক্লাব আছে খেলতারা সৌ হারৌ হারৌয়ে,  
এসাদে গাঙর হারৌ আনন্দ নেই সহরে সহরে।

- ০ -

### তি কতি হবা

তি পুলেই কচু ডাল কতি হবা রাশি,  
চহা চহা নাক অরিঙর আহি।  
চকাল নাগই বঠালা ও নাগই,  
গোল গোল পাম্পল হবা গাল চুয়েই।  
গার বুক আত কাকালি,  
কতি হবা বাট মুওঙ সিংহর মুর্তি।  
চুলে আতরর নুংশি গত আহের,



## ইমা লক্ষণা

কপালে নামসা জুরক জুরক করেব ।  
পাউডারে ঙালছে অপরূপ মুরতি,  
তলফুতি ইনাফি পরনে কতি ঙালছত তি ।  
ছনার কাঠি লিকসই খৌনানাকপি,  
জংকা বাজু কতি চুওছে কানবেরি ।  
যৌবনে যেমন সাতছত হবা লেহাউ কাপকলেই মালতি,  
হাবি গুনে গুনী কতিগ আছি তোব ডেকি ।  
রাতিহানাত যেমন পূর্ণিমার জুনাক,  
শরতে ঙালছে বরণ নেই হাকহান ।  
এবাকাতে নেই আগেকার লেইসা কাপানি,  
বেরুনি আটেয়া বাদ্ধানি ।  
উবাকাও তি কতি হবা অছিলে সময়র লগে তিলয়া,  
এবাকাউ তি জিঙেছত হবা হাবি গুণ সুওয়া ।  
বিদ্যা গুণ চালাক সাহসি গুনী,  
নুয়ারিল কাম নেই জগাতা জ্ঞানী ।  
হিনেয়া সেওয়া গৌরিয়া পূজা কতি হবা লকলকা,  
কতি হবা বেবার ভক্তি সুতা ।  
নিজর কামে নিজে পালনা মনাউরী,  
মান ইজ্জৎ জ্ঞানে ইঙাল ঙাল ঙালৌরি ।  
বীরর গুনে বিরাজনা তি,  
বিষ্ণুপ্রিয়া মণিপুরী ইমা মহাশক্তি ।  
তি চিত্রাঙ্গদা অর্জুন প্রেয়সি নাসা টেংঠা হবা,  
কৃষ্টি পূর্ণ ইমা আঠইপি হবা ।  
জগতে তি শ্রেষ্ঠ গুনে, গৌরিয়া অপরূপে,  
তোব ডেকি অছি ঙালছি হাবি বংশাবলী এসমাজে ।  
নিজর জাতর পরিচয় তোব রূপে অরতা,  
মাংসেং ওকখি বেবার আচরণ গৌরিয়া শ্রেষ্ঠ ভক্তি পূজা ।  
কৃষ্ণলীলার নাসা টেংঠা কৃষ্টিল ঙালছত জগতে,  
জ্ঞান গুণ বিদ্যা বুদ্ধি গৌরিয়াত কুঙগউ নেই তোব গজে ।  
তি বিষ্ণুপ্রিয়া মণিপুরী ইমা ঙালছত হাবি গুণে,  
ইমা তি কতি হবা জগতে ।





## শহীদর কথা

বিষ্ণুপ্রিয়া মণিপুরী ঠাররকা যেসাদে সুদেষা শহীদ অইলি,  
বাংলা ভাষারকা এগারগ শহীদ জীবন দিলা মরলা পুলিশর গুল্লীত ।  
ক্ষুধীরাম বগৎসিং কনকলতা দেশরকা জীবন দিলা,  
ঔসাদে কত শহীদ পৃথিবীত আছি জীবন বিসর্জন দিয়া ।  
কতি একিন অয়া জীবন দিতারা বিপ্লবে দেশর জাতর মঙ্গলরকা,  
তানুর ঔ মন তানুর ঔ হপন পূর্ণ অর উহানরকা ।  
তানু মরিয়া উন্নতি অর উহানল তানু অমর জগতে,  
হাবির হৃদিত শ্রদ্ধা ভক্তিত নিংশিং অইতারা তানুরে ।  
ছাত্রর আন্দোলনর বেনারহান ধরিয়া জয় বিষ্ণুপ্রিয়া মণিপুরী ইমা  
বুলল পুলিশর গুল্লীত সুদেষা,  
বুকগ পাতিয়া গুল্লী খেয়া মরলি জয়ধ্বনি দিয়া ।  
উসাদে মরন শহীদরতা অর হাবিরং অমর অইতারা উহানরকা,  
হাবি ফামে তানুর স্মৃতিং বেদি হংকরতারা ভক্তিরমা ।  
হুদা দুঃখ থাইল মিশা কিয়া মারলা গান্ধীরে, ইন্দিরা, রাজীব ঔ গুণীরে,  
কুণ্ডগই কিয়া মারলা তরনী, বিমল মন্ত্রী, প্রসন্নরে ।  
দুঃখ লাগের মহং গুণী দেশসেবি মরলে,  
তানুও নিজর মহং কর্মল অমর থাইতারা শহীদর সাদে ।  
দেশ সেবি সমাজসেবি মহং গুণী হাবি উসাদে,  
নিজর মহং কর্মল অমর থাইতারা শহীদর ডেকি হাবির ভক্তির হৃদয়ে ।  
দেশবন্ধু চিত্তরঞ্জন অরবিন্দ, গোকুল, তনুবাবু আরতাউ কত আছি,  
দেশরকা জাতরকা অভিরাম কাম করেছি,  
কৃষ্ণ মহেন্দ্র জগৎমোহন নন্দকিশোর পুলকেশি ফাগুণী ।  
যেতাই ভারত স্বাধীনতা করলা তানু কিতা পেইলা,  
জীবন দিলা শহীদ অইলা কিত্তাউ নাপেয়া তানু আগে মরলা ।  
উহানল শহীদর লগে তানুরেও ফুল দউরী,  
এ দেশে জরম অয়া বারো সমাজ সেবা দেশ সেবাল করকা উন্নতি ।



## বিষ্ণুপ্রিয়া মণিপুরী ইমা

ইমা তোৰ মূৰতি হংকরিয়া সহৰে সহৰে দেশে দেশে থইতৌ ইমাৰ স্মৃতিৰকা,  
তোৰ সাত হবা ৰাশ্বি হবা লক লকা ৰূপহান, হাবিয়ে দেখবাতা।

পুলেই কচু ৰং ইঙাল ঙাল হবা, তলফুতি ইনাফি ৰাজ পোষাক লাগাদিতৌ,  
ঔ ৰূপ মূৰতি স্মৃতিৰকা থইতৌ।

হুনাৰ কাঠি লিকসই খৌনানাকপি জমকা খারৌ

বাজু কানবেৰি লাগাদিতৌ সুকৰে,

জ্বৰক জ্বৰক কৰবতা বেলিৰ মিঙালে লকলকা কপালৰ নামসা সিরিসি,

কৃষ্ণৰ চরণ সাপা ইঙাল ঙালে।

তোৰ জিপুত তঙাল তঙাল কামে বিদ্বান উকিল মাষ্টাৰ,

কামে কামিলি ৰুয়াউলি ধওয়া উলি ফুতি বুনানি

হাবি কামে পাদৰ্শি সাহসী আলনেই আকতার।

হাবি গুণে গুণী নাসা এলা নুংশি নার গোপীৰ ৰাসে,

চুয়ৰ পলেইৰ গম্বীৰ মুকুট মেইখুম লকলকা,

জ্ঞানৰ কামে দয়া মায়া সরলা বীৰাঙ্গনা কতি হবা।

হাবিতাৰ উতাৰ হাবি ৰূপ দেখবাতা।

হুনাৰ কালিল ইকরতৌ বিষ্ণুপ্রিয়া মণিপুরী মুৰ্ত্তিময় ইমা,

হাবিয়ে দেহিয়া কতি হবা বুলবাতা।

তোৰ গুনে অইতেয় হবিত্ত্ব হবা,

তোৰ কৃষ্টিল জ্ঞানল হাবিৰাং পালইবেতা।

পৃথিবীত থাইবতা ইমাৰ কথা,

তৃতীয় পাণ্ডব অৰ্জুনৰ মইলক তি চিত্ৰাঙ্গদা।

তি মণিপুরৰ চিত্ৰবাহন ৰাজাৰ জিলক,

তোৰ পুতক বভ্ৰুবাহন মণিপুরৰ মহাৰাজা।

হস্তিনাৰ হাবি পাণ্ডব বংশ আমাৰতা,

আমাৰ পৰিস্কিত মহাৰাজা।

উতাই আমাৰ জাতৰ হাবি,

খুমেল মইৰাং আঙ্গম লওয়াং নিংখৌজা ৰাজত্ব কৰলা মণিপুৰে,

উতা হাবি তোৰ জিপুত বংশ পালছি ভারতে।

হাবিয়ে তোৰ গুণ গেইতাৰা নিকা,

হাবিয়ে ইমা তোৰে ইমা বুলিয়া হমা দিতাৰা।



লেখক

জগতে কত বিদ্বান গুণী লেখক সাংবাদিক অইতারা,  
বৈজ্ঞানিক, ঐতিহাসিক অয়া কত লেরিক ইকরতারা।  
সাহিত্যিক, উপন্যাসিক কবি গীতিকার অইতারা,  
শ্রেষ্ঠ লেখক, পুরস্কার সম্মান পেনসন পেইতারা।  
তানুর মান জ্ঞানর সম্মান গজে,  
কত লেরিক ইকরতারা জগতে বুজে।  
লেরিক তামকরিয়া বিদ্বান গুণী অইতারা,  
স্কুল কলেজ বিশ্ববিদ্যালয় হাবিত তানুর লেরিক ছাত্রই তামকরতারা।  
হাবি শিক্ষিত শিক্ষকে ও লেরিক বাগাদিতারা ছাত্রেরে,  
ছাত্রই পাকরিয়া হিকিয়া বিদ্বান অইতারা জগতে।  
এসাদে বিজ্ঞান, ভূগোল, ইতিহাস, সাহিত্য, মহাকাব্য, উপন্যাস তামকরতারা,  
তানুর লেরিক পাকরিয়া এম.এ, বি.এ, ডিগ্রী পাশ করতারা।  
হাবি বিষয়র জ্ঞান তানু হারপেইতারা,  
হাবি লেখকে ইকরতারা তঙাল তঙাল জ্ঞানর কথা।  
লেখকর ও লেরিক পাকরিয়া কত জ্ঞান পেইতারা,  
উহানল হাবির গজে লেখকর মান শিক্ষারমা।  
শিক্ষার মাজে আছে জ্ঞান আচরণ বিধি,  
সৎ শিক্ষা কুশিক্ষা তঙাল তঙাল যারি।  
হাবি জ্ঞানরকা লেরিকে জ্ঞানর ভাণ্ডার পেইতারা,  
লেখকে ইকরিয়া থছি হাবি জ্ঞানর কথা।  
ধন্য ধন্য তানুর জ্ঞানর এ প্রতিভা,  
ধন্য ধন্য যেতাই পয়লা লেরিক ইকরিয়া দেহেইলা।  
উহানল জ্ঞান মান হাবি লেখকর তঙাল তঙাল বুলতারা।  
পত্রিকা বিলেইতারা জগতে পৌ ঘরে ঘরে ফৌকরিয়া,  
পৃথিবীত অমর অয়া থাইতারা হাবি লেখক তানুর হবা লেরিকরমা।



## বনর শোভা

উচ উচ টেঙারা উচ উচ গাছ লতা বুজে হেরনেই কোনপেয়,  
অজস্র ফুল ধরের ডেমে ডেমে গতে গঙালেয়া দূরেইত্ব চেইতে হবার সীমা নেই।  
পাহিয়া পক জীব হাবি বনে বুজে থাইতারা,  
কতি কতি হবা জীব, যেমন অপরূপ ছবি রংকরা।  
বাঘগর রূপহান অপরূপ হবা,  
অরিং গঙার ভল্লুক আন্তি হবা জার জার রূপল ঙালয়া।  
জেরা জিরাপ গড়া বান্দর কত অসংখ্য কত জাত হরপ,  
বুজে বুজে পাহিয়া পক, আছি বনে জঙ্গলে বুজে বুজে,  
বিয়ানে খুয়া পরের কত, মেঘালা গজে থারগা হতা পারা অপরূপ সাজে।  
বরন পরের গজে পানি পাহিয়া লামের,  
জরনা অর অররেই পরের বরনে গাট অয়া সাগরে লামের।  
চেইতে কতি হবা অর কি অপরূপ শোভা,  
দেওয়ালে টাঙেছি ছবিহান চানা পারা।  
প্রকৃতির কি অপরূপ টেঙারা নদী বিল আউর সমুদ্র,  
কিসাদে হঙছে খালকরলে না মিলের অঙ্ক।  
সৃষ্টির গঠন মূলক জীব গাছ লতা খংবিল টেঙারা,  
লেখানি সম্ভব নার কি অপরূপ লীলা।  
কি প্রয়োজনে হঙছে সৃষ্টির এগতি,  
হাবিয়ে শোভা করিয়া পালর জার জার আকৃতি,  
চেইলে খালকরলে কল্পনাই নুওয়ারের ইকরতে সৃষ্টির এতা হাবি।  
মেইথং চরিত বেবার কর্ম তিল নেই হেইরাপ খানি অইলেও তঙাল অর,  
কি অপরূপ সৃষ্টির আকৃতি প্রকৃতি রং রীতি নীতি দুগরতা না তিলর।  
উতাত কইতা কইতা বাঘ কইতা সিংহ  
কইতা বান্দর কইতা প্রজাপতি পক জীব  
কইতা কইতা কেরবং কেচুয়া কইতা।  
কারৌ লেহানির সাধ্য নেই,  
উহানেই আচানকহান সৃষ্টির মাজেই।  
সৃষ্টিকারীর কি অপরূপ চিন্তা ভাবনা,  
হাবি সৃষ্টি করিয়া চেয়া থার লীলা।





## কঠিন মনুষ্য জন্ম

তেতত অয়া কাম করিয়া খেয়া জিৎতা থানা জগতে,  
 ধৈর্য্যত হিনপেয়া বিদ্বান জ্ঞানী অনা মনুষ্য জীবনে।  
 ন্যায় অন্যায় থক থকনেই হাবি হারপানি,  
 অধর্ম সৎধর্ম কর্ম মাংসেং পবিত্রতা জ্ঞানল মানানি।  
 শান্তি কথা হবা কথা বেবার শুকখি হাবি উপমা,  
 গৌরীয়া রীতি নীতি লু লাকাং হারপানি হাবিতা।  
 কনাকে কনাকর কাম শিক্ষা খেলা যৌবনে কর্ম বুজন অনা পেয়া,  
 হেরনেই জীবনে বয়া জিরেয়া থানারকা।  
 বুয়া অইলে বুয়ার কাম মহৎ জ্ঞান ভক্তিত থানা ভজনে,  
 মহৎ নাইলে বিপদ অজ্ঞান জীবন, থানা নরকে।  
 এতা হাবি মানিয়া পিছে সুখ দুঃখর কথা,  
 এতা হাবি শিক্ষাল মহৎ জীবন অনা।  
 বয়া থাইলে কুরিয়া অইলে কুঙগই তোরে খওয়েইতয়,  
 হেইচিং জগাতা অইলে ছয়াস্তা খেইতয়।  
 মনুষ্য জীবনর কঠিন কঠিন জীবন ধারা,  
 এতা জয় করিয়া পালনাই শ্রেষ্ঠ জীবন অনা।  
 কোন কাম সহজ নাগই আটতে থাইতে জীবনে,  
 সৎ কামর ফল হবা অর পালইতে।  
 লেইরা দুঃখ জ্বালা ব্যাধি কত তারানা,  
 পদে পদে বিপদ সাবধান অয়া থানা,  
 এতা হাবি জ্ঞান করিয়া সৎমন সৎকর্মই শান্তি,  
 সৌ জিপুত মওয়েই ইমা বাবা মায়ার বংশ হবা অইলে ভালনি।  
 মহৎ শিক্ষাই জ্ঞানী অনা মহৎ অনা জীবনে,  
 সৎ জ্ঞান সৎ সঙ্গ সৎ কর্মই নেরগা সৎ পথে।  
 ঔ দৃষ্টান্ত আছে মহাভারতে স্বর্গত যানা পারেছে হুদা যুধিষ্ঠিরে,  
 হাবি ধর্ম গ্রন্থর সার বস্তু একথা ইকরা লেরিকে।  
 মহাকাব্য পাঠে হাবিয়ে হারপেইতারা,  
 হাবির মহৎ জ্ঞান অর এতা হাবি পাঠ হনিয়া হনিয়া।



## গিরস্তির আনন্দ

গিরস্তিত ক্ষেতির বি সম্পত্তি বিটা মাটি বাড়ী পহরী সুওরা হাব্বিতা,  
নারিকল গুয়া খেজুর আপেল আংগুর কলা হেইনৌ খাটল কইতা।  
গুরুয়ে সেংকম দিতারা, পহরিত মাছ, গাছে গাছে ফল বুজে,  
ক্ষেতির ধান বারন বুজে বেমল বেঠা ফুলে ফলে ফসলে।  
গাঙে কিত্তাউ অভাব নেই, কিত্তাউ কম নেই,  
কতি খেইতে ঘি, মাছ সেংকম অভাব নেই।  
গিরস্তিত দিন মাদান কাম জিরন নেই বরিষা লাংপাল মান্না,  
উহানল ব্যাধি নেই, অভাব নেই আকতা।  
সৌ লেরিক তামকরতারা কত হারৌর খেলা খেলতারা,  
খুলা লপুক বহের চারিবেদে শান্তির বৌ আনন্দর নেই সীমা।  
ঘরর কাম ক্ষেতির কাম বাড়ীর মিয়ারর কাম করতারা ঘরর হাব্বিয়ে,  
হাব্বিয়ে ঘরর কাম গিরস্তির কাম করিয়া থাইতারা হারৌয়ে।  
বেইবুনির প্রেম ইমা বাবার সেবা কতি নিং বানা,  
গিরস্তিত নুঙেই অরতা এক মন অয়া থানা।  
উহানল পরিবারে হুদা উন্নতি অর ঘরে ঘরে,  
সাহস ঠয়র এক মন অর হাব্বির কর্মর মাজে।  
কদাল আতিয়ার লাঙ্গল উকেই জুয়াল হাব্বি থার সুওয়া,  
চৌল থৌ ডাইল হাব্বি ফলের নুন হাওয়া লনা হুদা।  
দৌ হমাদিল তুলসীপুং তুলসী ফুলর গাছল সাজেইতারা,  
হিনেয়া দৌ হমাদিয়া তুলসীর মাটির নামসা উপেয় পিদতারা।  
গিরস্তির ঘরে কতি আনন্দ কতি খেইতে হারৌয়ে,  
দুঃখ ব্যাধি কিত্তাউ নেই থাইতারা তিলয়া মনর আনন্দে।  
বেয়াপা মুনি মারামক কামল থাইতারা, এক অয়া,  
কামর আনন্দর এলা গেইতারা।  
হাব্বিতা ফলেয়া খানার আনন্দ থার হাব্বিরতা ঘরে,  
অভাব নেই আকতা ঘি থৌ, হৌ, ভাত কতি খেইতে।  
গিরস্তির জিনা যেতাই হারপাছি,  
গিরস্তিয়ে জিঙে বুলিয়া চৌধুরী জমিদার তানুরে মাত্তারা।



বসন্ত কাল

ফাঙ্গুন চৈত্র দ্বিয মাহা বসন্ত  
কোকিল আয়া রহানি অকরতারা নুংশি,  
কাপকলেই, চিকংলেই, চিনিচাম্পা  
নাগেশ্বর গোবাটি সাতর টেঙারা থল বুজিয়া হাবি।  
হু হু বৌ বহের, বিলার ফুলর নুংশি গত,  
লাংপালর ক্ষেতি হৌপাত অর বেমলবেঠা  
ইঙাল ঙালর হুকানা দিন রাতি পথ।  
গাং লপুক টেঙারা কতি অর হবা,  
হাকে হারৌত ফরদিতারা কত জাতর পাহিয়া।  
হারৌত মানু উৎসব কুমেই বিয়া করতারা,  
কত লেখকর কত রূপ কল্পনা।  
জর্ম হলি রং খেলা বিষু গিল্লা পাশা খেলা সিংনা,  
বসন্তর আনন্দর নেই দিল উপমা।  
লয়ইতে মেঘালা হাকে কার, দিন গুজুরের, চিলিক চিলিক জ্বিলকার,  
কেরবং রকতারা গাতে গাতে কত সুরে ধ্বনি কার।  
পানি পেয়া পাহিয়া জীব কতি হারৌ অইতারা,  
গাছে গাছে লতা পাতা ডেমার কতি হবা।  
পানিত হারৌত মাছ ধাবদিতারা খেলতারা,  
হাবি ঋতুত বসন্ত হবা জিঙে উহানরকা।  
বসরহান লয়র এসাদে বসন্তকালে,  
বরিষা আয়া হমার নুয়া বসর হমেইতে।  
হারৌর কুমেই বিয়া উৎসব করতারা,  
জরমর হারৌর রংখেলা হাবি খেলা অর উবাকা।  
উহানল বসন্তরে আনন্দর ঋতুরাজ বুলতারা।



## ইমা লক্ষণা

### আমার মণিপুর

বারো আকদিনতে অইতয় আমার মণিপুর,  
ফিরেয়া পেইতাঙায় যেদিন আমার জয় অইতয়।  
এব আছি মণিপূরে নিয়াম অয়া আমারতা,  
হাব্বিয়ও হারপাছি আমি মণিপুর বেলেয়া আহেছিতা।  
খুমেল, মৈরাং আস্‌ম লওয়াং নিংখৌজা আমার রাজা আছিল্লা,  
হাব্বি পরাজিত অয়া হাব্বিতা হারেইলা।  
পামহেইবার আক্রমণ রাজত্বত অনাচারে পলেয়া আইলা,  
দুঃখ জারে নুয়ারিয়া আইলা মণিপুর বেলেয়া।  
আকতা থাইলা উতা এবও আছি,  
উতার গজে কতগ গেলাগা বারো মণিপূরে,  
জিরি, লেইসাবিথল বাবুখাল কালীবারীতথাইলা,  
নুয়া লাম জুরে জুরে।  
মণিপূরে মেইতেয় ঠার না টটরলে জেল পঞ্চাশ টাকা জরিমানা দেনা,  
আচানক ডাঙি অত্যাচার অছিল কততা।  
তেব চেপ্টা থনা গণতন্ত্রর ভোটে জিঙানি,  
এব বিষ্ণুপ্রিয়া মণিপুরী ঠই লোকসংখ্যা মণিপুর জুরিয়া আছি।  
হাব্বিরে জাগানি লাকতয় উন্নতি করকা বিদ্যা ধনে মানে,  
আপ্পানউ জিংতাঙাই গুনে জ্ঞানে সম্মানে।  
যেহানর চারিবেদে গোল সাত লাইন টেঙারা,  
বুকুত লকতাক থল নদী,  
গোবিন্দ মন্দির, বিষ্ণুমন্দির আছে অর পূজা ভক্তি।  
ঠাঙা হাওয়া বহের, হাব্বিতা ফলের অভাব নেই কতি হবা,  
নুঙেইর সীমা নেই মণিপুর বুলতারা।  
শিক্ষার স্কুল কলেজ আছে রাজধানী আছে ইঙাল ঙালে,  
কৃষ্টি কলা পরিপূর্ণ এলা নাসার অপরূপ রূপে।  
তেব জিঙিয়া আছি নাসাত সেনারিক রাজকুমার, গুরু বিপিন, বনমালি,  
লেরিকে আছে বুজে হনার কৃষ্টি।  
ঔ মণিপুর ভারতর আৰ্য্যর মাটি, ইকরা পিতৃভূমি পালছে,  
মেইতেয় মঙ্গলিয়ান আয়া হমেইলেউ তানু মূলতা নাগই,





## ইমা লক্ষণা

ইতিহাস একথা হাব্বিরে মান্ডই।  
চিত্রাঙ্গদা, উলুপি আনৌ ইমা অর্জুনর মইলক গি,  
সুভদ্রা দ্রৌপদীরেও যেসাদে বিয়া করেছে অর্জুন গিরকে।  
অর্জুনর পুতক বভ্রুবাহন অর্জুনরেও জিঙেছিল,  
মণিপূরে রাজত্ব করিয়া রাজা পালছিল।  
হাব্বি বিষুগপ্রিয়া মণিপূরী অর্জুন বভ্রুর বংশাবলী।  
হাব্বি কথা ইকরা আছে মহাভারতে,  
এহান হারপাছি পাকরতারা জ্ঞানী জনে।  
উহানল আমার পিতৃমাটি মণিপূর ইক্ষল রাজধানী।

- ০ -

## এবাকার বেয়াপা

এবাকার বেয়াপার হুনর নেই গারিত,  
বাবু অয়ার বুলিয়া মন নেই গিরস্তিত।  
কাম না করিয়া বয়া থানাই লেইরা অইলা হাব্বি,  
কাম না করতারা উতার ঘরে নেই লক্ষী।  
ফুতি না বুনাতারা পানি না তুলতারা,  
ডাইয়েবিটিস, গেষ্টিক পেটে নিংশা মাঙইতারা।  
প্রেসার স্ট্রোউক পেরালাইছিস হাব্বি ব্যাধিয়ে পার,  
খেইল রুচি নেই খেইতে হজম নার।  
কাম করলে ব্যাধি নেয়র ছয়াতক থানা,  
এ উপদেশ না হুনতারা এবাকার বেয়াপা।  
ছকানা বাবুগিরি খেইলতা নেই ঘরে,  
ছকানা ফুটানি কাম নাকরতারা আটলর কাজে।  
বেয়াপা ঠিক নাইলে শান্তি নাথার ঘরে,  
সৌ শিক্ষিত অইতারা বেয়াপার ডাঙিয়ে।  
জগতর লগে মান্না অনা বেয়াপাই পারতারা।  
বেয়াপার হবাই অর শান্তি ঘররমা।

- ০ -



## শ্রী কৃষ্ণের বিলাপ

কৃষ্ণই মাতের রাধে তোর সালে এ বৃন্দাবন হংকরিয়া,  
 প্রেম লীলা হিকাউরী ভক্তরে,  
 তোর সালে রাহাল অয়া গুরু রাহৌরি বৃন্দাবনর বনে বনে।  
 তোরে বানাপানার সালে যমুনার পারে  
 তমালর ডেলে বয়া বাশী বাজাউরী নিক্কা,  
 তোর সালে রাসে নাসৌরি গৌপীর লগে, হারৌ অয়া।  
 বস্ত্রহরন করলু যমুনাত সখি হিনেইতে জ্ঞান তত্ব ছনেইলু হাবিরে,  
 বৃন্দাবনর হিংস্র অসুর মারলু হাবিরে শাস্তি দিতে।  
 ননী চরকরৌরি ব্রজবাসীর ঘরে মোরতা বুলিয়া,  
 জগতর হাবি মোরতা এ কথা হারপাকা বুলিয়া।  
 বৃন্দাবনর এ লীলা মি কুরাঙৌ নাকরেছু,  
 এপ্রেম মি কারৌ এসাদে নাদেছু।  
 এপ্রেম দেহিয়া হাবিরে হিককা বুলিয়া দেহাউরী,  
 রাধারানীর অগাদ প্রেম ভক্তি জিরন নেই দিনরাতি।  
 সখিয়ে কতি কৃষ্ণ সঙ্গ মনেইতারা,  
 ব্রজবাসীয়ে কতি নিংকরতারা।  
 গাছ লতাই ফুল ফল দিতারা হারৌয়ে,  
 পাহিয়া পলি হাবিরে কৃষ্ণগুণ গেইতারা নিক্কাদিনে।  
 এভক্তি প্রেম আনন্দ আর কুরাঙৌ নেই,  
 উহানল বৃন্দাবন মোর হৃদির লীলাভূমি,  
 মোর নিংকরা হাবি ব্রজবাসী, মোর হৃদির কথা এহানেই।  
 এহান মি না পাছরৌরি হে রাধারানী,  
 হাবি মোরতা এ সৃষ্টির জীবলতা হাবি।

- ০ -

## মনর মহৎ চিন্তা নাইলে

মন যদি ঠিক নার, কিন্তুাউ কারৌ ঠিক নার,  
 মানবতার আদর্শর আকতাউ চুম নার।  
 পাগল নায়া পাগল অনা, হবা নায়া শাস্তি অনা,



## ইমা লক্ষণা

হবা শাক্তি খেই না করিয়া উল্ট পাল্ট অনা ।  
বিদ্বান অইলে জ্ঞানর নীতি ঠিক অক,  
চুম চুমনেই থক থকনেই খেই খেই অয়া লেপক ।  
হবা অয়া হবা কামল থানা,  
হবা উগরতা হবানেই কাম নানা ।  
উহানল হবা কামল জীবন হবা অর,  
হবানেই কামর শাক্তি দোষল ভোগানি হবা উগরতা নেয়র ।  
হবা মনল শিক্ষিত মহৎ জ্ঞানল জ্ঞানী অপারতারা,  
হবা উগই হবানেই কামর ইজ্জৎ নেই শাক্তি ভোগ নাকরতারা ।  
জ্ঞানর যত পথে জ্ঞানী যেইতারাগা,  
অজ্ঞানর অনাচার কাম জ্ঞানীয়ে নাকরতারা ।  
শিক্ষিত অয়া ও ভুল পথে অজ্ঞানে যেইতারাগা,  
শিক্ষার মান থ নুয়ারতারা মহৎ অনা নুয়ারিয়া ।  
উহানল মনহান ঠিক অনা, মনর জ্ঞান ঠিক অনা,  
মনর মহৎ চিন্তা আগে লেপনা ।  
মহৎ উহানাত লেপয়া সুপ ভুল অন্যায় কাম নাকরানি,  
উহানল শিক্ষিত মহৎ জ্ঞানী গুণী সৎজনরতা অর মহৎরীতি ।  
কিন্তু মনহান শক্ত করে নুয়ারতে  
কত জন ভুল পথে গিয়া বিপদে পরতারা,  
কত জন জীবন বিনাশ করিয়া কাদিয়া থাইতারা ।  
চরকরতে ধরা পরতারা, মদ গাঞ্জা, ড্রাগছ জুয়াল সর্বহারা অইতারা,  
অশান্তির ও জীবনর কথা দুঃখত লয়র, অসম্মান, অবহেলা নিন্দারমা ।  
ও ভুলে কত শিক্ষিত অসম্মানর জ্বিগত পুরিয়া পরতারা নিন্দার গাতে,  
আর সময় না পেইতারা জীবনে চিন্তাল সৎপথে ফিরিয়া আইতে ।  
এসাদে ভুল কর্মর ফল ভোগিয়া অইতারা সর্বহারা,  
ভোগতারা নানা ব্যাধি,  
কত দুঃখ চিন্তাই ছানিয়া ফওইতারাগা অস্তিম কালে,  
থার জীবনর অনাচার যারী ।  
উহানল ভুল চিন্তার অন্যায় পথে না যানা নিয়াম খালকরিয়া,  
শাক্তি উহানে শাক্তি অর, কোনদিন নার হবা ।  
হবাহানাত থার জীবনর সুখ শাক্তি মঙ্গলর হাবি কথা ।



## নাম সংকীৰ্ত্তন

ভাগবত গীতা রামায়ন মহাভারত

ঈশ্বর লীলার মহাকাব্য,

উতার পিছে কলি কালর কাব্য

শ্রী চৈতন্য চরিতামৃত।

ভক্তর জ্ঞানর সালে ঈশ্বর অবতার অরগ,

মনুষ্য জনম লয়া হাবিবে জ্ঞান দেৱগ।

কতি বানাপার ভক্তরে হাবি ইকরা আছে,

ঈশ্বর লীলার মধুর পুন্য বানী দিয়া

ভক্তরে নেরগা জ্ঞানর পথে।

পাকরতারা হিন্দু হাবি উৎসব পূজা হাবিতাত,

উহানল হিন্দুধর্ম শ্রেষ্ঠ ধর্ম, শ্রেষ্ঠ ভক্ত, বৈষ্ণব উতাত।

ঈশ্বর লীলার গ্রন্থপাঠে থানা অর তীর্থ ব্রজবাস,

ঈশ্বর ভক্তিত জয় জয় কৃষ্ণ বুল ভক্ত হাবিহান।।

মাতের গৌরাঙ্গ রূপে মোর বিভূর আহি,

গৌরাঙ্গ নাম প্রচারে দিল জ্ঞান ভক্তি।

জয় জয় গৌরাঙ্গ লদে মোর হমা,

তোর কৃপায় গেইং মি ঈশ্বর লীলার গুন কথা।

হরে কৃষ্ণ হরে কৃষ্ণ কৃষ্ণ কৃষ্ণ হরে হরে।

হরিনামে পবিত্র অইল কলির পাপ হাবি

ভক্ত জগাই মাধাই হাবি হরিনামে মত্ত অইলা,

নবদ্বীপ বৃন্দাবন হাবি তীর্থত ঈশ্বরর গুন গেইতারা।

গৌরাঙ্গর নামে বিভূর অই ভক্ত হাবি,

হমাদিয়া মাতের নরেন মোরেও কর সঙ্গি।

- ০ -

## মানবতা

মানবতার মহান মন হঙক ঙালয়া মানুর হৃদয়ে,

বিশ্বশান্তির খৌরাং আশা ঙালক মঙ্গলর ধূপর গতে।

পাষান হৃদির ধ্বংস লীলা বন্ধ অক,





## ইমা লক্ষণা

অন্তরে বানা প্রেম হমেয়া,  
আনন্দর উৎসব অক প্রেমে কুলাকুলি করিয়া।  
প্রকৃতির শোভা যেসাদে হুঙছে কতি হবা রঙে রঙে,  
সাগর সমুদ্র নদী টেঙারা বুজিয়া চারিবেদে।  
কতি হবা বৌ বহের লিরি লিরি জীবর শান্তিরকা,  
কতি হবা গাছ লতা পাতা রঙে রঙে ফুল সাতয়া।  
দুঃখ নেই বুলতারা, কিয়া মানু দুঃখী অইতায়,  
নিলোভ সৎ মন অইলে মানুর হিংসা নেয়ইতয় প্রেমর শান্তিত থাইতায়।  
বেলিয়ে কতি সদয় অয়া মিঙাল দেব,  
ঙালর পৃথিবী বরিষাত বরণ পরের।  
ক্ষেতি ধান ফসলে ফলের হাইল আউ বাস মিয়ার,  
দুঃখ নেই বেমলবেঠা, জগাতারকা থার শিক্ষার ভাণ্ডার।  
মানুর মনর প্রেম রসে পাহক আনন্দর হাওয়া,  
প্রকৃতিরে জিঙক দুঃখ নেয়ইবতা।  
ঔ মনে হারৌ হারৌয়ে পাহিয়ার এ এলা ছনকা হাবিয়ে,  
দ্বিদিনর জনম অইলেউ ঙালক জ্ঞান গুণর মিঙালে।  
জাত বেজাত বেধর্মি হাবিয়েও মানু পৃথিবীরমা,  
বানা প্রেমর আদর নিঙে পাহক হারৌ আনন্দ বুজিয়া।  
সৎ ধর্ম কর্মর আদর যতন বিভোর করের হাদি,  
হাবির মনে আনন্দ দেব, আনন্দই শান্তি।  
সৃষ্টির হাবি জীব থাকা আনন্দ হারৌরমা,  
হাবির মিলনে পৃথিবী পালক ইঙাল ঙালয়া।  
ব্যাদি নেয়ক, মঙ্গল অক হাবির জীবনে,  
সুখী অকা দুঃখ নেয়য়া এ জাতরমা,  
বানা প্রেম আনন্দে ছনকা মহৎ জ্ঞানর কথা।  
বিশ্ব শান্তি এসাদে অর হাবিয়ে মনেইলে,  
হাবির মনে শান্তির পবিত্র তুলসী ফুল  
ফলে পালক আনন্দে।  
দুঃখ নেয়ইতয় পৃথিবীর মাজে চিরশান্তি বহিয়া,  
হাবির হারৌ আনন্দ পালইতয় পৃথিবী ইঙাল ঙালয়া,  
মানবতার মহান হাদিরমা।



## ইমা লক্ষণা

### জীবনে নুঙেই অনা

চরিত বেবার হবা অনা, বিদ্বান জ্ঞানী অনা  
শাস্তি কাম না করানি মহৎ অয়া থানা।  
কাম করানি বলি জগাতা হেইচিঙে,  
হবাতা বাছিয়া থানা ব্যাধি নানা থাইতে।  
হাবির লগে বানা প্রেমে থানা তিলয়া,  
হবানেই কামল তিতা নানা, শত্রু নেয়না।  
নিজর কামাইর ধনে হিসাবে থানা না বুরানি লোভে,  
পাপ কর্মই দুঃখ দেয়, কত শাস্তি অর অনাচারে।  
ঋন নেয়না, যেতা আছে উতাত পেলয়া থানা,  
হিসাবে মন বান্ধিয়া চললে না পরতেয় বিপদরমা।  
মহৎ মন মহৎ জীবন আদর্শ পূণ্য কর্ম অনা,  
অভাব দুঃখ নায়া থানা চিন্তা সৎজনরতা।  
মহৎ কর্মর ফলে অর হারৌ অয়া থানা।

- ০ -

### গঙ্গা

মি সত্যন্ত বহিয়া আছুগ,  
মি পবিত্র বুলিয়া মোরে মাস্তারা গঙ্গা পবিত্র।  
কিন্তু মি কিতা মাস্তু  
যত আবর্জনা মানুয়ে গজে বেলতারা,  
মরা পচা হাবি যত অনাচার বাছয়েয়া এরাদিতারা।  
এবাকা মি পবিত্র বুলিয়া মাতে নুয়ারৌরি,  
হাবিতা পচিয়া বাহিয়া যারগা পচেছু মি।  
তেব মি ছতল ঠেলেয়া আবর্জনা তলেদে নেউরিগা,  
মানু জীব হাবিয়ও পানি পিয়া রক্ষা পাকা বুলিয়া।  
সৃষ্টি রক্ষার এ আদেশ পালন করৌরি,  
প্রভুর সৃষ্টির ধর্ম রক্ষাত বহিয়া থাউরী।  
যমুনা ব্রহ্মপুত্র নর্মদা হাবিয়ও বহেছি এসাদে,  
হাবিয়ে গিয়া তিলয়ারগা সমুদ্রর মাজে।

- ০ -



## আহ আহ আহ

আহ আহ আহ জয়ধ্বনি দিয়া আহ,  
জয় সুদেশগর জয় বুলিয়া লৌদে লৌদে মাত ।  
১৬ই মার্চ ১৯৯৬ ইং সুদেশগই  
বিষ্ণুপ্রিয়া মণিপুরী ঠাররকা শহীদ আছে দিনহান,  
পাথারকান্দিত রেল বন্ধ আন্দোলনে  
বেনার ধরিয়া আটকাছিলো রেলহান ।  
পুলিশে গুল্লি করলা  
মরিয়া শহীদ অইলি জয় বিষ্ণুপ্রিয়া মণিপুরী বুলে বুলে,  
সমাজর ঠারহানরে কতি বানাপাছে ।  
উসাদে একিন সেবা কইগই পারতারাতা,  
ধন্য ধন্য ধন্য সুদেশগ,  
ঠারহান সরকারে দিল তেই মরিয়া ।  
আহ আহ আহ সমাজ নিঙে আহ,  
কৌলি দুঃখ বেলেই আগরে আগই ডাহ ।  
ফুল আনিয়া সাজেই সুদেশগর শহীদ বেদিগরে,  
নুংশি এলার সুরে গেই ছনকা হাবিয়ে ।  
কতি মহৎ মনল মরিয়া জাতহান পালকরল,  
বিষ্ণুপ্রিয়া মণিপুরীর আন্দোলনর ইতিহাস থইল ।  
লৌদে লৌদে মাত - জয় সুদেশগর জয় বুল,  
হাবিয়ে জাতহান পালকরানির সংকল্প কর ।

- ০ -

## অর্জুনর দুঃখ

কুরুক্ষেত্র যুদ্ধত ভীষ্ম অর্জুনর কার বিধেছে  
উতার কফে দরফর অয়া সেক দের,  
উপেয় পেইরাক সেন্ধাত অর্জুন গিয়া ফওইলগা শিবিরে দেহিয়া  
অভাক ভীষ্ম এসময়ত এবাকা পার্থ কিয়া আইলেতা বুলের ।  
ইপুথৌ কিহানাত পরলাংতা, কিসাদে মি ইপুথৌর লগে যুদ্ধ করতৌতা,  
কারগ বিধিয়া কতি হিনপারতা মোর কারগই বিধেছেতা



## ইমা লক্ষণা

বুলিয়া অর্জুন কাদের জুরিয়া।  
ভীষ্মই মাতের - পার্থ কিয়া যুদ্ধত উবা অয়া মনহান দুর্বল কররতা  
উহান না খাটের বীররতা,  
তি হে মোরে বিধেইতেনাই  
মোর বরদান ইচ্ছা মৃত্যু অইলেউ মরতো বংশর আতরমা।  
নাকাদি এর যুদ্ধ করিছ মোরে কারল বিধা বিধা,  
ইপুখৌ চৌদ্দ বসর বনে গিয়া নাদেহিয়া  
কতি খৌরাঙে অইলুতা দেহানি মনেয়া।  
ইপুখৌ মি কিহান করলুতা কারগ বিধেয়া,  
ইপুখৌর আদরে ডাঙর অছিলাং উহান পাছরে নুয়ারৌরি,  
মি পাপ করলুতা।  
ভীষ্মই উঠ না কাদি যুদ্ধ করানি লাকতয় বীরর বীরত্বল, যুদ্ধ করিছ যাগা,  
অর্জুন গেলগা হমাদিয়া আহির পানি পুছিয়া পুছিয়া,  
খানি পিছে দুর্যোদন হারপেয়া সৌওইয়া  
আয়া ভীষ্মদেবর কোঠাগত হমেইলগা।  
ইপুখৌ অর্জুনতে কিয়া আহেছিলতা কিহান আয়া বুলেইলতা মাত,  
ভীষ্মই মাতের মোর নাতিয়ক উনা অইতনাই  
দুঃখ পেয়া আহেছেতা দেহা করাত।  
দুর্যোদনে মাতের মিতে ইপুখৌ নাতিয়কগ নাগইথাং ?  
না তি যুবরাজগ, তি মোরে আদেশ কররগ,  
কুরাং ইপুখৌ বুলিয়া আংকররতা,  
শকুনীয়ে মাতের মাতুল পঞ্চপাণ্ডবরে নিয়াম বানাপার  
উহানল পাছরে নুয়াররতা,  
উহানে অর্জুনে কার বিধেইতে যাপাতিয়া নাসওইয়া আদরর যারী দরতা।  
ভীষ্মদেব কারগর বিধার যজ্ঞগাই ফামহানাত পরিল খানি জিরেইং বুলিয়া,  
ভীষ্মর মনর টান থাইলেও যুদ্ধ ক্ষেত্রত ক্ষত্রিয় ধর্মরমতে  
যুদ্ধ করের শ্রেষ্ঠ যুদ্ধাগ অয়া।





## কিহান অইলাতা

হবাই - কিহান অইলাতা  
আমার জাতর মানু এতা,  
কৌলি দলাদলিত গইগ অয়া  
পাগল মেরাক জ্ঞানহারা কিহানরকা।  
আকতাই ক্ষতির মাজে ক্ষেতি করিয়া  
কিহান ফল পেইতারা,  
কামে কামে বিরোধিতা  
কিহানরকা এমাটিক হিংসা।  
আকতাই বেজাতিরাং নিঙল দিয়া  
কিহান ইজ্জৎ পেইলা,  
আকতাই বেজাতির নিঙল আনিয়া  
কিহান ছয়াত পাছিতা।  
সেপ গিলিয়া জলে নালে  
উতার রাধা খেইতারা,  
আল্লি উটি নেই বেমলবেঠা  
লেবেনচুস পারা চুয়েইয়া গিলতারা।  
যেতারাং চিনত নেই, ঙক্ষি নেই,  
নেই মাংসেং, সকাশকি,  
মাঙইলে হিনানি নেই মলে গামে  
গেরুয়া, অনাচার উটাপিটি,  
কিসাদে পিতারা উতার আতর পানি।  
আকতাই জ্ঞাতি স্বগোত্র লকেই সাকেই  
চিনত নেই ছানিয়া থাছি অনাচারে,  
জাত রক্ষা ধর্ম রক্ষা গীতার কথা  
নেই কোন জ্ঞানে।  
পৃথিবীর হাবিবয়ও গইগ অছি  
নিজরে পালকরতে ঙালকরতে,  
আমার কৃষ্টিয়ে জিঙে উহান  
খিয়াল নেই আমারতাতে।



## ইমা লক্ষণা

চুম চুমনেই, থক থকনেই  
পণ্ডিত শিক্ষিতও না বাছলা,  
উহানে নৌগ ঠিকনার ছতে বেইতে  
বৈঠা চেতকো না ধরিয়া।  
শাকতি উহান শাকতি বুলিয়া  
বিচার নার কিয়া কোটে,  
অনাচার আচার বিচার নেয়ইলে  
প্রভু পূজা নালর মন্দিরে।  
বিষ্ণুপ্রিয়া মণিপুরীর শ্বুলাকাং গৌরিয়া ধর্ম  
পূজা তুলসির মান্না,  
জাতহানরে বানাপেয়া যতনে আদরে  
রক্ষাকরো জ্ঞানরমা।

- ০ -

## আমি ভারতর সৌ

আমি ভারতর সৌ ভারতর নাগরিক দেশর মিঙালর তেরা,  
বিদ্যা গুণ আমার অলঙ্কার জ্বলকার দেশরমা।  
চহা আমার হিন্দুদ ঠৌনা, সাহস আমার কথা  
গুণল গালনা আশা,  
সততা মহত্বতা আমার মনর আচরণ,  
দেশর মান রক্ষা আমার প্রতিজ্ঞা।  
ভারত আমার ইমা, আমার জন্মভূমি,  
যে মাটিত আমি জরম অছি আমার গুণর আদর্শই  
গালকরতয় ইমার গুণর যারী।  
হাব্বিরাং থাইল আমার এহান কথা ভক্তি শ্রদ্ধা,  
দেশর মহাপুরুষ দৌ জ্ঞানীর পথে আমি যেইতাঙাইগা।  
ভারত ইমার গুণর হনার ইতিহাস পালকরতাঙায় জগতরমা,  
আমার ভারত ইমার গুণ গেয়া গেয়া।

- ০ -



## মহৎ উতাই মানু

মানু এতা জ্ঞান গুণ সংধর্ম বিদ্যাই ঙালইতারা,  
অধর্ম পাপ হিংসা অহঙ্কারে বিনাস অইতারা।  
হারপা হারপা লোভ মোহত জ্ঞান পাহরতারা হাবিয়ে,  
মিশা পাপ বদনাম অর শক্তি কামর ফলে।  
উহানল মানুত কত্তথাক অইতারা,  
অল্প শিক্ষিত অশিক্ষিত, জ্ঞানী, অজ্ঞানী, পাপী, কর্মল লেপইতারা।  
শিক্ষিত জ্ঞানী মহৎ অনা নিয়াম ধৈর্য্য জ্ঞান লাগের,  
মান ইজ্জৎ উতারতা থার লোভ লালসা অনাচার  
কামে তানুরে তলেদে না আচুলের।  
মহৎ জ্ঞানীর জীবন ইঙাল ঙালর গৌরবরমা,  
অজ্ঞান পাপ অইলে জনম পর জনম যারগা মাঙয়া,  
মহৎ গুণ জ্ঞানে সম্মান ইজ্জৎ অর মানুরতা।  
চৌরাশি লক্ষজুনি ভ্রমণ উতাত মানু শ্রেষ্ঠ,  
উহানল সংকর্ম করিয়া যানা জনম জনম থাইবতা শ্রেষ্ঠত্ব।  
মহৎ জনর মহৎ কামে মহৎ জনম অনা,  
মহত্বতাই শ্রেষ্ঠ জীবন অর হাবিরতা।  
মহতর মহৎ জ্ঞানে এসাদে ঙালর জীবন  
উহানে মনুষ্যই অইতারা শ্রেষ্ঠ জীব জগতরমা।

- ০ -

## সংজ্ঞান

সংকাম সংধর্মই নেরগা জ্ঞানর পথে,  
ধর্ম কর্ম ঠিক নাইলে যানা কুপথে।  
কুপথে আধার বিপদ বিপাকে বেলার,  
সংপথে সংকামে জ্ঞানর মিঙাল দেহার।  
সংপথে যেইতেগা সংজন পেইতেয় লগে,  
মনর হারৌ আনন্দত ঙালর জীবন সংগুনে।  
সং আশার হারৌয়ে থাইতেয় দিন ভবে,  
কৃষ্ণ কৃষ্ণ বুলে পারতেয় সংজ্ঞানর ভজনে।

- ০ -



## ইমা লক্ষণা

### মনা

হবাহান মনা, হবা কথা টটরা,  
হবা কাম কর, শান্তিতা বেলা।  
হবাহান দেখ, হবা উহান চা,  
হবা পথগল যাগা, হবা ফাম ফওগা।  
হবা মানুর সঙ্গ কর, হবা কথা ছন,  
হবা উহানে মাতের, হবা উহাম চুম।  
মঙ্গল অর হবা কাম উহানে,  
হবাপেইতারা বিদ্বান গুণীর হবা বেবার আচরণে।  
হবা উহান ঠিক, হবা উহান অভ্যাস কর,  
হবা উহানে জয়র জয়ধ্বনি অর।  
হবা উহানল উন্নতি করতারা,  
হবা গুণল মানু পালইতারা।

- ০ -

### বৈশাখ আইলে

বৈশাখে মেঘালা অর হাকহান,  
বৌ আনের দিন গুজুরিয়া,  
উবাকা কেরবং রকতারা নুংশি সুরে  
গাতে গাতে বুজিয়া।  
সুখী উতার বিয়া অর পারা কতি হারৌ মনে,  
নাগারাসি বাজের পারা কত কত সুরে।  
নংকুপি রকতারা গাছে হারৌত বরন অইতয় বুলিয়া,  
পাহিয়া পলি ফরদিতারা কতি হারৌ অয়া।  
পহরির পানিত মাছ ফালদিতারা নাসে নাসে,  
আলুয়াই লাঙ্গল হংকরানি অকরতারা হারৌ হারৌয়ে।  
ক্ষেতি অইতয় বুলিয়া কতি হারৌ অইতারা,  
সংসারে হাবিয়ও হারৌত থানা মনেইতারা।

- ০ -





## ইমা লক্ষণা

### কনাকর খুরাক

রঙে রঙে প্রজাপতি ফরদিলে মি হবা পাউরী  
কত ফুলর নুংশি গত মি নুংশিপাউরী।  
উসাদে বেলিয়ে মিঙাল দিলে মি ঙালৌরি,  
গুরুয়ে সেংকম দিলে ছয়াত পেয়া পিউরী।  
ক্ষুতি হবা অইলে বারন বুজের ধানে,  
হৌপাত ক্ষুতি করলে দুঃখ নেয়র ঘরে।  
ইমার বানা বেইবুনির প্রেম নিয়াম হবা পাউরী,  
হাবিয়ে তিলয়া থাইলে ঘরে কতি শান্তি।  
পরউগউ মোরাং নিজরগ, বেদাবেদ নেই মোরতা,  
উহানল ফুলরে হবাপাউরী নিয়ামপারা।  
হবা উহান হবা শান্তি উহান শান্তি,  
মি হবা অয়া থানা নিয়াম মনাউরী।

- ০ -

### মুক্তিয়ারর খেলা

গাংঘরর কৌলির নেই সীমা, আজিও বিচার কালিও বিচার,  
মুক্তিয়ার নিয়ামপারা।  
দলাদলি করিয়া ঘর খেইকরতারা,  
এগর ঘরে হৌগর ঘরে গিয়া খেয়া খেয়া আটতারা।  
আগর হিংসা আগরে গেয়া ডুয়াখচিয়ে ঘর বাগের বৌবরন নাইতে,  
বেইবুনিয়ে বেইবুনিয়ে সেদাসেদি অইলে কুমেই চেইতারা হারৌয়ে।  
প্রেম প্রীতি সমাজ মাঙর না খালকরতারা,  
শত্রুরাংতৌ জিঙে তানু ক্ষুতি করতারা।  
এসাদে ক্ষুতি করতারা উতারে জাতর শত্রু বুলতারা সৎজনে,  
জ্ঞানী জনর নিন্দাই ভষ্ম অইতারা লয়ইতে।  
কিহান লাভে এ ব্যবসা কিয়া করতারা,  
সত্য উহানরে কিয়া না লেপকরতারা।  
মুক্তিয়ারে কোনদিন ঠিক বিচার নাকরতারা।

- ০ -



## জগতর সৃষ্টি

টেঙারা এতা উচ উচ করে কুঙ্গই হংকরেছে,  
বেলি জুনাক মিঙালরকা হংকরিয়া কুঙ্গই এতা থছে।  
কুঙ্গই গাট খং খুলিয়া পানি এরাদেরতা,  
বিল, সাগর, সমুদ্র খুলিয়া কুঙ্গই পানি জমার কিয়া।  
মানু পাহিয়া পলি জীব বুজে  
কোটি কোটি জীব কিয়া সৃষ্টি করিয়া থছে,  
গাছ বিরোগ লতা পাতা কিয়া রুয়েয়া বুজাছে।  
রইদল বিল ঘাট সমুদ্রর পানি বাষ্প করে কাকরের,  
উতা কায়া টেঙারাত থেঙতে ইঙে মেঘালা বরণ অয়া পরের।  
বরিষারমা বরন পরের বৌবরন দের,  
কিয়া সৌওয়া ভৈচাল দিয়া দিয়া প্রলয় চুরমার করে।  
ফল, ফসল গাছে ধরের হাবিতা,  
উতা খেয়া হারৌত থাইতারা এ পৃথিবীরমা।  
মানু এতাই এতা খালকরিয়া উপাই নাপেইতারা,  
জ্ঞানী বৈজ্ঞানীক বুলিয়া নিজরে নিজে নিংকরতারা।  
আংকরানির মানু নেই আংকরতা কারে,  
ঈশ্বর বুলিয়া আছে উগ থার গোলুকে।  
তেব হারৌত থানা অইলইছ  
মানুরাং প্রেম নিং থাইলে নিয়ামপারা,  
মানুয়ে না খালকরতারা মানুরে হংকরেছে কিয়া।  
তেব মানুয়ে জিঙে জ্ঞানী জীবর মাজে,  
জগতে হিংসা পাপ কর্ম নেয়ইতয় মানুয়ে হবা অইলে।  
ঈশ্বর কুমেই চার সৃষ্টি করিয়া,  
কোটি কোটি জাত জীব দুগই তিলনেই,  
কতি হবা নিখুত সৃষ্টি মাতিল উপমা নেই।



## ভারতর কথা

ভারতবাসী সৎধর্মর কর্মর মিঙালর পথে আগুয়াকা,  
হাবিয়ে গেইবাতা হারৌর এলা।

ঔ জীবনর মিঙালর মাজে নিকুলকা লক্ষ লক্ষ তেরা,  
ইঙাল ঙালইবতা কোনাই কোনাই হাবিতা।

কোটি কোটি দৌ যেসাদে ঙালকরেছি স্বর্গধাম,  
উসাদে অই হাবি জ্ঞানী মহান।

দেশ ঙালর দেশবাসী ঙালইলে গুনে জ্ঞানে,  
শয্য শ্যামলা অয়া বুজের ফসলে ফুলে ফলে।

উপেয় আনন্দর বৌ বহিতয় দেশরতা,  
প্রেম বিরাজ করতয়, নেয়ইতয় দুঃখ দুর্দশা।

বানা আদরে ডাকতায় আগরে আগই,  
উবাকা অইতয় সুখ শান্তি দুঃখ নেয়ইতয়।

মহান ভারতবাসী এব এক অয়া যেসাদে আছি,  
হাবি হবা অকা, নেয়কা অত্যাচারী সন্ত্রাস চর ডাকাটি।

হবানেই কাম হবানেই চরিত্র নেয়ক আর জগতে,  
ভারত অক মহান দেশ জগতর মাজে।

ধর্ম কর্ম মহাজ্ঞান হাবি ঙালক,  
মহত্বতাত হাবির গজে ভারত অক।

শিক্ষা জ্ঞান গুন হাবি পালক অজ্ঞান নেয়কা,  
শিক্ষার গুণে হাবি ঙালকা।

ধনে জ্ঞানে মানে পালকা হাবি সুওয়া,  
অভাব দুঃখ ভারতে নেয়ইবতা।

ধবংসর মহাপ্রলয় নাহক সংহার করানিত,  
ধবংস নাকা কাদিল আহির পানিত।

ঈশ্বর রক্ষা করক ভক্তর ভক্তিরমা,  
হাবির ভক্তিত করক একুপা।

যুগে যুগে ভারত ঙালক পালক জগতে,  
হাবির সুখ শান্তির আশা পুরক মহৎ কর্মর মাজে।



রাস বিশ্রামর এলার কবিতা

(১)

ঘুমে পরলা রাধাকৃষ্ণ না টটরেয় সখি  
না রহিয় পাহিয়া পলি  
না লরিয় গাছর পাতা হাবি,  
না রহিয় শুকসারী।  
তুমি রকলে রাধা কৃষ্ণর ঘুম বাগতয়,  
রাধা কৃষ্ণর মিলন ব্যাঘাত অইতয়।  
কতি হবা ঘুমজেছি চেই কলনাকলনি করিয়া,  
মনি মুক্তা যেমন জ্বলকের নিকুঞ্জমন্দিররমা।  
গরম অইলে বৌদিয়ার আমি সখি হারৌ হারৌ অয়া,  
রাধাকৃষ্ণর সেবারকা জরম অছি আমি ব্রজরমা।  
পরম সুখ শান্তি রাধাকৃষ্ণর সেবা করলে,  
জগতর দুঃখ কুরাং যারগা,  
একিন মনে সৎ অয়া ভজলে।  
জনম জনম দাসী অনা আমার  
কামনা, মাগিয়ার দিনরাতি।।

- ০ -

(২)

চেই চেই রাধাকৃষ্ণ ঘুমজেছি নিকুঞ্জ মন্দিরে  
ছনার থাম্পাল জ্বলকার পারা, সমুদ্রর মাজে।  
কৃষ্ণর লগে ঘুমজেছে রাধা চিরশান্তি ধামরমা,  
কৃষ্ণপ্রেমর আনন্দে ঘুমজেছে হাবিতা কাতকরিয়া।  
তা দেছে আহি নাক কান দেহ আত হাবি,  
তারতা তারাং দিয়া রাধা ঘুমজেছে ওয়াই সাঙয়া কতি।  
জীবর দুর্লভ ধন কৃষ্ণ প্রেম পেয়া বিভুর রাধা,  
লগে ঘুমজিলি হারৌত পাছরেছে হাবিতা।  
লাজমান কুল ভয় বিসর্জন দেছে চরণে কাতকরিয়া  
উহান পারেছে হৃদা শ্রীমতি রাধা।  
মোরেও প্রভু থদে চরণে বুলের নরেনে।

- ০ -





## ইমা লক্ষণা

(৩)

কৃষ্ণ প্রেম মনি ধন পানা খৌরাং আমি সখিরতা,  
ছনা মনি ধন সম্পত্তি না লাগের আমারতা।  
কৃষ্ণসেবা খৌরাং অয়া আমি জরম অছি ব্রজে,  
আমার খৌরাং থুঙর কৃষ্ণরে পেইলে।  
রাধার লগে যুগল মিলন নিক্কা দিয়ার আমি,  
ছন্দা উহানরকা আমি ব্রজে জরম অছি।  
যুগল সেবাত বিভুর অয়া যারগা দিন আমারতা,  
যুগল সেবা বিনা না লাগের আরতা।

- ০ -

(৪)

ঘুমে রাধাকৃষ্ণ দ্বিয়গির দেহ মন কামনা  
হাবি এক অয়া তিলছে,  
কলনা কলনি করিয়া আকগ দেহ অছি দ্বিয়গি ঘুমে।  
কতি হবা অপরূপ শোভা নিকুঞ্জ মন্দিররমা,  
কতি ভাগ্যবতী শ্রীমতি রাধা,  
হারৌত ঘুমজেছে কৃষ্ণরে পেয়া।  
জীবর দুর্লভ ধন নন্দর নন্দন শ্রীকৃষ্ণ গুনমনি,  
অবতার দ্বাপর যুগে ভক্তর ডাকে কাতল আরৌ দৈবকী।  
ভক্তরূপী শ্রীমতি রাধা করিরি কতি ভক্তিত কৃষ্ণসেবা,  
কুঙ্গই পারেছিতা এসেবা  
প্রভুর হারৌর নেই সীমা।  
কৃষ্ণসেবা সুখধাম আনন্দ স্বর্গ দুর্লভ,  
কতি হারৌ ব্রজর সখি রাধাকৃষ্ণর যুগল সেবাত রত।  
শ্রীকৃষ্ণর কৃপাত ধন্য জীবন অর মাতের নরেনে।

- ০ -

(৫)

রাধাকৃষ্ণর কতি প্রেম ভক্তি দিয়া চুমাচুমি,  
দ্বিয়গির হারৌ কতি দিয়া কলনাকলনি।



## ইমা লক্ষণা

নিকুঞ্জ মন্দিরে মাতের ধন্য মি বৃন্দবনে,  
রাতিহানে মাতের ধন্য মিলা দিয়া রাধাকৃষ্ণরে ।  
সখিয়ে ঘুমজা দিয়া হারৌ অয়া চেইতারা,  
কতি হারৌ আনন্দে ঘুমজেছি যুগল অয়া ।  
দ্বিয়গির দেহ মন হাবি এক অয়া তিলছে,  
এক অঙ্গে অছি দুগ লীলার কারনে ।  
কলকরিয়া রাধারে ঘুমজেছে শ্রীকৃষ্ণ,  
কতি হারৌ অছে আজি পেয়া রাধাসঙ্গ ।  
কৃপা করনে প্রভু মোরে দে সখির এ ভক্তি,  
হমাদিয়া মাতের নরেনে কৃপা কর নকখানি ।

- ০ -

(৬)

(লালসা প্রার্থনা)

মন কোনদিন জরম অয়া বৃন্দাবনে কৃষ্ণনাম গেইতেয়তা,  
কৃষ্ণর সখা সখি ব্রজবাসী ভক্ত অয়া কৃষ্ণসেবা করতেয়তা ।  
বৃন্দাবনে হাবি পূণ্যবান ভক্ত জীব গাছ লতা হাবি,  
উহানল পুণ্য তীর্থ বৃন্দাবন পুণ্য ব্রজর মাটি ।  
কৃষ্ণনাম গেইতারা হাবি সৎভক্ত জ্ঞানীজনে,  
যেতারতা নেই হিংসা নিন্দা পাপ কর্ম অন্তরে ।  
কেসিঘাট বংশীবট নিকুঞ্জ মন্দির গিরিগোবর্দ্ধন হাবি,  
কৃষ্ণই লীলা করেছে আছে ব্রজে সাক্ষী ।  
ব্রজর ধুলী গারিত গছিয়া যমুনাত হিনাগা,  
কৃষ্ণনাম ধ্বনিত যাকগা হাবি ব্যাধি ককয়া ।  
পুণ্য মন পুণ্য দেহ ঈশ্বর সেবার যোগ্য,  
জনম জনম কৃষ্ণসেবা করবেতা একিন হাদি মনল ।  
হমাদিয়া মাগ প্রভুর চরনে পরিয়া  
ব্রজরমা গেলেগা হাবিয়ও ধন্য অইতারা ।

- ০ -



## ইমা লক্ষণা

(৭)

কৃষ্ণপ্রেম ঠুম কতি হারপাছে রাধা,  
বেলি মেরাক ইঙাল ঙাল কৃষ্ণর রূপহান,  
রাধা কতি হবা পূর্ণিমার জুনাকহান।  
হুনা মুক্তা দিয়তাউ কতি হবা,  
দ্বিয়তার মিলনে ঙালর কতি জুলকেয়া।  
মনি রূপী শ্রীকৃষ্ণ হুনার মাচু রাধা,  
দ্বিয়গির মিলন রাতি কতি জুলকার হবা।  
প্রেমর সৃষ্টিকারী জগৎ ঈশ্বর বিভূলা অইল প্রেমে,  
ঔ প্রেম পেয়া রাধা মন্ত অয়া ঘুমজেছে।  
নাগর নাগরি আজি প্রেমে ঘুমে মজেছি,  
রাধাকৃষ্ণর প্রেমর গজে কুঙ্গই প্রেম করেছি।  
কৃষ্ণরে পেয়া রাধা হাবিবতা পাছরেছে,  
কলকরিয়া ঘুমে পরিয়া কতি শান্তি পাছে।  
এ ঠুম মিলনর প্রেম, জগতে নেই উপমা।

- ০ -

(৮)

প্রেম কতি রাধা কৃষ্ণর উপমা নেই জগতে  
ইকরিয়া লইনার ইকরতে যুগে যুগে।  
বাল্মিকীয়ে ইকরল রামায়ন কতি হবা রচিয়া,  
ব্যাসদেবে ইকরল মহাভারত হাবি তত্ত্ব গিঠিয়া।  
চৌরাশিক্রোশ বৃন্দাবনে কিয়া গুরু রাখল বনে,  
ইন্দ্র ব্রহ্মা হারনাপাছি এতত্ব  
বাশি বাজার কিয়া রাধা বুলে বুলে।  
সখির রাস করল নাসল রাধারে পানারকা,  
যমুনাত সখির বস্ত্র হরণ করল সৃষ্টির লীলা মাতানিরকা।  
কৃষ্ণ নিঙে রাধারানী প্রেমে মন্ত আছে,  
কতি হারৌত ঘুমজেছেতা পেয়া কৃষ্ণ গুন ধনরে।  
নিকুঞ্জ মন্দির আজি কতি হবা অছেতা,  
হারৌত রাধা কৃষ্ণ ঘুমজাদিয়া সখি হাবিয়ে বৌদিতারা।

- ০ -



## ইমা লক্ষণা

(৯)

রাধাকৃষ্ণ নিঘোর ঘুমে নিকুঞ্জ মন্দিরে,  
রাতিহানতে লয়যারগা বেলির মিঙাল আহিল মুঙেদে।  
উঠলা মানু জীব পাহিয়া পলি কৃষ্ণ গুন গেইতারা,  
জাগেইক অইলগা রাধা কৃষ্ণ সখি অকর জাগরণর এলা।  
কৃষ্ণপ্রেমর আনন্দ রাতিহানে হারপাছে,  
কৃষ্ণ গুণ গেইলে দেহ মন ছরিয়া নেরগা কিস্তাউ নাথার লগে।  
রাতিহান ফুওয়ার বুললে দুঃখ লাগের অন্তররমা,  
কৃষ্ণপ্রেম আনন্দ লীলা নার দিনরমা।  
বেলেয়া নিজর ঘরে যানা নাহের মনে,  
কৃষ্ণরে বেলেয়া যানা দুঃখ আধার নিঘোর বনে।  
তেব উঠেই উঠেই প্রাণ সখি তাপ্ত তাপ্ত নুংশি এলা গেয়া,  
জনম জনম যুগল সেবার এ আনন্দ পেইবাংতা।

- ০ -

(১০)

সখিয়ে খালকরতারা দুঃখই কিসাদে জাগানি রাধাকৃষ্ণরে,  
কতি নুঙেইর ঘুমহান বাগতয় রাধাকৃষ্ণরে জাগেইলে।  
হারনাপেয়া শুকসারি এলা গানা অকরলা,  
কিসাদে উঠ বুলতাং প্রেম আনন্দ বেলেয়া।  
কৃষ্ণ প্রেম আনন্দ কুংগই দিতাই জগতে,  
কতি হারৌত ঘুমে আছি নিকুঞ্জ মন্দিরে।  
দ্বিয় আহি জুরের সখি জাগেইক বুলতে কৃষ্ণপ্রেম ছিড়িয়া,  
কিয়াও আহিল বিয়ানহান এমাটিক ত্বরা অয়া।  
কৃষ্ণরে বেলেয়া ঘরে যানা নাহের মনে,  
কৃষ্ণই দেহ মন প্রাণ, বেলানি কিসাদে।

- ০ -

(১১)

কতি নুংশি ফুলর ফামে রাধাকৃষ্ণ কতি হারৌ প্রেমে ঘুমজিলা,  
নিকুঞ্জ মন্দিরগ আজি কতি হবা অছেতা।  
ইঙাল ঙাল পূর্ণিমার জুনাকর মিঙালে ঙালছে,





## ইমা লক্ষণা

কতি হবা তেরা হাবি হাকহান জুরিয়া জুলকাছে।  
কলনা কলনি দেহ আকগ অয়া দ্বিয়গিয়ে ঘুমজিলা,  
যেমন ভ্রমর থাম্পালগই মিলন সাগরর পানিরমা।  
কতি হবা শোভা লইনার বর্ণনা করতে,  
কৃষ্ণগুণ মনি ধন কুঙ্গই পাছি জগতে।  
জীবর দুর্লভ ধন সাধন ভজনরমা,  
যুগীস্বমিয়ে ধ্যানে নাপেইল দুঃখ কুঙ্গই হারপেইতাইতা।  
কৃষ্ণপ্রেম মধুর ঠুম যেগই পেয়া হারপাছি,  
কারকপালে দুর্লভ ধন কাছে গইবি।  
ঔ আনন্দত রাধারানী ভাগ্যবতী কতি হারৌ পেয়া,  
কুলমান লাজ হাবি থয়া ঘুমজেছে কৃষ্ণরে পেয়া

- ০ -

(১২)

শরদ পূর্ণিমা রাতি কতি হবা শোভা,  
খুয়ারমা মিঙাল পরিয়া ইঙাল ঙাল জিঙিয়া।  
নুংশি ফুল সিঙ্গারেই গোকুল গঙালার গত নুংশি,  
ফুলে ফুলে বুজিয়া আছে কতি হবা রাতি।  
জুনাকে ঙালকরের কৃষ্ণলীলারকা  
রাতিহানে মনার নিক্কা হারপেয়া কৃষ্ণর রাসলীলা।  
সৃষ্টির হাবির হারৌ কতি রাধাকৃষ্ণর যুগল মিলনে,  
তেত্রিশ কোটি দৌ আছি দেহিল খৌরাঙে।  
পৃথিবী ধন্য প্রভুর লীলা দরশন করিয়া,  
মানুয়ে শ্রেষ্ঠ মানুর মহৎ জ্ঞানরমা।  
জগতে হাবিরে জ্ঞান দেব লীলার মাজে,  
প্রেম বানা ভক্তি সেবা হাবি আছে ভক্তির কাজে।

- ০ -

(১৩)

মোর বিরহ জ্বালাত জাগার তি বাশী রহিয়া নুংশি সুরে,  
হাবি পাছরিয়া প্রাণকাল বুলিয়া জাগের ভক্তি প্রেম অনুরাগে।  
নিংশিং করে দর, সাল সাল বুলর, রাস অভিসারে,



## ইমা লক্ষণা

মাতর ঘরে বয়া নাথায়,  
তরাককৃষ্ণ ভক্তিত আই নিকুঞ্জ মন্দিরে ।  
রাধার জ্বালা দুঃখত হারৌ করর তি বাশী  
কালার থতাত রহিয়া,  
উবাকা মন হাবিতা বেলেয়া,  
কৃষ্ণ দরশনে যারগা হারৌ অয়া ।  
আয়ার সখি হাবি হারৌয়ে কৃষ্ণ দরশন খৌরাঙে,  
জগতে আর কিন্তাউ নেই আমার কৃষ্ণবিনে ।  
হাবি কাতকরিয়া হারৌত নাসিয়ার  
কৃষ্ণর প্রেম ভক্তি খৌরাং মনে ।

- ০ -

## সৃষ্টি (ছড়া)

ফুলর কত রং অর,  
ফলর কত রং অর,  
কিন্তু পাতা অর আসাংপা,  
চহা তিতা ঠুম অর,  
তিল নার আকতা ।  
সৃষ্টিরমা কত জাত মানু জীব গাছ  
তিলনার আকতা চেইতে,  
আকজাতেও দুগ তিলনেই  
আচানক খালকরলে ।  
কাম তিলনার চরিত তিলনার,  
তিলনার অবিয়ব বেবার,  
থানা থানা জিনা মরন  
উতাউ তিলনার ।  
কিসাদে সৃষ্টির বিধান প্রভু  
জ্ঞানে লাগাল নাপারগা ।  
উহানল জগৎ ঈশ্বর  
দেহার কত নমুনা তার সৃষ্টিরমা ।  
দেহিয়া আচানক অনা ।

- ০ -



## শ্রীকৃষ্ণের ভক্তি

কৃষ্ণের রূপহান

চেইতে কতি হবা লাগের,

চেইল মাহেই চেয়া

শ্রীচরণে ধরিয়া হমা দেনা আহের।

জগৎ ঈশ্বররতা

মন্দিরে নিক্কা আরতি করতারা,

গিয়া আরতি গেইলে

মন হারৌ অর নিয়ামপারা।

প্রভুয়ে সৃষ্টি করিয়া

জগতে হারৌ অয়া থায়া,

প্রভুর জগতর ছয়াত ফল ফসল খেয়ার।

প্রভুরে হারৌ দেনার কিস্তাউ নেই আমারতা,

জগতর হাব্বিতা তার সৃষ্টিরতা।

আমারতা বুলিয়া জগতে কিস্তাউ নেই

প্রভুয়ে দিয়া আমি খেয়ার রীতি উহানেই।

প্রভুর কৃপায় আমি বিদ্বান গুণী অয়ার,

প্রভুর কৃপায় আমি জিৎতা অয়া থায়া।

প্রভু আমার ইমা বাবা বেইবুনি হাব্বিতা,

প্রভুরে হমাদিলে পুন্য জীবন অরতা।

- ০ -

## হাব্বি প্রভু তোরতা

প্রভু তোর উপমা কিতাল দিতু মি,

তোর গতিয়ে গতি হে জগৎপতি

তোর দয়া নায়া না চলের সৃষ্টি।

তোর বেলির ইঙাল ঙাল মিঙালে থাউরী ঙালয়া,

জগতর শোভা হাব্বি দেহৌরি তি আহি দিয়া।

তোর কৃপায় ছয়াত্তা খেয়া জিৎতা থাউরী,

তোর কৃপা বিনা মিকুপহানউ থানা নুয়ারৌরি।



## ইমা লক্ষণা

তোর জুনাকে ঙালর রাতি পিউরী তোর গঙ্গা পানি,  
তোর পৃথিবীত জরম অয়া কতি হারৌত থাউরী।  
ধান হৌপাত ফলের হাবিয়ে খেয়া হারৌত থাইতারা,  
নুয়ারতৌ থানা মিকুপহান পাছরিয়া তোর কৃপা।  
তোরে পাছরলে কিতা থাইতয় আরতা মোরতা বুলিয়া,  
তিই মোর হর্গা কর্তা পালন কর্তা রক্ষাকারী মোরতা।  
তোর গুনে মি গুনীগ অউরি তোর গুন মাতিয়া লইনার,  
এ সৃষ্টি হাবি তি চলার, তোর কৃপা বিনা কিতা আছে আর।  
কিতা দিয়া তোরে হারৌ করতু মি, হে মোর পিতা পরম পিতা,  
তোরতা খেয়া তোর পৃথিবীত থাউরী, হাবি তোরতা।  
তি দিয়া ইমা বাবা বেইবুনি, আত্মীয় জাত বেজাত হাবিরেল থাউরী,  
কিতা নাগইতা তি নাদেছত্তা, জগতরতা তোরতা হাবি।  
কারতাউ জ্ঞান নেয়র তি জ্ঞান নাতলে,  
মি পালউরী ঙালউরী থাউরী তোর কৃপার হারৌয়ে।  
হমাদউরী হমাদউরী হমাদউরী প্রভু তোর কৃপার চরণে মি।।

- ০ -

## ফিরয়ে চিন পরিচয়

শাড়ি না পিদি গিদেই জাতর চিন না মাংকরি,  
তি পথেঘাটে বিপদে পরলে তোরে নাইতয় চিনানি।  
নিজর জাতর পরিচয় অর নিজর ফিরই পিদলে,  
আমার ফিরই আঙালুরি তলফুতি কতি হবা চেইতে।  
শাড়ি পিদলে নিন্দা করতায় সমাজর মানুয়ে,  
সুদেষগই জীবন দিল জাতর কাজে,  
তিও তোর জাতর পরিচয় দে।  
হাবি জাতর বেয়াপাই নিজর নিজর ফিরই পিদতারা,  
তোর মন উসাদে অক  
মাতিরি সুদেষগ শহীদ বীরাজনা।

- ০ -





## কিসাদে পৃথিবী আছে (ছড়া)

উচ মাটি উতারে

টিলা টেঙারা বুলিয়ার,

মাটি গাতয়া পানি থার

উতারে বিল সাগর সমুদ্র বুলিয়ার।

টেঙারার পানি লামিয়া

যারগা উতারে মাতিয়ার খং, গাট, নদী,

থল উহানরে মাতিয়ার মান্না মাটি।

টেঙারা সমুদ্র নদী থলে

মানু জীব থাইতারা,

কত গাছ বন জঙ্গল থাকে বুজিয়া।

এসাদে কত জাত মানু ফামে ফামে থাকি,

ঔ ফাম উতারে দেশ বিদেশে গাং

সহর তঙাল তঙাল নাং থছি।

এতা হাবিভাল আছে পৃথিবী,

মিঙালল ঙালকরতারা জুনাক তেরা বেলি।

- ০ -

## আমার হৌওর মাসেল

লেউর পাতার হৌ কতি ছয়াত্তা বুয়ালল রাধলে,

পরমে খন্তুমে মাসেল কতি ছয়াত খেইলে।

গরমে চহার ইরলপা কতিও ছয়াত্তা,

কার্তিকে কতি ছয়াত অর মুরা কচুর ইরলপা।

খলর ইরলপাতে বারো মা খা পারিয়ার,

জাত জাতর ইরলপা পালটই খেয়া লইনার।

কম খরচা পেটে হবা হজক বাতরতা,

মান কচুল হিদল দুক হুকন বাজারেত্ব লয়া।

সংধর্মহানে হিদলেতে না পাহুরানি,

এ দ্বিয়হানিয়ে রক্ষা অছি বিষ্ণুপ্রিয়া মণিপুরী।

- ০ -



## ইমা লক্ষণা

### বীরাঙ্গনা বেয়াপা

বেয়াপা এতা সৃষ্টির অকরাত্ব দায়িত্বত থাছিতা,  
ব্রহ্মা, বিষ্ণু মহেশ্বরর পিছে  
দূর্গা, লক্ষ্মী, সরস্বতী, গঙ্গা অছিতা।  
ব্রহ্মা নাইলে বিধান নার, বিষ্ণু নাইলে পালন নার,  
মহেশ্বর নাইলে নার সংহার।  
উসাদে দূর্গা শক্তিরকা আছে, ভাণ্ডারে লক্ষ্মী,  
সৃষ্টি রক্ষারকা গঙ্গা, বিদ্যারকা পালছে ইমা সরস্বতী।  
সাবিত্রী, সীতা, দময়ন্তী, কুন্তী, মন্দধরী, পঞ্চসতী আছিলি,  
কনকলতা সুদেষণ কমলা জাতরকা ভাষারকা দেশরকা জীবন দিলা।  
ইন্দিরা, বিজয়লক্ষ্মী, সুনিয়া, জয়ললিতা, মায়াবতী মহিয়সী আছি,  
উমা ভারতী, প্রতিভা পাতিল বসুন্দরা রাজে কুঙ্গ কমছি।  
উচ্চ শিক্ষা করলা আমার বেয়াপা ময়না সুখজ্যোতি  
কুমকুম নন্দিতা চন্দনা আরতাও কততা,  
বিজয়লক্ষ্মী মন্ত্রী অইলি নিরুপমা বীনা তেজিমালা,  
রিতা আরতাও আছি বুজিয়া।  
ক্ষেতিরমা খাংচেৎ বাদ্ধিয়া কাম করতারা বলি,  
কতি হবা ফুতি বুনিয়া সংসার ধরেছি।  
সাত হবা চরিত হবা, বেবার হবা শিক্ষাল ঙালয়া,  
বিশ্বর হাবি গুণী নারীর লগে আছি পালয়া।  
ছনার কাঠি লিকসই পিদিয়া কতি হবা অইতারা,  
পলেই লাগেয়া গোপী অয়া কতি হবা নাসতারা।  
নিজর গৌরিয়া রীতিল হাবিরে জিংতারা।  
তলফুতি ইনাফি পিদলে কতি হবা অইতারা।

- ০ -

### ডাক্তার

ডাক্তারর এ জনম অক, এ জনম নাক, আগে হারপেয়া লেপনি মন,  
সংকল্প করানি আগে মানুর সেবাত কাতকরতেই এ জীবন।  
রাতিদিন জিরন নেই, যেপেয় ডাকতাই যেইতেয়গা উপেয়,  
খানা নেই পিনা নেই, জিঙে মানুর সেবা নিংকরতেয় উহানর গজে নেই।  
ঔ সেবা উহানর নাং ডাক্তার, বিদ্বান অয়া ডাক্তার অইতারা,



## ইমা লক্ষণা

সৎসংকল্পল ডাক্তারী তামকরতারা।  
ঔ মন যেগর অর উগর জয় অর,  
উগই আসল ডাক্তারগ অর।  
নিষ্কা নিষ্কা ব্যস্ততা জিরন নেই সদা,  
হীনপেইল হীনর খালকরিল সময় নেই  
নার কারৌ লগে টটরানি হারৌর দ্বিকথা।  
রাতি মেরাকে আয়া উঠেইতারা নুওয়ারা চানারকা,  
ঘুমর খুংকুল নেই, ঘুম নেই চিকিৎসাত যানা।  
বেলিরতাউ জিরেইল রাতি আছে,  
মেঘলাই গুরের, জুনাকরতাউ দিন আছে,  
কিন্তু ডাক্তারর সময় নেই হইত মরন আছে।  
উহানরকা অনেকে ডাক্তার নাইতারা,  
ডাক্তারী বিদ্যা না মনেইতারা।  
মূল ডাক্তার অইতে, ঔ মন অইতে পারতারা কইগই,  
কুংগই খালকরের এতাহাবি, হুদা হারপার যেগই ডাক্তার অইতয়।  
হাবি জীবনে এ জীবন গজে, হাবি সেবাত এ সেবা জিঙে,  
এ ভাব এ ভক্তি শ্রদ্ধা খৌরাং আশা না জাগের আরতার মনে।  
কাততারা পেইরাক কোন গরে বালাকরে নুয়ারিয়া,  
বালাকরে পারলে কতি আনন্দ হুদিরমা।  
এসাদে হীনে হীনে কতি হীন এ জীবন এসাদে যারগা,  
কোনগই দুঃখই আকয়া আর ডাক্তার নাইং বুলতারা।  
বুরা অয়াও জিরানি নেই, নুয়ারা অইলেও এরানি নেই,  
নিজে হজক খেয়া চিকিৎসাত যানা লাগের উবা অনি নেই।  
মানুর সেবা পেলনি অর,  
তেব না মরিয়া সেবা করিয়া থাইল মন অর।  
জন সেবাই ভগবত সেবা তেব ঈশ্বরর নাম লনা,  
মাগানি লাগের পানারকা জনম জনম এ সেবা।  
ঈশ্বর হারৌ অয়া বর দের হারপেয়া উপযুক্ত সেবার ভক্ত গুনীজন,  
ঈশ্বরর কৃপায় অর বারো এসাদে সেবার জনম।  
ধন্য ধন্য ডাক্তারর জীবন।।



## ইমা লক্ষণা

### সৎজীবন

জীবনে সৎজন অনা কঠিন নাগই,  
জীবনে সৎপথে চলিয়া যানা অসাধ্য নাগই।  
হবা মনল হবা পথে যানা,  
সৎসঙ্গ কর সৎজন চিনিয়া।  
সৎমনে সৎকাম করানি মনা,  
বিদ্বান গুণী মহৎজন অনার ইচ্ছা থানা।  
সৎমন অইলে সৎকামর মঙ্গলর পথে যানা পারতারা,  
কুকামল পাপী অনা না মনেইতারা।  
সৎমনল বিদ্বান গুণী অয়া জীবন উজ্জ্বল অর,  
সৎকর্মল সৎজ্ঞানল সৎপথে যানা অর।  
উসাদে সৎজনর সৎপথগ ইঙাল ঙালর,  
সততার সৎকর্মল আনন্দর জীবন লেপর।

- ০ -

### প্রেম বানা

বানা প্রেম আদর নিং এতা কিসাদে হঙছে,  
রোগ লুয়া হুনা ও নাগই  
আহিত না দেহিয়ার চেইতে।  
অন্তরে বাদিয়া থার মানুর প্রেমল জাগার,  
আপেল আঙ্গুরেস্ত ও হুয়াত খেইল মাহেই লইনার।  
প্রেম বানাই জগৎ এহান ধরিয়া থছে,  
প্রেম নেই উগই না খালকরের মানু মারতে।  
আদর যতন প্রেম থার সৌ বুজন হাবিরাং,  
পেলর মনহান প্রেম আদর পেইলে মানুরাং।  
হাবিতাও নিয়াম খেইলে পেট বুজের বুলতারা,  
প্রেম বানা পেলনি নেই বানাপেইল মাহেই নারগা।  
দৌওর সেবা মানুর সেবা ও মনল অইলে হবা,  
প্রেমর গজে নেই আনন্দ জগতরমা।

- ০ -





## ইমা লক্ষণা

### সংকর্ম

লেরিক চানা মনার উগ শিক্ষিতগ অর,  
সংজন অনা মনার উগ সংপথগ ইলর।  
হবা মানুগ অনা মনার উগ হবা কাম করের,  
পাপ কর্মই তারে আচুলে নুয়ারের।  
সংকর্মর কথা সংধর্মর লেরিক পাকরানি মনার,  
সংকর্মল সংফামে ঘর হংকরিয়া থার।  
হবানেই মানুর কাদাত থানা না মনার তা,  
হবানেই কামে পাপ তা হারপার জ্ঞান উপয়া।  
কিন্তু পাপীর পাপ কর্মর পাপে নেরগা তলেদে,  
পুণ্যবানে যারগা সংকামল স্বর্গর পথে।  
সংজন সংকর্মল জীবনে ভালনা পারের,  
সংকর্মর গুণে জীবন অমর থদের।

- ০ -

### কৃষ্ণনামর গুণ

সংধর্ম অবহেলা করের যোগ নিকা,  
পাপর গাতে হমার পাপে থর যাতেয়া।  
অনাচার পানি পিয়া ব্যাধি অর যেসাদে,  
কুকর্মই নেরগা আচুলিয়া পাপর পথে।  
হবানেই কামরকা বদনাম জেল কত শাস্তি অর,  
পাপ কর্মরমা দুর্লভ জনম অনাহকে লয়র।  
উহানল সততা সংভাবনা ভক্তি অন্তরে থনা,  
সাবনল হিনেইলে যেসাদে মল সেচে সেচে যারগা।  
মন পবিত্র নাইলে ভজন সাধন নার।  
মন পবিত্র অর ঈশ্বর স্মরণ যদি থার।  
কৃষ্ণনামর গুণহান কৃষ্ণ নিং  
থাইলে পাপ হমা নুয়ারের,  
কৃষ্ণ নামে মানুরে জ্ঞানী পরম ভক্ত হংকরের।

- ০ -

৮৬



## ইমা লক্ষণা

### দুর্গা পূজা

দুর্গা পূজা আইলে বেয়াপা ইকার পুঠি আইতারা,  
সিদ্ধা দেনা খুপাকিচেই দেনাত গইগ আইতারা।  
হবা হবা ফিরই পিদিয়া যেইতারাগা।  
লেইরা বরা চিন নেই,  
জক্জকা তলফুতি ইনাফি পিদিয়া,  
কতি হবা আইতারা উপায় নেই।  
আমার এ নিয়ম রীতি আরতাই নাকরতারা,  
কতি হবা পূজা গৌরিয়া মাংসেং বাছিয়া।  
আর হাবি হিন্দুত এসাদে নার  
মাংসেঙর চিন নেই,  
উহানল বিষ্ণুপ্রিয়া মণিপুরীর ভক্তি  
সেবা পূজা ঙকখি লুওনা কারাঙৌ নেই।  
কতি হবাতা।

- ০ -

### ঈশ্বর স্মরণকর

পাকরিয়া রামায়ন, মহাভারত, গীতা, মনে নাথইতারা,  
সংধর্মর য়ারিল কানানার কলির জীবরতা।  
একাদশীর পাঠ ছনিয়া হবা পেইলা য়ারী,  
ঘরে আইলে অকরলা পাহুরিয়া পাপ হিংসা হিংসি।  
মন পবিত্র আইলে ঈশ্বর নিং থাইলে সেচে য়ারগা পাপর কথা,  
সদাই সততা ঈশ্বর ভাবনা থ ভক্তিরমা।  
পবিত্র আইতয় মন পরম জ্ঞানর খৌরাঙে,  
এহানেই ভজনর রীতিহান মন ঠিক কর এসাদে।  
নিজর ধর্মর রীতি একিন অয়া পালন কর,  
ঈশ্বর স্মরণে থাইলে হাবিতা ঠিক অর।

- ০ -



## ইমা লক্ষণা

### এবাকার পত্রিকার পৌ

পত্রিকা সালকরলে নিক্কা হারৌর খবর নেই,  
কইগ মরলা কুঙ্গই মারলা পইলা পাতাত দেখতেয়।  
কোন মন্ত্ৰীয়ে কারে খুন করেছে, এতার কেইছ চলের,  
খুনিয়ে মন্ত্ৰী অয়া কোন দেশ হবা অনা পারের।  
ব্রষ্টাচার, অত্যাচার রূপা লুটানি, হবা পৌ নেই,  
পয়সা দিয়া পাকরিয়া কিহান কানা চেই।  
সাইকেল চর গাড়ী চর সন্ত্রাসর মারামারি যত,  
দল দল সন্ত্রাস অইলা জিংলা মিলিটারিরাংত।  
একসিডেন্ট ডাকাটি হবা নেই খবর নুকুলের হবা কাম না হ্নতেই,  
গাং ঘরে এবাকা উতাই কাম এতা আহিত দেখতেই।  
সংকাম সংগুনী মহৎ মানু কমইলা,  
হ্নতেই দলাদলি ভোটর হিংসার খবর হুদা বিরোধি কথা।  
এতাল জীবন যারগা লেইরাই যাতার ঘরে আয়া,  
চাকুরী নেই রোজগারী নেই বিদ্বানর মুর খেইলা।  
এসাদে অয়া দেশ কইদিন চলতয়তা।

- ০ -

### লেইরা

লেইরা ঘরে জরম অছু নিয়াম লেইরাগ মি,  
উহানল জগতর লেইরা এতা হাবি মোর বেইবুনি।  
নুঙেইপা উতারে বেইবুনি বুলতে না ইছতারা,  
দাদা বুলতে ডাঙর সায়া উলটিয়া না চেইতারা।  
নুঙেই অনার খৌরাং থার হাবির মনে,  
নিয়াম কঠিন অর লেইরার গাতেত্ব গজে কাইতে।  
এসাদে লেইরা অয়া দুঃখই কাটৌর জনম,  
লেইরাপার আশা না পুরের চিরজীবন।  
লেইরা ঘরে জরম অনা এহান অভিশাপহান,  
এহান লালয়া কাইতে যারগা জনমহান।

- ০ -



## ইমা লক্ষণা

### প্রভু হিংসা দরবার নেয়ক

প্রভু বিষ্ণুপ্রিয়া মণিপুরী জাত এহান কিহান লালছিতা,  
হিংসা হিংসীয়ে জবর অয়া মরিয়া লয়ইতাইগা।  
কোনতাই এহান অকরলাতা,  
অন্যায় কামল কোনতাই সমাজর ক্ষতি করতারাতা।  
আহান বেললে আহান দরবার লইনার জনমহান,  
কিহানতে লাভ অইল প্রভু পেয়া জনমহান।  
বিষ্ণুপ্রিয়া মণিপুরী বুলিয়া নাপ্রাণ করলাং আরো,  
জরম অয়া অশান্তি শান্তি নেই হুদা দরবারল।  
আকতাই আকতারে হিংসা করিয়া থাইলা,  
এসাদে জীবনর দিন প্রভু কিয়া অইল লাছলা।  
হিংসাপার লগে অশান্তিত থানা উহান আছে,  
দরবারর জ্বি লাগের না আলনাইতারা খালকরিয়া নিজে।  
কাম করলে মঙ্গল অর দরবার করলে নাগই,  
এসাদে সৎজ্ঞান কুঙ্গই কোনদিন দিতয়।  
প্রভু হবা হবা জ্ঞান দিয়া হবা পথে নেগা,  
পবিত্র হিন্দু ভক্ত না মাঙকা।

- ০ -

### এক অই ক্ষত্রিয়

হবা কাম অক বুললে মন এক অনা থক,  
এসাদে উন্নতির লেমগ লাগক।  
সমাজরে বানাপেয় সমাজ রক্ষা কর,  
সমাজ ধ্বংস অইলে কিহান অইতয় উহান খালকর।  
জয় বিষ্ণুপ্রিয়া মণিপুরী বুল হাবি এক সুরে,  
সত্য উহান প্রতিষ্ঠা অক হাবির হবার কাজে।  
কৌলি হিংসা নিন্দা বেলেই হাবিতা,  
হাবিয়ে কৃষ্ণর ভক্তি আরতি কর মন্দিরে গিয়া।  
হাবিয়ে গেই জাতর মঙ্গলর এলা।

- ০ -





## ইমা লক্ষণা

### তঙাল তঙাল ছড়া

হা ডুডু বন্দি গিল্লা কানচেই খেলেইক আহ আহ,  
টেনিস ক্রিকেট খেলেইক, নিকুল নিকুল।  
খেলার মান জগতে জিঙিল গজে,  
খেলাই ব্যায়াম অর দেহর কাজে।

- ০ -

কওয়া উগই কা কা রহিয়া  
বিয়ান ফুওইল উঠ উঠ বুলের,  
কোকিল উগই নুংশি  
এলার সুরে বসন্ত কালে রহের।

- ০ -

আলধরিয়া ক্ষেতির বির মাটি হজকরতারা,  
তিন চা চারি চা দিয়া ধানর আলি রুয়েইতারা।  
তিন মা অইলে ধান ধরিয়া পাকানা অর উবাকা,  
কাপিয়া আনিয়া মারা দিয়া বৌদিয়া বারনে বুজিয়া থইতারা।

- ০ -

প্রভু তি মোরে রক্ষা করিছ  
বিপদে আপদে পদে পদে হাবির ফামে,  
মি যেন হাবিরে বানাপেইং হাবির মঙ্গল করিং,  
প্রভু এ কৃপা করিছ মোরে, হমাদউরী চরণে।

- ০ -

ডাক্তারগই নিংকরের মি জিঙেগ,  
ইঞ্জিনিয়ারগই মাতের মি যন্ত্রগ না হংকরলে,  
চিকিৎসা করতেয় কিগল।  
পানিয়ে মাতের পানি নাইলে চলতেয় কিতাল,  
উহানল নিংশাকরিয়া জিংতা অইতারা বৌহানল।  
সংসার চলের হাবির তঙাল তঙাল গুণল।

- ০ -



## ইমা লক্ষণা

ফুলে নুংশি গত দিতারা,  
বরনে পানি দেব  
জুনাক বেলিয়ে মিঙাল দিতারা,  
দয়া করিয়া দেনা এহান মহতর কাম বুলতারা।  
মহতে একাম করিয়া ধন্য অইতারা,  
তিতে কিতা দিতেই কিতা দিয়া ধন্য অইতেয়  
তোরতা কিতা আছে দিলতা।  
ধন্য জনম অর দান ধর্ম করলে,  
দান করিয়া পুন্যবান অছি জগতে সংজনে।

- ০ -

হুচি উগ কতি দরকার হিনা ললর কামে,  
হুফু হুচিগর ও কাম নুয়ারতই  
বিরাট আন্তিগই বলি পাঙ্কালে।  
হাবিরতাউ গুন আছে কারৌ হেলা নাকরি,  
হুফু হুচি উগ বিধলে আন্তিগ  
কলর, নেয়র জিংতা অইল কোন গতি।

- ০ -

আধার রাতি হুফু লেমগলউ থানা পারৌরি,  
হুফু লেমউগর মিঙালে ভালয়া থাউরী।  
উহানল কারেউ হেল না করি।  
নিংকরিছ হাবিরতাউ গুন আছে,  
গুরুর সেংকম দিয়া নুয়ারের আন্তিয়ে।

- ০ -

হুদা বেলিয়ে ভালকরের পৃথিবীর হাবিরে,  
হুদা পানিল জিংতা থাইতারা সৃষ্টির হাবিয়ে।  
বেলির কতি গুন পানির কতি গুন,  
নুয়ারতাই উহান কোটি কোটি জীব।

- ০ -



## ইমা লক্ষণা

লেহাউ কেতকী কামিনী কতি নুংশি গতর ফুল,  
উসাদে নুংশিতা চিনিচাম্পা, নাগেশ্বর  
কাপকলেই উরুলেই সিঙ্গারেই গোকুল।  
নুংশি ফুল যেসাদে মানুষে হবা পেইতারা,  
বিদ্বান গুনী মানুষে মানুষে শ্রদ্ধা করতারা।  
উহানল মানু বিদ্বান অইতারা,  
সংজ্ঞানী উতাই অন্যায় কাম নাকরতারা।

- ০ -

ফুলগই নুংশি গত দের  
উহান মি নুয়ারৌরি  
হুরু হুরু চৌলর ভাত খেয়া  
মি জিংতা অয়া থাউরী।  
বেম্বুলগই পহন দের কতি মি নুয়ারৌরি,  
পিরিহৌ, যেন্নাম মারই পাতার গুণ কতি খালকরিয়া আচানক অনি।  
উহানল হুরু ডাঙর কারেও হেলা নাকরি  
যার যার নিজ গুণে পালইতারা হাবি।

- ০ -

মেকুরগই উদুর মারিয়া  
গিরিগর বারনর ধান খানা নাদের,  
কুকুরগই গেউ গেউ রহিয়া  
গিরিগর ঘরগ রাহের।  
গুরুগই সেংকম দিরি গিরিগই খাক বুলিয়া  
মইসগই আলে অপেদে আটের গিরিগর কথা ইলয়া।  
উহানল হাবিয়েও বানাপেয়া পালতারা।

- ০ -

## মানুর প্রেম

মানুর বানা প্রেম আদর  
হাবির গজে  
স্বয়ং ঈশ্বর বিভূলা অছিল



## ইমা লক্ষণা

রাধারানীর প্রেমে।

উহানল মানুষে প্রেমে থানা মনেইতারা,  
হবানেই মানুর কথাল নার এতা উপমা।

- ০ -

মানু শ্রেষ্ঠ জীব মহৎ গুণর কারণে,  
মানুয়ে হাবি পারতারা বিদ্যা বুদ্ধি জ্ঞানে।।  
মানুয়ে মহৎ জীব দয়া মায়াবকা,  
মানুর প্রেমর মধুরতা করেব বিভুলা।।

- ০ -

দৌ জরম অনা মনেইতারা মানুর জনমে,  
উহানল দুর্লভ জনম বুলতারা মনুষ্য জনমরে।

- ০ -

## ছড়া

হেইনৌ খাটল পণ্ডিতল ধরের নিয়াম নিয়াম,  
পেলইতারা খেয়া গাং সহর মানু হাবিহান।।  
এতা গরমর ফল গরমে ধরের,  
মানুরে খওয়েয়া গাছে হারৌ করেব।

- ০ -

ঘুমজে মা আমার সৌগ ফামহানর গজে,  
না কাদি নিদুম ইমা বুলে বুলে।  
তোব সাদে হাবিবর সৌ ঘুমজিতারা চা,  
ঠেমো ঠেমো মা দিতৌ সেংকম কলা।।

## পাহিয়ার কাম

কৌওয়াই নিকা রহিয়া  
বিয়ান ফুওইল বুলতারা,  
হাবিরে হজাক অই বুলিয়া  
বিয়ানত রহিতারা।





## ইমা লক্ষণা

উহানরকা ধন্য ধন্য কওয়া ।।

তানুরতা লাভ নেয়ইলেও এ কাম নিক্কা করতারা

তানুও মানুর মঙ্গল মনেইতারা ।

কিন্তু কওয়াই শাক্তিক রকলে

হারপেইছ, অইতয় কিহান কিহান,

নিশ্চয় ছনতেয় হবানেই পৌ আহান ।

মুরুকউ বিয়ানত রকতারা চিকারি দিয়া ।

- ০ -

কোকিলে রহের ছদ্দা বসন্ত কালে,

বসন্তকাল আহিল বুলিয়া বাগার নুংশি সুরে ।

কোকিলে রকলে হাবিয়ে হবা পেইতারা ।।

এসাদে নিক্কা রহের বসন্তকালরমা ।

- ০ -

তক্‌পাগই রহিয়া সুখ না দুখ বুলের,

দুঃখর সময় আহিল বুলিয়া হাবিরে মাতের ।

তক্‌পাই কতি হারপেইতারাতা ।

সময়হান হারপেয়া আঙ্গানে রকতারা ।

- ০ -

বৈশাখ আইলে খাটল পাকক রহের

খাটল মজ বুলিয়া,

উবাকা লগে মজেরতা হেইনৌ পঙিতল কালাজাম,

খেইল ফল কততা ।

- ০ -

প্রহরে প্রহরে চেরৌ উঠিয়া রকতারা,

রাতিহান কই প্রহর তানু হারপেইতারা ।

ফেউ আলি রকলে হারপেইতারা বাঘগ আইতয় বুলিয়া,

ময়নাগই মাত হিকিয়া বাগার কুংগ ঘরে আইলা ।

- ০ -



## ইমা লক্ষণা

নুংকপি রহিয়া বরণ ডাকতারা,  
বগা ছলাকাক চিনুনি মাসরাস্তা হারৌত মাছ খেইতারা।  
হারৌত ইকা কায়া মাছ পানিত দাবদিতারা।  
হরালি, বনমুরুগ সনর গুরিত ডিম দিতারা।

- ০ -

নুয়া বরন পেয়া পাহিয়া হারৌত ফরদিতারা,  
মেখালা অইলে কেরবং তানুও রকতারা,  
বরন দিতয় বুলিয়ার নুকুললে জির পেপুরা।

- ০ -

মাছ রাস্তা সলাকাক বগা চিনুনি  
মাছ ধরিয়া খেইতারা,  
বাঘ সিংহ হিংস্র জীব  
অন্য জীব মারিয়া খেইতারা।

- ০ -

বেলিহানৌ দয়া করিয়া নিক্কা রইদ দেব  
বেলিয়ে মিঙাল দিয়া পৃথিবী ঙালকরের।  
বেলির কারনে বৌ বরন দেবতা,  
বরন দিয়া ক্ষেতি ফসল ফলেরতা।  
ধন্য ধন্য বেলি হাব্বিরে মিঙাল দিয়া।

- ০ -

জীবরমা গুরু এতা কতি নিয়াম উপকারিতা,  
উহানরকা স্বয়ং কৃষ্ণ জগৎ ঈশ্বর গুরু রাখলতা,  
উহানরকা হিন্দুয়ে গুরুরে হমাদিতারা।

- ০ -

গুরুর সেংকমর উপকার নার তুলনা।  
সেংকমল দই ক্ষির ঘি হংকরতারা।  
সেংকমর গজে নেই পুষ্টি আরাক আকতা।

- ০ -



## ইমা লক্ষণা

### ফুল

ফুলর বাগানে রঙে রঙে কত ফুল সাতছে,  
জাত জাত ফুল গঙালার নুংশি গতে।  
পটেদে আছে ডাঙর গাছ  
লেহাউ নাগেশ্বর সিঙ্গারেই,  
উতাত বেয়েয়া আছে পারিজাত উরুলেই।  
হাবি ফুল সাতর আকতার পর আকতা,  
মি ফাস দউরী পানি দউরী যত্ন করিয়া।  
চিকংলেই সীমানাগত থায়া কতি নুংশি গত দিতারা,  
কেতকী খঙর পারে থায়া গতল মোহিত করতারা।

- ০ -

### বিদ্বানগ

মনদিয়া লেরিক চেইলে শিক্ষিতগ অইতেয়,  
লেরিক না চেইলে অশিক্ষিত অইলে কিতা করিয়া খেইতেয়।  
শিক্ষিত অইতারা উতাই রূপা কামেইতারা,  
হুয়াত হুয়াত্তা খেয়া হারৌত থাইতারা।  
অশিক্ষিত অইলে হীন কাম হীল ফুটানি,  
পিত ফুটিয়া কাম করিয়াও পেট বুজে না খানি।  
লেইরাহানে যাতেয়া থার হীন সেচানি ঠেলেয়া,  
দুঃখী অশিক্ষিতর দাম নেই শিক্ষিত মানুরমা।  
ইমা বাবার কথামত লেরিক চা বলি,  
শিক্ষিতগ অইলে হারপেইতেয় কিহান অইলে তি।  
তোরে হ্বাপেইতায় বানাপেয়া সম্মান দিতায় হাবিয়ে,  
লেরিক তামকরলে বিদ্বান না মাঙইতারা অনাহকে।  
লেরিক তামকর হ্বা করে নিক্কা মন দিয়া,  
মনর ডাঙর আশা পুরতয় থাইতেয় হারৌ অয়া।

- ০ -



## ইমা লক্ষণা

### মানুর মনর গতি

আগেকার মানু উতা সন কাপিয়া বাহাল ঘর হংকরিয়া থাইলা,  
স্কুল কলেজ কমছিল লেরিক কম তামকরলা ।  
ক্ষেতি করিয়া হৌপাত রুয়েইয়া সেংকম চিপলা ঘরে,  
কামাই করিয়া ছয়াতক খেইলা অভাব নেয়ছিল গাঙে ।  
বেয়াপাই ও কাম করলা কাকালিত খাংচেং বাদিয়া,  
ডিজাইন করিয়া ফুতি বুনলা হারৌ মনে থয়া ।  
আমার বেয়াপাই খেলমাছি উরলা চুলে লেইসা কাপলা,  
বেরুনিও বেরেইলা ইনাফিল গুরিয়া ।  
আঙালুরি তলফুতি বুনলা লল্করলা কতি হবা করে,  
স্কুল কলেজ নুকুলিলতাই এতা বেপ্পা হাবিয়ে ।  
শিক্ষিত অইলাতাই ক্ষেতি গিরস্তি বেপ্পা,  
দলান হংকরিয়া গাড়ী লয়া ফুতি মনেইতারা ।  
অকনেই উতা লেইরা দুঃখী অইতারা,  
কুরিয়ারতা ধন নেই, লাছলা কাম নাকরিয়া ।  
সরকার অয়া বইতারা উতাই চাকুরী নেই বুলতারা,  
সরকার নাইলে গতি নেই দেশর উহান না খালকরতারা ।  
বেকার অয়া বয়া থাইলা শিক্ষিত সৌ হাজারে হাজারে,  
উতাই কিতা করিয়া খেইতায় আর কুংগই খালকরতাই দেশে ।  
প্রাইভেট কামর ঠিকানা নেই সৌ দিশাহারা অইলা,  
এসাদেতে কিসাদে থানা নাখেয়া নাপিয়া ।  
তেব কাম বিসারেয়া কামাইর চেপ্টা করতারা ।

- ০ -

### ভারতর স্বাধীনতা

বহু বসর অগেলগা ভারতর স্বাধীনতা অইলতা,  
কিন্তু দুঃখ না গেলগা দেশে দুঃখী দুঃখত এব থাগেলাগা ।  
কোন স্বাধীনতার হারৌপা মনেয়া কত মানু জীবন দিলা,  
বহু বসরর বহু আন্দোলনে,  
শহীদ অইলা কত - কিন্তু কিতা পেইলা





## ইমা লক্ষণা

উতার জিয়া জিপুতে দেশ বাসীয়ে ।  
আকতাই দেশর নেতারে মারিয়া কিতা পেইলা,  
কিয়া মারলা গান্ধী, ইন্দিরা, রাজীবরে কার কিহান লাভ অইলতা ।  
উল্ট জন সংখ্যা নিয়াম জাত উতাই রাজ্য জুরিয়া বইলা,  
সংখ্যা লঘু দুঃখী কুরাং যেইতাইগাতা ।  
অকরলা ক্ষেদা ক্ষেদি নাগালেও মেঘালয়ে,  
মিজরামে তানুরতা নায়া আরতা না থানা বুলিয়া,  
কোন্ সংবিধানে ইকরা আছেতা এহান কি আমার ভারতর স্বাধীনতা ?  
আকগদে বহিরাগত মানু আয়া হমেয়া বন জঙ্গল জুরলা,  
আকগদে সন্ত্রাসে নিরোপরাধ মানুরে মারতারা ।  
আকগদে দেশে চাকুরী নেই সরকারে বেকারর দায়িত্ব নানেরগা,  
বেকারে বেকারে দেশহান বুজলা সরকার আছেতা কারকা ।  
বিরোধী দলর নেতাই সরকারর লগে বিবেচনা নেই,  
সরকার বাগিয়া রাজত্ব করিল চেষ্টা করতারা,  
কোন হবার আলোচনা নেই ।  
কিয়া আসামী বাংলা হিন্দী কত ভাষা তামকরানি, ব্যর্থ অইতায়তা  
ইংলিশ ভাষার প্রভাবে দেশরতা পাগল অয়া ।  
আকগদে রূপা লুটিয়া খেইতারা সরকারর  
মন্ত্রীয়ে নুয়া প্রকল্প দেহা দেহা,  
দুঃখীর নাঙর রূপা দুঃখীয়ে নাপেইতারা কিজাত দেশ পরিচালনা ।  
জিনিষর দাম চূড়াতকাইল ইনকাম নেই,  
বরতুকির ব্যবস্থা নেই, উপায় নেই দুঃখীর আতে,  
কিসাদে জিংতা অইতায় মানু ভারতর মাজে ।  
দেশর নৈতিক বিচারর কামর পথে নাগিয়া নেতাই  
ভোট পেইল দরবার করতারা,  
কিহান করানি দেশে না টটরতারা,  
প্রতিকার বিবেচনা লেপ নাকরতারা ।  
তেব জনগণ পনরই আগষ্টর স্বাধীনতা দিবস সম্মান করতারা,  
হাবিয়ে ফিরাল কুপিয়া জয়ধ্বনি দিতারা ।  
উহান ও কিয়া ভারত হঙনির দিনে ফিরাল কুপানি নারতা,



## ইমা লক্ষণা

১৯৪৭ ইংরেজির আগে ভারত নাছিলতা ?  
এতা হাবি থয়া কি চিন্তাত এমপি মন্ত্রী বহেছি,  
দেশর মানু দুঃখত থাইলা মরতারা উপাসে দিনরাতি ।  
উল্টা সরকারে চুষের শিক্ষা ট্রেনিং দেহা দেহা জনগণরাংত রূপা,  
জনগণর রকত চুষিয়া শোষণ নীতিত সরকার চলাছে ব্যবসা ।  
দেশে কিয়া মদর ব্যবসার দোকান ঠয়রতা চারিবেদে,  
মদল মানু মারিল ব্যবসা কিয়া ঠয়র দিনে দিনে ।  
ঠিক চিকিৎসা নার দুঃখীরতা রূপার অভাবে,  
অজ্ঞত রূপা লাগের কিয়া চিকিৎসা করতে ।  
জনগণ দিশাহারা কি নীতি চলের দেশে উতা চেয়া চেয়া,  
নিরুপায় জনগণ প্রতিবাদ নেই উদাস ভাব জনগণর অন্তররমা ।  
কিসাদে দেশ চলেরতা ভারতরমা,  
কিসাদে রাজনীতি, কিসাদে অর্থনীতি, কিসাদে ধর্মনীতি আজি অইলতা ।  
এতা ভারতর স্বাধীনতার যাইট বসরর কথা ।

- ০ -

## ইমা আঠইপি

হাবি ইমাত ইমা তি অছিলে আঠইপি,  
হাবি কামে অছিলে তি পাক্কালপি ।  
কতি আদরে দুঃখর ককে বুনি দিলে কনাকে,  
কতি দুঃখ নিধানে খেয়া আধাপেটে, ডাঙর করলে মোরে ।  
শিক্ষা দিলে মোরে হবা উপদেশে, কতি বানাপেয়া,  
ইমার শিক্ষার গুনে ডাঙর অইলু বুজহান পরিয়া ।  
ইমার ঔ ঋণ কিসাদে হুসতু নেই পয়সা,  
ইমা ইমা বুলিয়া নিক্কা ডাহিয়া হুদ্দা হমাদউরী নিংশিং অয়া ।  
কুরাং ককইতয়তা ইমার ঋণ সসাগরা পৃথিবী,  
কইজনম সেবাত ককইতয় বৌনেই ইমার ঋণে মি ঋণী ।  
ইমারে বানাপাউরী,  
জগতে নেই আকগউ ইমার গজে, ইমার কত যারী ।

- ০ -



## কিহান অইলাতা

হবাই - কিহান অইলাতা  
আমার জাতর মানু এতা,  
কৌলি দলাদলিত গইগ অয়া  
পাগল মেরাক জ্ঞানহারা কিহানরকা।  
আকতাই ক্ষতির মাজে ক্ষেতি করিয়া  
কিহান ফল পেইতারা,  
কামে কামে বিরোধিতা  
কিহানরকা এমাটিক হিংসা।  
আকতাই বেজাতিরাং নিঙল দিয়া  
কিহান ইজ্জৎ পেইলা,  
আকতাই বেজাতির নিঙল আনিয়া  
কিহান ছয়াত পাছিতা।  
সেপ গিলিয়া জলে নালে  
উতার রাধা খেইতারা,  
আল্লি উটি নেই বেমলবেঠা  
লেবেনচুস পারা চুয়েইয়া গিলতারা।  
যেতারাং চিনত নেই, ঙক্ষি নেই,  
নেই মাংসেং, সকাসকি,  
মাঙইলে হিনানি নেই মলে গামে  
গেরুয়া, অনাচার উটাপিটি,  
কিসাদে পিতারা উতার আতর পানি।  
আকতাই জ্ঞাতি স্বগোত্র লকেই সাকেই  
চিনত নেই ছানিয়া থাছি অনাচারে,  
জাত রক্ষা ধর্ম রক্ষা গীতার কথা  
নেই কোন জ্ঞানে।  
পৃথিবীর হাবিয়ও গইগ অছি  
নিজরে পালকরতে ঙালকরতে,  
আমার কৃষ্টিয়ে জিঙে উহান  
খিয়াল নেই আমারতাতে।



## ইমা লক্ষণা

চুম চুমনেই, থক থকনেই  
পণ্ডিত শিক্ষিতও না বাছলা,  
উহানে নৌগ ঠিকনার হতে বেইতে  
বৈঠা চেতকো না ধরিয়া।  
শাকতি উহান শাকতি বুলিয়া  
বিচার নার কিয়া কোটে,  
অনাচার আচার বিচার নেয়ইলে  
প্রভু পূজা নালর মন্দিরে।  
বিষ্ণুপ্রিয়া মণিপুরীর ঝুলাকাং গৌরিয়া ধর্ম  
পূজা তুলসির মান্না,  
জাতহানরে বানাপেয়া যতনে আদরে  
রক্ষাকরো জ্ঞানরমা।

- ০ -

## প্রেম বানা কতি ঠুম

বানা এহান চিনি ফল মিষ্টি নাগই তেব ঠুম জিঙে,  
বানাপ্রেমে ধরিয়া থছে জগতর সৃষ্টির হাবিরে।  
বানাপেয়া জীব পাহিয়া পলি ঘরে পালতারা,  
আদর যতন করিয়া ছয়াত্তা খওয়েইতারা।  
কতি নিয়াম ঠুম বুললে মাতিল উপায় নেই,  
বানাপ্রেমর ওজনর মওয়েইল ফাল্লা হীলও নেই।  
শ্রীরাধাই কাদল কতি কৃষ্ণ প্রেমর অনুরাগে,  
কৃষ্ণই প্রেম সৃষ্টি করিয়া বাদ্ধা আছিল রাধার প্রেমে।  
প্রেম বিষম বস্তু প্রেম করলে হারপানি,  
প্রেমরকা কাদতারা হাবিরয়ও জুরিয়া আহিরপানি।  
প্রেমরমা থানা উহান স্বর্গত থানা পারা,  
প্রেমর গজে আনন্দ নেই থাইতে জীবনবরা।  
প্রেম করো প্রেমে থাই এ জীবন হারৌয়ে,  
নাকরিয় হিংসা নিন্দা পাপ, পাপে নানবগাতা নরকে।

- ০ -





## বেলিয়ে দেব হাব্বিতা

বেলি এহানে হাব্বিরে ঙালকরিয়া থাছে,  
রইদ দেব বরন দেব সৃষ্টির জীব গাছ লতা জিংতা অয়া থাছে।  
রাতি আহান দিন আহান তার কারনে অরতা,  
হাব্বিয়ে দিনে কাম করিয়া খেয়া পিয়া রাতি ঘুমজিতারা।  
বেলির কারনে অর দিন রাতি হাপ্তা বসর,  
এসাদে দিন গিয়া হাব্বির আয়ু লয়র।  
তার বরনে অর বরিষা বরন নাদলে লাংপাল,  
তার কারনে অরতা ছয় ঋতু গ্রীষ্ম,  
বরষা, শরত, হেমন্ত, শীত, বসন্ত কাল।  
তার কৃপায় অর ক্ষেতি ফল ফসল ফলের হাব্বিতা,  
বেলি নাইলে সৃষ্টি নেই, আধার থাইলইছ দুনিয়া কিন্তাউ নেয়য়া।

- ০ -

## সৌওরে হিকা

সৌ জিপুত আদরে পালিয়া জ্ঞানী মানু হংকরানি ডাঙর কামহান।  
সমাজর রীতিনীতি গৌরিয়া বেবার হাব্বিতা হিকানিয়ে পরম ধর্মহান।  
উতার গজে নজর থনা থিয়াল করিয়া গতিবিধি।  
বেদারা অনা নাদি বরাদে সৎ উপদেশ সমাজ চেতনা,  
নিজর জাতর নিয়ম হাব্বি পালন করকা।  
বেজাতর বেনিয়ম না হিককা দেহে দেহে,  
খানা পিনা সৎ কর্মল তঙাল তঙাল অছিতা জাতে জাতে।  
উহানল বেজাতর সঙ্গ না মনাকা,  
উসাদে ডাঙিত থ নিজর কৃষ্টি রীতি নিয়ম হিকা, হিকা।  
জাতর প্রেম বানা অন্তরে বরাদে,  
নিজর কাঠি নুকুন নামসা কনক পিদাদে দীক্ষার রীতি মতে।  
ধর্মই মন হবা করের  
সৎধর্মর পবিত্রতাই জীবন জ্ঞানল ঙাল করের।  
এসাদে অইতার সৌ হাব্বি গুণী বিদ্বান,  
উসাদে রক্ষা অর জাতর দেশর মান।

- ০ -



## আমার বিয়া

তঙাল সাকেই তঙাল গোত্রর লগে আমার বিয়া অর,  
পর উগ নিজরগ নিঙে প্রেমে জীবন লয়র।  
ঘর সংসার জিপুত নাতিনাতল থাইতারা কতি বানা প্রেমে,  
জীবন কাটের কতি অন্তরর বানা নিঙে।  
হীন কামরমা হারৌ নুঙেইতথাইতারা ইমা বাবা বেইবুনি,  
নীরলে গঙ্গা যমুনা যেমন বহের পবিত্র নদী।  
হাবির বানা নিঙে জাগের উচয়া না পাছরিল টেঙারা,  
অন্তরে থার প্রেম অকুল সমুদ্র বুজিয়া।  
সুখর সংসার শান্তি নীতি জ্ঞানে অর,  
থক্ থক্‌নেই চুম্ চুম্‌নেই জ্ঞানে পবিত্রতা রক্ষা অর।  
সুপ অন্যায় নীতি নাকরতারা,  
বিষ্ণুপ্রিয়া মণিপুরী কতি হবা।

- ০ -

## আমার দেশর কথা

জগতরমা ইমা অছিতা  
পৃথিবী দুর্গা, লক্ষী, সরস্বতী, গঙ্গা,  
তানু নাইলে না চলের সৃষ্টি  
এহান সৃষ্টির কথা।  
সংধর্মত শান্তি, অধর্মত অশান্তি পাপ অর,  
সংজ্ঞানী পাপীর জীবন এহানিত লয়র।  
বারো আমার দেশর কথা  
ক্ষরা অইলে মাটি ছকের,  
নিয়াম বরন পরলে গোলাই হাবিতা বুরের।  
মানু নিয়াম অইলা হিংসাই শান্তি নেই,  
কারতা কুঙ্গই লুটিয়া খানা অধর্ম সংচিন্তা নেই।  
হাবিয়ে রক্ষা কর সংজ্ঞানর পবিত্রতা পালই এসাদে পৃথিবীরমা।

- ০ -



## নিংশিং অই ভারতর স্বাধীনতা

কংগ্রেসে ভারত স্বাধীন করেছিল। একথা হারপাছি ভারতবাসী,  
মহাত্মা গান্ধীর মহৎ কংগ্রেস নাপাহরিয়া আছি।  
অধর্ম কুকর্মই ধ্বংস করে অস্তিত্ব,  
ভারত হিন্দুর হিন্দুস্থান পাকিস্তান খেয়ইতে অছিলগ।  
এক কথা ভারতবাসী না পাহরেছি,  
এ সত্যল আগুয়েই হাবিয়ে তুমি।  
মহান দেশে মহান রাজত্ব কিয়া নারতা,  
কিয়া বদনাম গেয়া ভোট নাদতারাতা।  
কংগ্রেসে পালকরিল মহৎ দেশ সেবা কর,  
দেশ স্বাধীন করেছি দলর ইজ্জৎ রক্ষা কর।  
কংগ্রেসর সত্য এ ইতিহাস রক্ষা নাইলে ভারতর অস্তিত্ব নিবতয়,  
কংগ্রেসর মহৎ ইতিহাস রক্ষা নাইতয়।  
ভারতর স্বাধীনতার আন্দোলন নিংশিং অই হাবিয়ে,  
মহত্বতাল দেশ রক্ষা কর হাবি মঙ্গল অর মহৎ দেশসেবা অইলে।  
উবাকা তোমারে মান্য করতায় ভারতবাসী,  
হাবির চেষ্টাই অক ভারতর উন্নতি।

- ০ -

## হমাদউরী

হমাদউরী প্রভু তোরে বানাপা মোরে,  
আল্লিপেয়া না খেদি দুরেই গদে।  
মি হারনাপাউরী কনাক সৌগ,  
জ্ঞান গুন দিয়া মোরে হংকর হবাগ।  
হবাগদে গিয়া মি হবা জীবন অক,  
মনুষ্য এ দুর্লভ জনম অক সংকর্মল সার্থক।  
মোরে ভক্তি দে, জ্ঞান দে, গুন দে দয়াকরিয়া,  
প্রভুরে মি হমাদউরী হুদা উহানরকা।

- ০ -



## হিদল

ছকন লয়া ধয়া ধয়া রইদে ছকা কংকণ্ডা,  
মান কচুর বাণ্ডয়া কুট হিদল দুহানিরকা।  
দ্বিয়তাল গাহালিত দুহিয়া  
বাহার চুঙে বুজিয়া থ,  
পাচ ছয়দিনে নুকুলের গত কতি নুংশিক।  
মিয়াংপা ফাকিথম তকপানিকং পাকপই আদা ইরলাপার মারই এতা,  
না খেইতারা উতাই হারনাপেইতায় হিদলর গুণর একথা।  
কম খরচে ছয়াতক খানা ব্যাধি নেয়র পেটে,  
পালটই ইরলপা এতা সিদ্দ হৌ কতি ছয়াত্তা খেইতে।  
আগেকার মানু কতি বুদ্ধিমান অছি এতা নিকালেয়া,  
হিদলে কতি মূল্যবান হজক ডাক্তারে মাত্তারা।

- ০ -

## জারর দিনর কথা

বারীরমা লেউ, ফরাস, উরি, কবি ফলের কত হৌপাত,  
যদি বারন বুজের ধান কতি খেইতে মেঠেল মেঠেল হৌ ভাত।  
রৌ, বাউ কত মাছ ঘরে আনিয়া দিতারা,  
পয়সা থাইলে অভাব নেই নেয়ইতাই লেইরাতা।  
হৌপাত চৌল সেংকম থাইলে বেচলেও পয়সা নুকুলের,  
কুরিয়াই ছদা লেইরা অইতারা জ্ঞানী উগই মাতের।  
আলু মক্সি মারই বাড়ীত ফলের হাবিতা,  
ছদা নুন হাওয়া ফিরই, লেরিক তামকরানি খরচরমা এতা।  
বাকীতে চাকুরী বেবসা উন্নতি অইলে দলান গাড়ী অইতয়,  
হারৌর উৎসব বপাবপির কর্ম তীর্থ দেশ বুলানি হাবি আশা থুঙইতয়।  
সৌ জিপুত বিদ্বান অইলে কতি হারৌ, হারৌর সীমা নেই,  
গুনী বিদ্বান জ্ঞানীর ঘরে চিরশান্তি অশান্তি দুঃখ সুপউ নেই।

- ০ -





## হাবি বেঠিক

স্কুলে নার ঠিক শিক্ষা কোটে ঠিক নার বিচার,  
 সংধর্ম সততা নেই হাবিতা অইল লারচার।  
 খুন ডাকাটি নিকা নিকা, দেশে রোজগারী চাকুরী নেই,  
 নিয়াম অইলা দুঃখী লেইরাপা,  
 বিদ্যার দাম নেই বিদ্বান নিরুপায়,  
 দেশে শাসন ঠিক নাইল ভোট দেনা লাছলাই উহানে শাস্তি নেই।  
 চারিবেদে অত্যাচার অনাচার ব্রষ্টাচার লইনার,  
 অশাস্তি ছদা হাহাকার।  
 দেশ রক্ষা মান রক্ষা কিসাদে অইতয়তা,  
 কুঙ্গই হবা কাম হবা মনল দেশ হবা করতয়তা।  
 দেশবাসী হাবিয়ে মনেই দেশর হবা।

- ০ -

## দৌওয়ে জিঙে

দৌ ছদা তেত্রিশ কোটি, মনুষ্যই নিয়াম অইলা,  
 স্বর্গরতা ছদা ইন্দ্র রাজা, মনুষ্যরতা কত রাজ্য রাজা পৃথিবী বুজিয়া।  
 তেব দৌওয়ে জিঙে মহৎ গুণে পাপ কর্ম নেই,  
 মনুষ্যরতা পাপে জিঙিল উহানল বিনাশ অইতারা তেত্‌নেই।  
 মনুষ্যরমা এবাকাউ গুণী বৈষ্ণব মহৎজন আছি,  
 উহানল ধবংস নায়া আছে এব সৃষ্টি।  
 মনুষ্যরমা মহৎ অইলে ভক্ত বৈষ্ণব জ্ঞানী অইতারা,  
 ও জ্ঞানে শ্রেষ্ঠ বৈষ্ণব দৌওর সমান অইতারা।  
 মনুষ্য হবা অইলে জগতে অইতয় শাস্তি,  
 মনুষ্য হবা নাইলে ধবংস অইতয় সৃষ্টি।  
 উহানল দৌ কমইলে ও দৌওয়ে জিঙে হবা,  
 দৌওরাং হিংসা পাপ নেই মরন নেই তানুরতা।  
 তেব মনুষ্যরে দৌওয়ে ধন্য জনম বুলতারা,  
 কৃষ্ণ সেবারকা মনুষ্য অনা মনেইতারা।

- ০ -



## ইমা লক্ষণা

### বিভূলা মন

মানু না মরতাই পারা বিভূলাই মরণর কথা নাও খালকরতারা,  
মানু আগ মরিয়া পুরতারা উহান দেহিয়া  
মিও মরতৌ এহান না নিংকরতারা।  
নিজে নামরতয়গ পারা মরা উগরকা দুঃখ করেব,  
লোভ মায়া মোহই মানু এতারে কতি বিভূলা করেব।  
মরলে এতা হাবি মিশা অর মনহান ও চিন্তাত নাথার,  
লোভে পরিয়া মিশাই হাসাই করতে মনহান ধরিয়া না উবার।  
উসাদে খানি খানি করে কত পাপ অর,  
লোভর কুনিশাত পরিয়া হাবি জ্ঞান সুমর।  
এসাদে মানু হবা কাম হবা কথাল চলতে জ্ঞানহারা অইতারা,  
এ অজ্ঞানে নেরগা নাগই পথ ইলকরিয়া।  
কত শিক্ষিত অশিক্ষিত মানু এ ভুল সাগরে  
হাবুডুবু খেইতারা না খালকরতে,  
খালকরিয়া ধৈর্য জ্ঞানে চললে ভুল নার পদে পদে।  
উহানে সত্য সৎপথে যানা নিয়াম হিনরতা,  
খালকরিয়া নিয়াম জ্ঞানে চলতারা মহৎ জ্ঞানী উতা।

- ০ -

### কনাকর কবিতা

ডিম্বা খুরাই গনা চেইলে চর লিত নুয়ারতারা,  
গনার ঠিকানা মতে গিয়া পেইতারাগা।  
থমবেয়ে কাঠিহান চৌল রাধিয়া খার আপ্পানে নাগই,  
পঞ্চাশগ মুল্লি বাহা লেম্পাল আকহানল পাচমাইল বয়া আনতই।  
মানুরে না গনল বলি পাঙ্কালে,  
ছুটানি নুয়ারতেই তা আতহানল ধরলে।  
বলিল্ বলিল্ অয়া কাম করেব নিক্কা,  
ভাত খার ঠালি ঠালি হজম করেব উতা।

- ০ -



## গাছর মহত্ত্বতা

গাছ এতা কতি মহৎ অন্যতাই ফল খেইলে হারৌ অইতারা,  
গাছর ধর্মহান পররে হারৌ দেনা।  
ফল এতা দৌ মানু হাবিয়ও খেইতারা হারৌয়ে,  
গারিত পুষ্টি অর ফল খেইলে নিক্কা দিনে।  
উতার গজে কত গাছ মানুয়ে ছেদেইতারা,  
ছেদেয়া তুপকরতে গাছে কিত্তাউ না মাত্তারা।  
গাছর এ মহৎ চিন্তা না মাত্তারা কারৌ,  
মাটির ঘাস খেয়া জীব জিংতা অইতারা হাবিয়ও।  
গাছর এ উপকার কুঙ্গউ নুয়ারতারা,  
তেব গাছরে মানুয়ে মূল্য নাত্তারা।  
গাছর এ মহৎ কাম মানুয়ে না সলকরতারা,  
গাছর এ উপকারকা ধন্য না বুলতারা।  
গাছ নাইলে মানু জীবরতা সম্ভব নার থানা।

- ০ -

## পেনসন

পেনসন অয়াও রেহাই নেই, সংসারর কান ডিফেইতে,  
ষাইট বসরে আশি অইলগা জিরন নেই কামে।  
এহানরতাও পেনসন আকদিন তে অইতয়,  
ঔদিন কতি দুরেই, মোরে কুঙ্গই মাত্তই।  
ঘররতাই দৌ হমাদিতে মিও জয় কৃষ্ণ বুলৌরি,  
অবসর অয়াউ ঈশ্বর ভক্তির সময় নাপাউরি।  
যমদোওয়ারে গেলেগা মোরে এ কাম দিলেতে বালা,  
ভজন সাধন নাছে দোষে জির বলম বিদেইলে মোর গতি কিতা।  
প্রভু এতা কাম নাকরলে মি কিতা খেইতৌতা,  
পেনসনর পয়সাই নারগা বেকার জিপূত অইলা।  
প্রভু কিহানাত পরলুতা মোরে উপায় মাতেদে,  
আহির পানি বেলেয়া কাদৌরি তোর চরণে।

- ০ -



## ইমা লক্ষণা

### সত্যর জয়

সত্য উহান ধরিয়া থনা জ্ঞানী উগই হারপার,  
অজ্ঞান মিশা গাতে পরিয়া মরানি তা না মনার।  
সত্য উহানে চুম বুলিয়া বিচারে লেপর অন্যায়র পরাজয় অর,  
অন্যায় উহান ধরিয়া থইলে অজ্ঞান বুলিয়া লেপর।  
সত্যরমা সৎধর্ম সৎজ্ঞানীয়ে নিংকরতারা,  
অন্যায়ত থায়া তর্কাতর্কি শাস্তি পেইতারা।  
চুম উহান চুম বুল অন্যায় উহান অন্যায়,  
উহানর সত্য বিচার জ্ঞানীজনে মানতায়।  
বাবারে ইমা না বুলতারা আকগউ,  
এ সত্য এহান যাকরের আপাং উগউ।  
সত্য উহান ধরিয়া যুধিষ্ঠির রাজ্য জয় করল,  
অন্যায়ত থাইতে দুর্যোধন বংশ বিনাশ করল।  
সৎধর্ম সত্যল হরিশ্চন্দ্র রাজ্য ফিরিয়া পেইল,  
সত্যত ঈশ্বরর নাম লয়া জিৎতা অইল প্রহ্লাদ ঈশ্বর কুপাল।  
সত্যর জয় অনিবার্য এহান আহিত দেখল।

- ০ -

### বিদ্যা জ্ঞানে থার ব্রহ্মত্ব

বামুনর বিদ্যা না হিকলে বামুন অয়া কিহান কানা,  
ব্রহ্মত্বর মহৎ গুণ বিদ্যা না থাইলে নার ঈশ্বর সেবা।  
উহানল বামুন বিদ্বান অই, পণ্ডিত অই  
বেদর কথা পাকরিয়া হারপেয়া চল জ্ঞানল,  
হিন্দু ধর্ম রক্ষা পাক একথা খালকর মহৎগুণল।  
নাইলে বামুনরে মানুয়ে বামুন না বুলতাই,  
বিদ্বান নাইলে মান কিতা বুলিয়া দিতায়।  
বামুনে পণ্ডিত গুণী বেদজ্ঞ অইতারা,  
বামুন নায়া নার দৌওর সেবা পূজা।

- ০ -





## আন্দোলন

জাতর মঙ্গলর কামে এক অনা হাবিয়ে,  
বিরোধি আকগউ নানা জাতর কামে ।  
ডাহাডাহি করিয়া আতে আত ধরিয়া,  
কাকেই কারানি জয়ধ্বনি দিয়া ।  
এক অইলে পেইতারা পালনার দাবী,  
বিরোধীর বদনাম থার চিরঞ্জীবী ।  
সমাজর শত্রু উতারে মাতারা,  
তানুর ইতিহাস থার কলঙ্কত ইকরা ।  
জ্ঞানী উতাই জ্ঞানীর আন্দোলন করতারা,  
সফল অর তানুর জয়র যাত্রা ।  
আন্দোলনর ইতিহাসে দ্বিপঙ্কতথাইতারা যুগে যুগে,  
তেব জয় অইতারা আন্দোলন করিয়া একিনে সৎজনে ।

- ০ -

## মনা সৎসঙ্গ

মানু এতা হাবিয়ও সুখ দুঃখ পাপ পুণ্য হারপেইতারা হাবি,  
হারপা হারপাও লোভ মোহই উল্ট অর মতি গতি ।  
লোভরকা অন্যায় অপে পারা দিতে গারতারা,  
দুঃখ অপমান দুর্গতি অর অন্যায় কাম করিয়া ।  
কঠিন কাম ধৈর্য্য জ্ঞানে সৎপথে চলানি,  
সৎজনে হারপেইতারা কুসঙ্গই কিহান পরিণতি ।  
জেল ফাসী কত শাস্তি মানুও নিন্দা করতারা,  
মন্ত্রী অইলেউ সম্মান নেয়র শাস্তি কামরকা ।  
সৎমন সৎজ্ঞানল হবা মানু অইতারা জগতে,  
সৎজ্ঞান নেয়ইলে কানা নার বিদ্যা ধনে জনে ।  
সারা জীবন সৎকামল কাটেইতারা জ্ঞানী,  
সৎকর্মই ভালকরিয়া নেরগা জীবন জ্ঞানী গুণী হাবি ।

- ০ -



## ইমা লক্ষণা

### কতি হবা আমার জাতহান

আমার জাতর মানুর কতি উচ চিন্তা,  
মহৎ জ্ঞানী বিদ্বান গুণী অনা মনেইতারা।  
গুণখি লু গৌরিয়া কতি হবা,  
মাং সেং বাছিয়া পরিষ্কার থাইতারা।  
বিদ্বান অয়া রোজগার করানি মনেইতারা হাবিয়ে,  
হুকাং তলকাম না করতারা জনে জনে।  
নাসা এলা শিল্প ক্ষেতি চাকুরী করতারা,  
পৃথিবী বিখ্যাত পালা রাস আমারতাই নাসতারা।  
বিষ্ণুপ্রিয়া মণিপুরী হিন্দু বৈষ্ণব পবিত্র জাতহান,  
রামায়ন, মহাভারত, চৈতন্যচরিতামৃত  
পাঠে পবিত্র অর তানুর উৎসব কর্ম জ্ঞান।  
বিদ্বান গুণী হাবি, অশিক্ষিত নেই,  
ভারতে এসাদে হবা জাত বিসারতে আর নেই।  
তেব নিজর সরকার নেই সহযোগীতা নেই উহানে হীনপেইতারা,  
নাইলে কুঙ্গই জুরি দিতাইতা এমাটিক গালতা।  
না খেইতারা অনাচার খাদ্য দৌওর পূজা করতারা,  
প্রভুর সেবার মন্দির হংকরিয়া ভক্তিত লুওয়া থাইতারা।

- ০ -

### ইমা নন্দরাণী

ইমা দে মোরে সেংকম ননী,  
খেইং পেটর বকে বুললে  
দেউরী বুলিয়া নন্দরাণী উরাউরি সেংকম দিল কৃষ্ণরে।  
তেইর প্রাণর ঠাইগ বানাপেইরিগ,  
কৃষ্ণই হারৌ অক বুলিয়া আদরে খওয়েইরিগ।  
গুরু রাহাত গেলেগা উওয়া থাইরিগ,  
কংসর চর আইতায় ডরে রাহিরিগ।  
কতি বানা নন্দরাণীর অন্তরে।

- ০ -



## গোলাই বুরেইলে

বরন দিলে হবা অর দেশর ক্ষেতি,  
বেমল বেঠা অর ফসল হাবি।  
শিক্ষা বানিজ্যই উন্নতি অর দেশরতা,  
চিরশান্তি অর সৎধর্মরমা।  
কিন্তু নিয়াম বরনে গোলা অর বুরের ক্ষেতি ঘর হাবি,  
দেশে দুঃখ দুর্ভিক্ষ অর মরতারা অজস্র জীব,  
কতি অর ক্ষতি।  
বারে বারে গোলা আইলে নুয়ারা পানি মহামারি,  
দেশে দেহা দেৱ,  
দুর্ভিক্ষ মরকি অশান্তি আহের।  
হুদা পানির জীব হরপ জঙ্গলর জন্তু জিংতা অইতারা,  
মনুষ্য নেয়ইলে সংসারে থায়া কিহান কানা।  
ঈশ্বরে হারৌ দেৱ দুঃখ দেৱ এতা তার লীলা,  
হুদা পুন্যবান উগ থার তার নাম গেয়া।  
ঔ জ্ঞানে চল সৎকর্ম সৎসঙ্গ করিয়া।  
দুঃখ নেয়র সৎজ্ঞানীরতা।  
বেয়াপাই উকিল ব্যারিষ্টার মাষ্টার মিনিষ্টার অইতারা,  
বেয়াপাই লক্ষী সরস্বতী দুর্গা গঙ্গা।  
বিদ্যার বুদ্ধি জ্ঞানল জিংতা অইতারা।

- ০ -

## ইচে

হেইনৌ খাটল কালাজাম মজিল গাছে গাছে,  
ইচেরে গিয়া আনগা বাবা ঘরে।  
বিনি লগে আইলে রূপা নিয়াম খরচ করেৱ,  
ডাঙর মাছ নায়া উদালা নাহের।  
ছৌগ লগে আইলে মি লয়া থাইতৌ,  
মোরে মামা বুলতই মি ছয়াত্তা খণ্ডেইতৌ।  
হবা আঙেই পেণ্ট বাবাই লদিতয়,  
আমার সৌগ আইলে কতি হারৌ অইতয়।

- ০ -



## ইমা লক্ষণা

### হবা কাম কর

কইলা এতাউ কালা, পুরা রুকর আঙারা ও অর কালা,  
হবা নাং থয়াও কিতা অইত কইলাই নার দলা ।  
যেগই জনম এহান হবা কাম না করেব,  
তা হবা অনারকা কোনদিন কারৌ কথা না হুনের ।  
আটলপাই কাম নাকরতারা লেইরা অইতারা,  
মানুয়ে হীন কামল নুঙেই অইলে তানু হীনপেইতারা ।  
যেগই চরকরের হুদা পরর ক্ষতি করেব,  
মন্দিরে গিয়া দৌ তা নিয়াম হমাদের ।  
টটরতইতা খাটি খাটি চুমগ অলয়া,  
আহিগি থার কিতা নেনী আনা যানারমা ।  
প্রভুয়ে মাতের কারৌ পাপ মি গছিয়া নেনা নুয়ারতৌ,  
তোর কর্মর তোর পাপ কারাং নিয়া দিতৌ ।  
উহান না খালকরতে অন্যায় কামে থাইতারা,  
মানুয়ে কিতা বুলতায় না খালকরতারা ।  
পুন্যত মরানি কিসাদে তারতা অইতয়তা,  
পুন্য কামে অর হুনা, মনি, মুক্তা ।

- ০ -

### বৈশাখ

বৈশাখর মেঘালা অইলে দিন গুজুরের,  
কেরবং রকতারা গাতে নুংকপি গাছে রকতারা বরণ পরের ।  
হেইনৌ মজের গাছে বৌ দিলে পরের,  
খাটল মজতয় কালাজাম মজিয়া পরের কেলয়া ।  
আলুয়াই লাঙ্গলল আলধরতারা,  
আউ ধানর ক্ষেতি রুয়া অকরানিরকা ।  
বৈশাখর বরন পরলে তিঙিয়া খেলতারা,  
গাঙরমা উহানল নুঙেই হারৌত থাইতারা ।

- ০ -





## কাম কর বলি

মনর মত ফুতি বুনো ক্ষেতি করো বলি,  
হৌপাত নিয়াম রুয়েই যতনে দিন রাতি।  
আতর কাম জানে উগর পয়সার অভাব নার,  
সেংকম চিপের মাছ মারের ছয়াত ছয়াত্তা খার।  
চরিত বেবার হবা অনা মহৎ জনর রীতি,  
সংজ্ঞানে ঙালর প্রেম বানা ভক্তি।  
বিদ্যা উচ্চ শিক্ষা অন্তরল যেতাই মনেইতারা,  
পাপর চিন্তা অন্তরে নেয়র, হারৌত থাইতারা।  
উসাদে হবা অয়া থাইতারা সংসারে,  
ছয়াত ছয়াত্তা খেইতারা জগাতার পাংকালে।  
কামে শক্তি কামে ধন, কামে জীবন ঙালর  
কামর ধনে দলান গাড়ী নুঙেইর জীবন অর।  
জীবনে উন্নতি অর হীন কামল।

- ০ -

## গাঙে জিঙে নুঙেই

গাঙর হাওয়া কতি হবা,  
গাঙে বহের ঠাণ্ডা বৌ কতি শান্তিত থানা।  
সহরে নিহের গরম খুলা বৌ সুপ না হমার,  
ফেনর বৌ ও গরম অর সুপ শান্তি নার।  
গাঙে নুয়া ক্ষেতির হৌপাত খেইতে কতি ছয়াত ছয়াত্তা,  
জাম, হেইনৌ, খাটল, পঙিতল ধরের গাছে বেমল বেঠা।  
ডুডু, বন্দি, লাই, ধাপ, ফাল খেলতারা লপুকে,  
উহানল নুঙেইতা গাঙে নিয়াম জিঙে।  
গাঙে নেই ফুটানি, ক্ষেতি গিরপ্তি সামাজিক রীতিনীতিত চলতারা,  
গাঙর সৌ শান্তি ভদ্র সামাজিকতা হারপেইতারা।  
গাঙর মানুষে সহরে থানা নুঙেই নাপেইতারা,  
গাঙে রীতি নীতি সামাজিকতা উৎসব কীর্তন অর হাবিবতা।

- ০ -



## জি যওপা জাতহান

হরকাং গাঙে শিক্ষিত আগে,  
চিপরসাজন, মাছুঘাট আগে অছিল,  
ডাক্তার ইঞ্জিনিয়ার জিপুত তানু আগে নিকালাছিল।  
উতার পিছে নরসিংপুর খাংচেং বাদিয়া শিক্ষাত আগুয়েইলা,  
নাটক কিতা করিয়া হাবিরে জিংলা।  
তেব শিক্ষার ফিরালহান অইল কালীপ্রসাদে  
মেহেরপুরে নাসা কৃষ্টিও জিঙেসিলা পৃথিবীর হাবির গজে।  
শিংলা প্রতাপগড় ও কম নাগই শিক্ষাত জ্ঞান গুণে,  
এবাকা মন্ত্রী অয়া জিংলাতা ত্রিপুরার গিরিগিথানীয়ে,  
এবাকাপেয়াও তানুর তাত জিঙিয়া আছি কমিশনার ডিসি হাবিরগদে।  
এবাকাতে হাবিরও দিল্লী, মুম্বাই, গুজরাট থাংনাত  
গৌহাটি ছিতারলা শিক্ষাল হাবিরপেইত,  
তেব চিকইলা কৃষ্টি নাসা এলার অজা মরিয়া নেয়ইলা আরো জাতহানাত।  
বিষ্ণুপ্রিয়া মণিপুরী অজার গুণ থাইতয় ইতিহাসে,  
চহা চৌখাত পাঞ্চালপা অর্জুনর বংশ মান্ডই মহাভারতে।  
জি যওপা জাতহান মাত্তারা জগতে,  
সহায় সম্বল পেইলে কাইলাইছ হাবির গজে।  
তেব ডাহিয়ার আরতাউ কুঙ্গ কুরাং দেশে হমাছিগা উতারে,  
জাতহান নিংশিং অয়া আহ সম্মান দেই জাতর মানু কৃষ্টিরে।

- ০ -

## ঘুমজে মা পরান ঠইগ

হম হম হম বাউ, হম, ঘুমজে ফামহানাত,  
হনার পুতুল আনিয়া দিতৌ ঠেম তেল্লাম।  
আমার বাউ কাদতে পরের লকলকা মনিমুক্তা,  
আহিলেতে অর রাশি রাশি ঘটা ঘটা।  
ঘুমেত্ব উঠলে খেইতেয় আপেল আসুর ছয়াত ছয়াত পুষ্টি ফল,  
লইতারো খেইল কলা মজা খাটল।  
সেংকম আছে ননী আছে খেইলতা নেই অভাব,  
ঘরে আছে খেইতেয় কইতা জাত জাত।

- ০ -



## ইমা লক্ষণা

### পাপ পূণ্য

হবা কাম করতারা উতা দৌ,  
হবানেই কাম করতারা উতা হিঞ্চাপা,  
সৃষ্টিত এহানেই তঙালহান বুকুত গাটহান অয়া থার পার খেয়য়া।  
রাবন মেঘনাথ কুম্বকর্ণ কংস মহিসাসুর কুকর্মত কত হিঞ্চাপা অছি,  
হবা কামল বনর বাদর হনুমান অঙ্গদ ও পুন্যবান অয়া থাছি।  
হিঞ্চাপার জনমেউ বিভিষন পরমভক্ত  
অয়া অমর অয়া থাইল আকখুলা,  
কুকর্মত রাবনর বংশ কৌরব হাবি নিব্বংশ অইলা।  
মহাভারত, রামায়ণ, গীতা, মহৎ জ্ঞান তত্ত্বত একথা ইকরা আছে,  
পাকরিয়া হুনিয়া অন্তরে বাদ্দিয়া থইলে মহৎ জ্ঞান জাগের মনে।  
এসাদে কোটি কোটি মানু পাপ কর্মত অকালে মরতারা,  
পুন্যবান উতা পুন্যত অমর অয়া থাইতারা।  
পুন্যবান পুন্য তীর্থত সৎজ্ঞান ভক্তিত থাইতারা যুগে যুগে,  
পাপীরকা চৌরাশি লক্ষযুনি ভ্রমণ জরম অইললেহে।  
কিহান পাপ কিহান পুন্য জ্ঞান করের মহৎ জনে,  
যুগে যুগে এ জ্ঞানর যারী হুনাছি সৎজনে।

- ০ -

### বরন পরলে

মেঘালা দেহিয়া গাতে কেরবং রকতারা মাছ হারৌত ফালদিতারা,  
নুংকুপিয়ে রকতারা গাছে হারৌ হারৌ অয়া।  
আর পাহিয়া নাসতারা কায়া হাকর গজে,  
বরন পেইলে নুয়া পাতা ডেমার গাছে গাছে।  
কতি হবা পৃথিবী অর ফুলে ফুলে সাতয়া,  
সৎজ্ঞান শিক্ষাত ঙালইলে পৃথিবী অইতয় হবা।  
ফসলে ফুলে ফলে বুজলে নিধান নেয়ইতয়,  
হাবিয়ে সুখী অইলে কতি হারৌ অইতয়।

- ০ -



## যার যার নিয়ম

রেল গাড়ী চলের রেল লাইনে লাইনে,  
মটর গাড়ী চলের মাটির সড়কেদে।  
নৌ, জাহাজ চলের পানির পথ ইলয়া,  
আকাশ গাড়ী চলের হাকেদে কায়া।  
থলর মানু জীব পশু পক্ষী পক যার যার নিয়মে চলতারা,  
পানির পক থাইতারা পানিত হাতুরিয়া।  
থল টেঙারা পানিত তিনতা অয়া থাইতারা তিন নমুনার মাজে,  
এসাদে চলতারা সৃষ্টির জীব যার যার নিয়মে।  
উসাদে গ্রহ নক্ষত্র বেলি জুনাক তেরা  
চলতারা যার যার কক্ষপথ ইলয়া,  
মানুও চলতারা মানুর ধর্ম রক্ষা করিয়া।  
নিজর গতি হারা নদী উতা আনুয়া অয়া থার গতি বন্ধ অয়া,  
নিয়মরে হেলা করতে বিপাকে পরতারা।  
নিজর নিয়মর গতি নায়া কোংগউ না চলতারা।

- ০ -

## মনাউরী

ফুলগ অইলুইছতা মি হাবিরে নুংশি গত দিলুইছ,  
ছয়াত ছয়াত ফল অইলে হাবিরে খওয়েইলুইছ।  
বেলি জুনাক অইলে মিঙাল দিলুইছ হাবিরে,  
মি নুঙেইপাগ অইলে সহাই করলুইছ দুঃখিরে।  
মি দুঃখিগ অনাই না পুরের এ আশা,  
মনেয়াও উহানল নুয়ারৌরি আকতা।  
কোটি কোটি ধন ভাগ্যবানে পেইতারা,  
ভাগ্যবান নায়া দুঃখী নিয়াম অইতারা।  
উতারমা মিও আগ কারৌ কিঙাউ দিয়া নুয়ারৌরি,  
পয়সা নেয়য়া তীর্থ পুন্যর ভ্রমণ করে নুয়ারৌরি।  
তেব প্রভুরাং সুখ শান্তি মাগৌরি।

- ০ -





## কোনদিন চুমইতাইতা

সমাজর শিক্ষিত হাবিযে জাতর কথা না খালকরতারা,  
উহানল সমাজর কাম না আণ্ডয়ারতা।  
শিক্ষিত অয়া উল্টিয়াও নাচেইতারা জনে জনে,  
কোনদিনও পালইলাঙইছ হাবি বিদ্বান এক অইলে।  
সমাজ বুলিয়া আকগউ গারিত না লাগেইতারা,  
হুদা লেইরাপার জিপুতেতে কত আন্দোলন করতায়তা।  
সুদেষগই জীবন দিল, জখম অইলা কত দুঃখী দুঃখ লাগের,  
কওয়াই পেয়াউ দরবার করতারা  
কওয়া আগরে কোনগই যদি মারের।  
উল্ট নিজরতারমা দরবার করিয়া থানা মনেইতারা,  
বিপাকে পরেছি, চুমইয়া সমাজর কাম করতারা উতা।  
প্রভুয়ে কোনদিন চুমকরে দিতয়তা,  
কোনদিন হাবি এক অয়া তিলয়া চলতায়তা।

- ০ -

## ফিরয়ে পরিচয়

লেইমা ইচে সাজেল করিয়া সারি পিদিরি,  
মানুয়ে কি জাতগ নাচিনতারা না খালকরিরি।  
আকতাই দেহিয়া মাস্তারা নেপালি বেয়াপাগ,  
আকতাই মাস্তারা দেসুয়ালিগ।  
আকগউ নামাস্তারা বিষ্ণুপ্রিয়া মণিপুরী বেয়াপাগ বুলিয়া,  
বেয়াপার ফিরইহানে জাতর পরিচয়হান না খালকরিরি উতা পেয়া।  
এগদে জাতহানে জিঙে উহান না ভাবিরি,  
নিজর জাতর পরিচয় দিতারা পৃথিবীর হাবি।  
সমাজর হাবিযে নিন্দা করতারা উহানল,  
কিহানরকা সুদেষগইতে জাতরকা জীবন দিল।  
ফিরই ভাষা জাত ধর্ম আগে ঠিক করিয়া চলানি,  
উহান ঠিক নেই উগরতা দুনিয়াত লাহলা পানিত বাহিয়া থানি।

- ০ -



## মানুর কথা

ইচে পিয়েই ইমা বাবা দাদা খুরা মামা মামি ইপু আবক ইপুথৌ,  
জন্মদাতা বয়সে জেঠ উতারে এতা  
বুলিয়া ডাহিয়ার এতা আমার নিংকৌ।  
জেঠাজেঠি বুজন অইলে আমি শ্রদ্ধা করিয়ার,  
কনাক খুলাখুলি অইলে নাং ধরিয়া আদরে ডাহিয়ার।  
মানুর বেবার আচরণ চরিত হবা উতার ইজ্জৎ সন্মান থার,  
বিদ্বান গুনির মান নিয়াম গজে কার।  
চরিত বেবার হবা নাইলে মানুষে নিন্দা করতারা,  
চর ডাকাটি সন্ত্রাস শাস্তি উতাই অইতারা।  
মানু হবা নাইলে সৃষ্টি ধ্বংস অর,  
মারামারি খুনাখুনি হাব্বিতা ঠয়র।  
হবা মানুর হবা য়ারি থার ইতিহাসরমা,  
প্রেম বানা আদর নিং থার হবা মানুরতা।  
উতাই প্রেম বানা নিঙল আদরে টটরতারা।

- ০ -

## লেরিক

থতার কথাল জ্ঞান অন্তরে কতি ধরিয়া থইতেয়তা,  
উহানল লেরিকর দরকার, লেরিকে হাব্বি জ্ঞান থার শাপা অয়া  
লেরিকে সংসারর য়ারী জ্ঞানর কথা দৌওর য়ারী থার ইকরা হাব্বি,  
লেরিক নায়া নাথার সৃষ্টির যত য়ারী।  
সাহিত্য, ইতিহাস, উপন্যাস, ধর্মগ্রন্থ কত এলা কবিতা,  
অইন কানন আদালত আছে রচিয়া।  
নাটক মহাভারত রামায়ণ ভাগবত গীতা,  
পাকরিল ভক্তির লেরিক আছে হাব্বিতা।  
উতা পাকরিয়া এলা ছনিয়া জ্ঞান অর কতি,  
জ্ঞানর কথা মধুর রসর বানী হাব্বি রচিয়া থছি।  
উতা লেরিকে থার বুজে বুজে,  
স্কুল কলেজ বিশ্ববিদ্যালয়ত শিক্ষা অর লেরিকর মতে।

- ০ -



## ধন্য ছাত্র সংস্থা

মহাসভা মহান সভা আগে অছিলতা,  
এবাকাতে দরবার বেলাবেলি তানুয়ে তানুয়ে কিহান অইলাতা।  
ক্ষতি অর কিহান করলে থিয়াল নেই পদক্ষেপে,  
হাব্বিতা সুমকরলা কুরাজনীতির চালে।  
সাহিত্য সভা, সমাজ সংস্থা, কত দল অইলা,  
ছাত্র সংস্থাও তঙাল অয়া তানুরে বেল্লা।  
দেহিয়া জগতর মানু আচানক অইতারা,  
সমাজর কামে হুদা সাহিত্যসভা, সমাজ সংস্থা ছাত্র সংস্থা, বুলতারা।  
ছাত্রর আন্দোলনে সুদেষা শহীদ অইলি, আরতাউ জখম অছি,  
আন্দোলনরকা সরকারে ওবিসি দিল,  
ঠারহান স্কুলে চলা দিল, ধন্য ছাত্র হাব্বি।  
ছয়দল তিলয়া কাম করতারা পাঙ্কালে,  
সরকার এতা খবর তা আগে পাছে।  
সরকারে খালকরের কিয়া এক নাইতারা,  
মাতের সমাজর কাম করতে মহাসভাও বেরা বেরি নাকরিয়া এক অনা।  
উহানল ছাত্রর নেতৃত্বরে দাম দেব সরকারে।  
তেব এক অইল কথা মাতানি আমারতা।

- ০ -

## লেইরা এহান কতি বরি

লেইরা এহান কতি বরি তুলিয়া সেচানি নার ত্বরা,  
লেইরার যাতাত্ত্ব নিয়াম হীন গজে কানা।  
যেগই হুদা চেষ্টা করেব হীনে কামাই করিয়া,  
উগই হুদা পারেব আকদিন নুঙেইর জিনা হংকরিয়া থানা।  
উতাও অনেক বসর লাগের উন্নতিল কাইতে,  
উহান হুদা হারপার যেগ লেইরাও নুঙেই অছে।  
অনাহার আধাপেট খেয়া কতি দুঃখ,  
কইবসর জনম যারগা কাইতে দুঃখত্ব।  
আকদিনে নার নুঙেই অনা চেষ্টা করানি নিক্কা,  
আকদিনতে পুরের নুঙেই অনার আশা।

- ০ -



## ইমা লক্ষণা

### পুণ্যত থাইয়

কোটি কোটি চন্দ্র যেপেয় মিঙাল দিতারা, উপেয় অক তোমার বসতি,  
বেলি যেপেয় ঙালকরের হাবি ,  
ইঙাল ঙালর পৃথিবী, উপেয় কাটকজীবনর দিনরাতি ।  
উপেয় তুমি অইয় লক্ষ লক্ষ কোটি কোটি মিঙালর তেরা,  
শয্য শ্যামলা পুষ্প শোভা পুণ্যধাম আছে উপেয়  
হারৌত সাজেয়া থাইয় কর্মল নিজর নিজর জিনা ।  
যেপেয় সৃষ্টি কর্তা জগৎ ঈশ্বর বানাপার পরম ভক্ত জিঙে,  
বিষ্ণুপ্রিয়া মণিপুরী এতা প্রিয় অর্জুন বভ্রুর বংশ হারপেয়া হৃদয়ে ।  
দুঃখ সুখে সহায় সম্বল যেপেয় অর যেপেয় পেইতার সূখ শান্তি,  
যেপেয় হৃদা প্রেম বানা জাগার বিয়ানে নুকুলতে বেলি ।  
উপেয় ও পুণ্য ধাম অর বিদ্যা গুন ইঙাল ঙাল হারৌর কথারমা,  
যেপেয় নেই দুঃখ পাপ পরম ভক্তি প্রেমরমা ।  
ও হৃদিল ধূপ বরতি দিও ভক্তির মন্দিরে নিক্কা,  
তোমার ভক্তিয়ে হারৌ অক জগতর ঈশ্বর বর দিবতা ।  
পুণ্য মনে পুণ্য ধামে তুমি স্বর্গবাসী অইয়,  
এহান মাগিয়া প্রভুরাং নিক্কা ফুল তুলসী দিও ।  
সৃষ্টির হাবিরে জিঙিয় অর্জুনর পাঙ্কাল  
জাগেয়া লালয়া কঠিন সাগর টেঙারা,  
বিশ্ব জুরিয়া বানাপাকা তোমার পরম গুনরকা ।  
পরম প্রেমময় হৃদি অইয় হাবির লগে হারৌত থানার কাজে,  
হাবির মঙ্গল মাগিয় পূজা দিয়া মন্দিরে মন্দিরে ।  
হাবিরে তিলয়া ও পুণ্য হৃদিল টটরেয় ঙালয়া পুণ্য কথা,  
তোমার গুণরে মাতবাতা জগতে কতি কতি হবা ।  
একথা না পাহুরিয়া পাকরিয় পুণ্য রামায়ন মহাভারত উৎসবে,  
ভাগবত গীতায় দেহেইতয় তোমাতে যানা কিসাদে স্বর্গর পথে ।  
বিদ্যা বুদ্ধি জ্ঞান জাগেয় মহত্বর পুণ্য হৃদিরমা,  
উপেয় হৃদা গুণী জ্ঞানী জরম অহবাতা ।  
কর্মর উন্নতির আনন্দই দেব উপেয় হারৌ দুঃখ নেয়য়া,  
মহত হৃদিয়ৈ ধরিয়া থর হাবিরে তিলকরিয়া ।  
হিংসা পাপ নাথার পাপ জরম নার পুণ্য হৃদিরমা,





## ইমা লক্ষণা

উসাদে হঙর প্রেমময় স্বৰ্গধাম ইঙাল ঙালয়া ।  
উপেয় তুমি থাইয় পুন্য বৃন্দাবন নিঙে হারৌ হারৌয়ে,  
উপেয় থার সুখ শান্তি পুন্য হাব্বির হদয়ে ।  
হাব্বিয়ে মনাকা এ পুন্য জীবন জনে জনে,  
হাব্বি অকা পুন্যবান বিদ্বান গুণী জগতে ।  
একথা ইকরিয়া নুংশি নুংশি এলা আরতি গেইয়,  
পুন্য ধনর মহৎ জীবন এসাদে হাব্বিয়ে রচিয় ।  
হাব্বি মহতে মাতবাতা তোমার মন কতি হবা,  
কতি হবা তোমার ঙকখি গুণ,  
ভক্তি প্রেম গৌরিয়া সেবা পূজা হাব্বিয়ে দেখবাতা ।  
তোমার কৃষ্টি কতি হবা পালা নাসা রাস শ্রাদ্ধ অধিবাস সংকীৰ্ত্তন,  
কতি নুংশি এলা, কতি বৈষ্ণব ভক্তি সেবা হদি মন ।  
নিজরে পালকরানিয়ে অর সমাজ ঙালনা পৃথিবী ঙালনা,  
নিজর কীৰ্ত্তিয়ে থর পুন্য উজ্জ্বল ইতিহাস হনার অক্ষরে রচিয়া রচিয়া ।  
তুমি উহানর পরিচয় রক্ষা করিয় নিজর অস্তিত্বল এসাদে,  
গিঠিয় সৎপুন্য ধৰ্ম কৰ্ম মহত্বতা ঙালয়া বিদ্যা ধনে মানে জ্ঞানে ।

- ০ -

## পানি

বরণর পানি নাইলে সুপও নার ক্ষেতি,  
বরিষা লাংপালর বাসমিয়ার হাইল আও মুরালি ।  
পানি নাইলে মানু জীব পকজক পাহিয়া আকতাউ জিংতা নাইতারা,  
পানির নাং জীবন উহানল মাস্তারা ।  
বরিষাত বরন নিয়াম লাংপালে অর কম,  
বরনর কারণে ক্ষেতি অর হরদম ।  
ক্ষেতির ফসল হবা অইলে কোন অভাব নার,  
ক্ষেতির ফসল নিয়াম অইলে হারৌর সংসার ।  
উহানল ক্ষেতি কর নিয়াম নিয়াম, ছয়াতক খানারকা,  
ক্ষেতি নাইলে নার জিংতা অয়া থানা ।  
পানিয়ে রক্ষা অর হাব্বিতা ।

- ০ -



## ইমা লক্ষণা

### পরম বৈষ্ণব

যেগর মন, যেগর বেবার ওয়াহি বচন বিনয়ী নিরহংকার,  
পরম জ্ঞানল ঙাল কঙালা হাদি পরম বৈষ্ণব  
উগর এ আচরণ সদাচার।  
বিয়ান সেক্সাত মন্দিরে যারগা, দৌ দরশন করিয়া হমাদের,  
যেতা পারিল ফুল ফল তুলসী নিক্কা কাতকরের।  
কারেউ নাকরের হিংসা নিন্দা পরর ক্ষতি,  
সংধর্মই পরম কর্ম এসাদে মন ভজন ভক্তি।  
দয়া মায়া প্রেম বুজে মহৎ জন,  
এমাটিক হবা পবিত্র মন, এ জ্ঞানে ঙাল সাধন ভজন।  
কপালে নামসা তুলসীর কাঠি গারে, গারিগত নুকুনগাছ,  
হিনেয়া নিক্কা দৌ হমাদের, না বেলার নিক্কাকার এ অভ্যাস।  
ইমা বাবা বেইবুনি নিংকরের ঠইগ দিয়া,  
হাবির হবা হারৌ মনার প্রেম বানারমা।  
ক্ষেতি হৌপাত রুয়েয়া প্রভুরাং কাতকরের,  
কাতকরিয়া ভক্তিত প্রভু লদে বুলের।  
ঘরর নিত্যকাম করেস সদা ঈশ্বরর নাম লয়া,  
লোভ লালসা নেই ধৈর্য্যত সংযত দীক্ষা পেয়া।  
ঈশ্বরর নাম জপের ভক্তিত জ্ঞানে ধ্যানে মনে পবিত্র অয়া,  
মনহানাত কুচিন্তা নেই দেহগ বুজে প্রেম বানা।  
বিয়ানত উঠতে জয়কৃষ্ণ বুলিয়া পিছে বেলিরে হমাদের,  
ভক্তির রীতি থর বিয়ান মাদান সুপ না পাছরের।  
নামসা পিদিয়া যেইতারাগা উতারে বৈষ্ণব নিঙে ভক্তি করেস,  
নিজর বিদ্যা জ্ঞান গুণ উতাই ডাঙর না বুলের।  
সংধর্মই পুন্য, অধর্মই পাপ উহানল,  
অধর্ম পাপ কর্ম নাকরের, পাপর কথা না টটরার,  
যেপেয় অর নাম কীর্তন উপেয় যারগা কারৌ নিমন্ত্রণ না বিছারার।  
সব সময় জয় কৃষ্ণ বুলের, কৃষ্ণনাম অন্তরে জপের,  
কুকথা না টটরার হবানেই কথা না ছনের,  
হবানেই উহান আহিল না দেহের।



## ইমা লক্ষণা

বৈষ্ণবর ফিরই নামাবলী লগে থার ভক্তিরমা,  
হাবি জীবে দয়া মায়া প্রেম থর অন্তররমা ।  
মানুর লগে না লাগের, না মাতের কারৌ কুকথা, না করের কুব্যবহার,  
হাবির ভিতরে ঈশ্বর ভগবান থার,  
উহানল অন্তরে সদাই ভক্তি জ্ঞান না বেলার ।  
কোনগই ভক্তি করলে কৃষ্ণ বুলিয়া ভক্তি লর,  
গারিগত তা জিঙে এনিং না থর ।  
হাবিয়ে হবা অয়া হারৌত থাকা প্রভুরাং এ কৃপা মাগের,  
হাবির হারৌয়ে হাবির হারৌ এজ্ঞান করের ।  
এ মহত্বতাই বৈষ্ণবর আচরণ,  
মহান জ্ঞানর বিচার তা হারপার, তার এসাদে মন ।  
হাবিয়ে ভক্তিল ঈশ্বরর নাম লকা এহান মনার ।

- ০ -

## ঈশ্বর সর্ব শক্তিমান

সাগরর পানি হাবি কুঙ্গউ হিচিয়া ঝুকা নুয়ারতারা,  
হিমালয়র বরফ হাবি কুঙ্গউ বয়া নাও গলেইতারা ।  
জীব জন্তু গাছ লতা পাতা এতা হং করতারাতা নাগই,  
গ্রহ নক্ষত্র এতা কুঙ্গই হংকরে পারতয় ।  
কোন বৈজ্ঞানিকও নুয়ারতায় বরন দওয়ানি,  
কোনগউ নুয়ারতারা রইদল ঙালকরানি ।  
এতা হাবি মানুর অসাধ্যতা,  
মানুয়ে নুয়ারিলতা নেই বুললেও এতা নুয়ারতারাতা ।  
পারের উগ ভগবান উগই এতা হাবি হংকরেছে,  
ছদ্দা উগই পারের এতা ধ্বংস করতে ।  
উচ উচ টেঙারা গাট সমুদ্র তা হংকরেছে,  
ছয়াস্তা খওয়ার, পানি ও পুয়ার, সৃষ্টি হাবি তা করেছে ।  
হাবি শক্তির গজে মহা শক্তিমান তা ভগবান,  
আর কোনগউ এতা নুয়ারতায় হংকরানি যতও অকা জ্ঞানী মহান ।

- ০ -



## জাগ জাগ তুমি

জাগ জাগ তুমি চৌখাৎ সাহস গুণে, বিদ্যা ধনে মানে এ জগতে,  
ক্ষেতি খ্যাতি মহৎ কর্মল কৃষ্টির জংকারল মধুর নুংশি তালে।  
সৎমন সৎকর্ম সৎ ভাবনালা না জিরেয়া আগ বারো,  
না গনিয়া লালই টেঙারা সমুদ্র না ডরেয়া বাঘ বন্ধুক মহান বীরত্বল।  
যেতাই রাজ্যহারা অয়াও জাত মান কুল এব না ডুবেয়া আছি,  
নিজর ধর্ম কর্ম রীতি ঙালকরিয়া থছি, ধন্য ধন্য ও পিতৃর অপরূপ কীর্তি।  
কঠিন দিন বুলিয়া সুপউ না ভাবিয়া কর্ম করে যেইগা না জিরেয়া,  
সৎকর্মর ফল সদাই অর মঙ্গল, পরাজয় নার কর্মর যুদ্ধরমা।  
জগতে হেইচিং জগাতা যেতা না হীনপেইতারো নাইতারো লেইরা,  
কর্মর ধনল হারৌ মনল খেয়া থাইতারো নুঙেই অয়া।  
বিদ্যাল ঙালই জ্ঞানল গুণল পালই ইঙাল ঙালে,  
নক্ষত্র বেলি জুনাক তেরা অই গুনর মিঙালে মিঙালে।  
সৌ জিপুত বংশাবলী দেহিয়া নিরবধি  
নুকুলবাতা জনে জনে লক লক করিয়া,  
গুণীর গুনে ঙালর পৃথিবী,  
সহর গাং পালয়া শক্তিমান অর হাবি তিলয়া।  
খেইচা খেইপক তঙাল খেইনাপা কৌলি দরবার বিয়ান বেলুকা কানানেই,  
কারতা কুঙ্গৌ না খেয়তারো না মাগতারো  
কারৌ দয়া, নিজরতাল লেইরা বরা থাইতারো আকপেয়।  
ও জ্ঞানে বানা প্রেমে নিজরতাল থাই নিজরতা ভাবিয়া,  
শ্রদ্ধ কর্ম উৎসব কর হাবিয়ে তিলয়া  
হারৌ হারৌ অয়া পরম ভক্তি শ্রদ্ধারমা।  
একতাত এক মনে থাইলে শক্তি অর বলি পাঙ্কালে,  
না পেইতারো শত্রুয়ে কোনকালে,  
ও হৃদির মনে প্রাণে জ্ঞান গুনে পরম মহৎ মনে,  
থানা জীবনে মরনে।  
জ্ঞানীরে হাবিয়ে মানতারো ইজ্জৎ দিতারো পরম শ্রদ্ধারমা,  
বেলিহান যেসাদে প্রিয় তার উপকারে





## ইমা লক্ষণা

হাবিয়ে কৃষ্ণরে নিক্কা হমাদিতারা নিংকরিয়া।  
দেশসেবি সমাজ সেবি লেখক লেখিকা মহৎ জনরে  
পরম জ্ঞানী নিঙে করতারা শ্রদ্ধা ভক্তি,  
যেতার কথা অমর ইতিহাসে থার ইকরা নক্ষত্র বেলির ডেকি।  
ঔ খ্যাতির মিঙালর তলে ঙালই জনে জনে সমাজরে দেশরে পালকর,  
তোমার গুণে ঙালক দেশ পৃথিবী সমাজ  
হাবিয়ে ইঙাল ঙাল মিঙালর লেম ধর।  
না পাহুরিয় সুপ বিভুলা নাইয়,  
আগুয়েই হিম্মতল বিদ্যা গুন কৃষ্টি হাবিতাল,  
মহৎ গুণ বিদ্যা ধন, সম্পত্তি পালকর হীন কামল।  
না গনিয়া দুঃখ দুর্গতি আগবারো দিন রাতি অভিরাম কর্ম করিয়া,  
অভাব নায়া দুঃখী নায়া পালইতারা বুদ্ধিমান জগাতা,  
দান ধর্ম হাবি করতারা ধনবান জ্ঞানী মহান অয়া।  
ঔকথা নিংশিং অয়া মান সম্মান ইজ্জৎ রক্ষা করিয়া যেইগা,  
তোমার খ্যাতি গুণ ইঙাল ঙালয়া জুরিয়া থাক দেশ বিদেশ পৃথিবীরমা।  
এহানে অক চিন্তা বিয়ান বেলুকা নিক্কা নিক্কা তোমার অন্তরে,  
তোমার গুণ তোমার কৃষ্টি ঙালইতয় পালইতয়  
হাবি যারী তোমার খ্যাতির মাজে।  
এ এলা গল্প কবিতা না পাহুরিয় জীবনে,  
হাবিয়ে দেহকা, হাবিয়ে আনন্দ পাকা,  
তোমার গুণ ব্যবহার ভক্তি আচরনে।  
ছদ্দা সম্মান করিয়া তোমারে পথ দেহেয়া গেলাগা উতারে,  
মিঙালর ডেউটি ধরিয়া যেতায় আহ আহ বুলা এ মিঙালর পথে।

- ০ -

## উন্নতির যুগহান

কি আচানক শোভা, সহর গাঙ অইল হবা, সমান সমান উন্নতি,  
পথঘাট ক্ষেতি স্কুল কলেজ পানি, বৈদ্যুতিক বাতি, ইঙাল ঙালইল কতি।  
হাবিতার সুযোগ সুবিধা পেইলা মানুয়ে,  
লেইরাপা দুঃখী নেই পারা হাবি গদে।



## ইমা লক্ষণা

লেরিক তামকরতারা, বিদ্বান অইতারা, ঘরে ঘরে ফুকইয়া,  
অশিক্ষিত নেই, নিরক্ষর নেই হাবিয়ে শিক্ষিত অইলা।  
বন জঙ্গলে স্কুল হাসপাতাল হাবি সুবিধা পেইলা চারিবেদে,  
কতি উন্নতি অইল দেশ বিদেশ হাবিগদে।  
পৃথিবী ঙালইল কোটি সূর্য চন্দ্র হঙইল মিঙালে ঙালয়া,  
দিন রাতি মান্না অইল, ছয় ঋতু যেন বসন্ত পালইল, কতি হবা অয়া।  
পানি বৌ হাওয়া কিত্তাউ অভাব নার,  
কি দিন কি রাতি কি যুগহান অইল ইকরিয়া লইনার।  
জ্ঞানী নিয়াম অইলা অজ্ঞানী নেয়ইলা,  
ক্ষেতি ফসল ফল ফলেইতারা ফারম হংকরিয়া।  
হারৌ আনন্দত স্বর্গত থানা পারা উন্নত পরিবেশে,  
হুদা ধন থানা লাগের হীন কামাইর মাজে।  
তীর্থত যানা, দেশ বুলানি কতি সহজ সুবিধা,  
আকাশ গাড়ী মটর রেল চলের হাবিতা,  
এ যুগে যেতা কাম নাকরতারা লেরিক না তামকরতারা উতার হজক নেই,  
স্বর্গ সুখ উপভোগ করিল ভাগ্য তানুরতা নেই।  
নরকর সুরুঙে লুকেয়া থায়া না দেহিল মেরাক বেলির মিঙালল।  
আধারে থানা অর খৌরাং নেই তল জীবনর তল মনল।  
ঔ জীবনর কুস্বাকা অইতয় মন হারৌর সৎ ভাবল ঙালনা,  
চিরজীবন কিসাদে আধারে থানা হবাহান না দেহিয়া।  
উতারে না গনিয়া পিঠিত বেলেয়া যেইতারাগা মহং জ্ঞানীজনে,  
কুরিয়ারে দাম না দিয়া যেইতারাগা, ভিক্ষা নাদতারা কুরিয়া ভিক্ষারীরে।  
কতি নুঙেই গরমে বৌ আছে, হীনকাম নেই মেসিনে কাম করের,  
ক্ষেতি গিরস্তিত মাছ সেংকম ফসল হাবিতা ফলের।  
আরতাউ কতি উন্নতি অইতয়, পথ পাক্কা ঘর অইল হাবিরতা,  
কতি আনন্দ আগ বারলা হারৌ হারৌ অয়া।

- ০ -



## ছনার জাতহান

ছনার জাতহান বিষ্ণুপ্রিয়া মণিপুরী, এহান হাবিয়ে নিংকরিয়,  
এসাদে মহৎ জ্ঞানর জাত জগতর মানুত নেই হারপেয়।  
বিদ্যা বুদ্ধি জ্ঞান চৌখাত হাবিতা,  
সংধর্ম সংকর্ম জ্ঞান বুজে হাবির হৃদিরমা।  
অন্যায় কাম অসামাজিকতা কোনদিন নাকরতারা,  
পবিত্র অয়া সমাজর রীতিত থানা মনেইতারা।  
বেয়াপাউ সাহস ছনর জবর কাম করতারা বলি,  
ফুতি বুনিয়া কাম করিয়া থাইতারা হাবি।  
মহৎ কাম করিয়া জ্ঞানল থানা মনেইতারা,  
উহানল পৃথিবীত নেই তুলনা।  
ধন থাইলে ফরদিলাইছ সহায় থাইলে কইলাইছ,  
লেইরা দুঃখরমা এ জ্ঞান নেয়ইলে হাবি মাঙইলাইছ।  
মহৎ অইতে ঈশ্বর রক্ষা করিয়া থাছে,  
অর্জুন বলুবাহনর বংশ প্রভুয়ে হারপাছে।  
কৃপা মাগতারা ভক্তিত ঈশ্বরর চরণে,  
অন্যায় কাম নাকরতারা লেইরা দুঃখে মরতে।  
অনাচার হুকাম না করতারা,  
উহানল রাজার বংশ ক্ষত্রিয় হাবিয়ে মাস্তারা।  
খানা পিনা থানা কতি লু ঙকখি,  
তুলনা নেই আমার গৌরীয়া ধর্ম রীতি।  
উহান খালকরিয়া পালইল চেষ্টা করো,  
মহৎ জ্ঞানল জাতহান হাবিয়ে ঙালকর,  
নিজর কৃষ্টির শ্রেষ্ঠ আনন্দত হাবি হবায় থাইয়।  
আমার এসাদে কতি হবা রাস শ্রাদ্ধ কীর্তন  
আর কারতাউ নেই হারপেয়,  
ক্ষত্রিয় রাজবংশী তুমি উহানল হাবিরে জিঙিয়।



## ইমা লক্ষণা

### মনুষ্য জনম দুর্লভ জনম

মনুষ্য জনম দুর্লভ জনম জ্ঞানীয়ে মাপ্তারা,  
উহানল মহতে নাকরতারা হবানেই কাম,  
না টটরতারা হবানেই কথা।

সাধু সৎজন অয়া থানা মনেইতারা জনমহান,  
নির্লোভ নিরহংকার নিষ্পাপ থানা তানুর খৌরাং।  
এজনম পাপ করলে পাপর ফল কত জনম ভোগানি,  
অমঙ্গল হিংসার পাপে পরিয়া জনম জনম কাটানি।

সৎজনে সৎ সঙ্গত পুন্যত থানা মনেইতারা,  
কোনদিন লোভে মোহ অয়া পাপর অন্যায় কাম নাকরতারা,  
দয়া ধর্ম সৎকাম করানি মনেইতারা বানাথ্রেমে,  
হবা শাস্তি সুখী দুঃখী বেদাবেদ নেই তানুর অন্তরে।  
তানুরতা হিংসা নিন্দা নেই কারৌ হবানেই কুযুক্তি নাপ্তারা,  
সদাই জীবনে হুদা হবা কাম করিয়া চলানি মনেইতারা।  
উহানল পুন্যবান তানু অইতারা।  
মহৎজ্ঞানল পুন্য জনম লয়র তানুরতা।

- ০ -

### সাধুসঙ্গ নাইলে

মনহান যদি হবা নার হবানেইগদে আচুলতয়,  
উবাকা সৎজ্ঞান উপদেশ মুরগত না হমেইতয়।  
হবানেই অনাচার গাতে নিয়া বেলতয়গা,  
উবাকা বিপদর গাতগত পরলে কুঙ্গই তুলতয়তা।  
এহান কুসঙ্গর যারীহান,  
বহুকষ্টে জ্ঞান ফিরলে উপেয় অর রক্ষাহান।  
নাইলে চরকরলেও জেল ডাকাটিত ধরলে মরলে,  
মাইর করলে, খুন করলে, ফাসী, নাইলে যাবজীবন থানা জেলে।  
পরর ক্ষতি বি ঠেলেইলে উহান ফলহান,  
কোনদিন নাযারগা হবানেই কামর বদনামহান।





## ইমা লক্ষণা

জীবনে জ্ঞানীজনর সমাদর উতাই নাপেইতারা,  
সমাজে কুকাম করতারা উতার ফাম নেই হাবি জাতরমা।  
কদাচিৎ কোনগ সৎসঙ্গত ফিরতারা হবা গদে,  
রত্নাকর দস্যু বান্ধীকি অছিল কত সাধনার পিছে।  
হাবির মঙ্গল মনার উগ পরম জ্ঞানীগ,  
উগই ইজ্জু হারপার ঈশ্বর হাবির অন্তরে থারগ।

- ০ -

## নুঙেই অকা

রমা, বিনু, হুনা এতা গুয়া নিয়াম খেইতারা,  
সুনু তুকতা জর্দাল খেয়া অট রাজা করতারা।  
যেগর ঘরে গেলেগাও মাত্তারা চা না হুদা গুয়া দেই,  
ঘরর দারিত পানা করতাং বেলা দিয়া অনাচারর সীমা নেই।  
গুজুরলেউ না সওইতারা উল্ট মাত্তারা হুনা দরইথাং,  
মাত্তারা হৌনাবি বেবার নেই গাঙর মানু অইলাই থাং।  
গুয়া খানা এরকা বুলিয়া গুয়া নেই বুললেও নাকরতারা,  
গুয়া নিয়াম খেইলে ক্ষতি অর বুললেও না ইসতারা।  
ঘরে গুয়ার গাছতে না রুয়েইতারা, লইতে রুপা নিয়াম যারগা,  
খানার তলে হাবি পয়সা লয়র ঘরে কোন কর্ম পরলে কিহান অইতায়তা।  
খরচে নিয়াম, ইনকাম কম, দুঃখীর কিহান গতি,  
সরকারে কিন্তাউ না দেহের, জিনিষর দাম বারের দিন রাতি।  
এ মানু এগিয়ে লেইরা অইলে মানুরে নিয়াম হীন দিতায়,  
এগিতে নুঙেই অকা, কামে হেইনিং অকা ব্যাধি নাকা।

- ০ -



## পরিবেশ হবা অক

অশান্তি দেহিয়া ছেচিয়া কুরাংতে যানা, দেশ গাং বেলিয়া,  
প্রেমহীন প্রাণহীন বিচ্ছিন্ন পরিবেশ  
কুঙ্গুউ নেই পারা দুঃখর দ্বিকথা মাতিলতা।  
তিতা নিম পাতা ঠুম নার চিনিলা উটিয়া গিলতে,  
চাবতে ছগ অর থা পারিলহান নার, থা পারিলহান নার নিশ্চিত্ত মনে।  
ঠুম ফল খেইতে ঠুম নার, ছয়াত হৌ খেতে ছয়াত নার,  
রহের হিংসার হাওয়া,  
কারাঙৌ নেই প্রেম বানা, বৌবরণ ভৈচাল নেই,  
তেব শান্তি নার দুঃখ চিন্তারমা।  
বাগিয়া পরের পারা পুরানা ঘর, টটরলে ছুদা বদনাম অর,  
অশান্তির সাগর যেমন আহির পানিয়ে বুজিয়া থর।  
অজ্ঞান আধারে বসতি অয়া থানা পারা,  
অন্ধ অয়া ডরা ডরা আটানি পারা কাটা লালয়া।  
সংজ্ঞান সততা প্রেম নেই, শিক্ষাই জ্ঞান না দেব,  
হিংসা পরম অস্ত্র, মহৎ জ্ঞান অন্তরে না নুকুলের।  
এহানর পরিবর্তন কিসাদে অইতয়,  
কিসাদে হেইনৌ পণ্ডিতল বারো ঠুমনি অকরতয়,  
এ আধার ছেচিয়া কোন্দিব বেলি নুয়াকরে মিঙাল দিতয়।  
এ অশান্তি কিসাদে গিয়া প্রেম বানা ডেমেইতয় নুয়া নুয়া গাছ অয়া,  
কিসাদে ফল দরতয়, কল্পনাই মাতে নুয়ারের,  
বিয়ানে বিয়ান অয়া বেলি গালয়া নুকুলতয় মনে আহিয়ে না দেহের।  
তেব আকদিন অইতে পারে জ্ঞানর পরিবর্তন,  
এরতে পারে এ লাছলা হিংসার বৌবরণ।  
অশান্তির মেঘালা গিয়া হারৌ বারো অইতে পারে,  
প্রেমহীন তিতা নুঙেই নাপেয়া থানাত হবা মন হঙেইতে  
পারে মহৎ জ্ঞান বুজে বুজে।  
উবাকা তিতা তিতা অইতয় ঠুম ফল ঠুমনি অকরতয়,  
প্রকৃত সংজ্ঞানে আধার শান্তিজ্ঞান আর নেয়ইতয়।



## ইমা লক্ষণা

নুয়া ফুলর নুংশি গতে প্রেম দিতয় হাবিরে,  
হারৌর দিন আয়া জাগেইতয় নিক্কা বিয়ানে।  
সংশিক্ষার স্কুল কলেজে হবাকরে সংজ্ঞান বাগা দিতায়,  
সততার লেরিক নুয়াকরে ইকরতায়।  
মহৎ শিক্ষাই মানু গাং দেশ হবা অয়া হারৌর এলা গেইতায়,  
আগরে আগই নুয়াকরে হাদিল বানা পেইতায়।  
ঔদিন আহক বুলিয়া বাছেয়া চেয়া চেয়া আছি মহৎ জ্ঞানী উতা,  
পরিবর্তন অক বুলিয়া হুদা মহৎ প্রেম জ্ঞানর যারী হুনেইতার।  
উদিন মৎ পিনা অনাচার অনা বেলতায় হবা অনারকা,  
হাবি হবা মহৎ অয়া গেইতায় ভক্তি সংজ্ঞানরমা।  
শাক্তিতা নেয়য়া হবা অইতয় দেশে বিদেশে,  
প্রেম পাহিয়াই নুংশি সুরে রহিয়া হুনেইতায় হাবিরে।  
পরিবেশ হবা অইলে ধর্ম মহৎ গুনল থাইলে আনন্দিত থানা অর,  
সংধর্মই দের আনন্দ, স্বর্গত থানা মান্না অরগ, নেয়য়া পাপ চিন্তা দুঃখ।

- ০ -

## তি কতি হবা ইমা

তি কতি হবা রূপসী উবসী অঙ্গরা অপরূপিনী তি চিত্রাঙ্গদা,  
তি মোরাং নুংশি এলা গল্প উপন্যাস রসর প্রিয় কবিতা।  
তি মোরাং বিষ্ণুপ্রিয়া মণিপুরী ইমা, হমাদিতারা লাখ লাখ জিপুতে,  
দুঃখ সুখে ইমা বুলিয়া ডাকতারা তোরে।  
তোর জয়ধ্বনিল ছাত্র আন্দোলন করলা,  
তোর কথা তোর ভাষাত কত গল্প উপন্যাস সাহিত্য রচলা।  
তোর প্রতিষ্ঠারকা কত দাবী করতারা হাবিরে,  
তোর জয়ধ্বনি দিতারা ঘরে ঘরে।  
তোর তলফুতি ইনাফি নামসা ইঙাল গুলয়া কতি চুওর,  
কাঠি লিকসই খৌনানাকপি কানবেরি জমকা কতি লুওর।  
পুলেই কচু মাচু কতি হবা লক লকা,  
অপরূপ রাশ্বি হবা, নেই তুলনা।  
কি রাজসিক রূপহান ইঙাল গুল জিঙে,



## ইমা লক্ষণা

উসাদে হবা রূপ নেই আর জাতে ।  
জ্বরক জ্বরক করে রূপ অলঙ্কারে কতি চুওয়া,  
কতি হবা পলেই কতি ঙালর রাসে নাসতে গোপীরতা ।  
হৃদা দুঃখ আকপেয় তিলয়া নাথাইলা তোর জিপুত হাবি,  
মণিপুর ব্রহ্মদেশ আসাম বাংলাদেশ বুজে সিতারেয়া আছি ।  
কারৌ খবর নেই দেহাদেহি নেই কি পরলেই,  
খালকরলে দুঃখ লাগের উহান নিংশিং অইলেই ।  
মণিপুর বেলেয়া আয়া কতি হীনপেইতারা,  
অভাব অনটন দুঃখ যাতার জাবদিয়া ।  
নিজর জাতর সরকার নেয়ইলে কোন্‌গই চেইতা,  
উহানে দুঃখত নেই দেহিলতা ।  
কুঙ্গই বানাপেয়া খালকরত দেখত উন্নতির উপায় করত,  
নিজরতাই চেষ্টা করিয়া যেহান অইলহান অইত ।  
উহানল ইমা দুঃখী জিপুতরে খানি বানাপা,  
তোর এলা গেয়া জাগিয়া উঠকা ।  
তোর বর পেইলে ঙালইতায় পালইতায়,  
জনম জনম ইমা বুলিয়া জয়ধ্বনি দিতায় ।  
শান্তি পাকা হারৌত থাকা ঙালয়া গুনে জ্ঞানে,  
পালয়া জগাতা হেইচিঙে সাহসে আগুয়াকা জগতে ।  
হমাদিতারা ইমা তোর চরনে,  
মাত্তারা হাবির ইমা অইছ জগতে জনমে জনমে ।  
সৎধর্ম গৌরিয়া কৃষ্টি হাবি পালকরকা,  
হাবি গুনে জগতে হাবিয়ে জিঙকা ।  
এ আশীর্বাদ দিছ হাবিরে,  
অর্জুন বভ্রুর বংশ দেহাকা গুণ ঙালয়া হিন্মতে ।  
উবাকা ইমা তি ঙালইতেয় তানুর বিদ্যা গুনে জিঙিয়া,  
হাবির মুঙে তি জিঙে বুলতায় জয় বিষ্ণুপ্রিয়া মণিপুরী ইমা বুলিয়া ।

- ০ -





## সত্য উহান হুদা থার

সত্য উহানাত লেপয়া নাপয়া থানা উহানেই মহৎ চিন্তা,  
উহানেই মিঙালর জীবনর পথহান, যেইতারাগা জ্ঞানী মহান লেঙয়া।  
বহুপাপী বহু অজ্ঞান থাইলেউ জ্ঞানী নেইতা নাগই,  
বহু খুনাখুনি চর ডাকাটি অইলেও,  
বিদ্বান গুণী মহান সাধু সৎজন নেইয়ছিতা নাগই।  
অধর্মর কামর মাইর মকদ্দমার নিয়াম বিচার অর,  
এব কোটে অন্যায় কারীর বিচার শাস্তি লেপর।  
অন্যায় উহান অন্যায় বুলতারা,  
ন্যায় উগরে বিচারে ন্যায় বুলতারা।  
হাবি ধ্বংস অইলেও সত্য উহান মাটিত্ব ডেমেয়া খেমিগ নুকুলের,  
ক্ষরা রইদ জ্বিয়ে পুরলেউ জিংতা অয়া গাছজার উঠের।  
ধ্বংসর কত প্রলয় অর বৈচাল বৌবরন গোলার পানি,  
তেব নিব্বংশ নায়া জিংতা থায়া সত্য উহান নুকুলের নক্খানি, নক্খানি।  
সত্যযুগে অসুর অন্যায়ল পরাজয় অছিল,  
অমর অমৃত ভাণ্ডার পেয়া ও নাথছিল।  
ত্রেতাত হাবি হিঞ্চাপা মরলা কুকর্মত মজতে,  
পুণ্যবান হুদা জিংতা অইলা সত্যর কারনে।  
দ্বাপরে কৃষ্ণ অবতার অইল, প্রেম হিকেইল হিঞ্চাপা মারল,  
ভক্ত রক্ষারকা গিরিগোবর্দ্ধন তুলল।  
কুরুক্ষেত্রত হাবি পাপী বিনাশ অইলা, কৃষ্ণ সারথিগ অছিল,  
বৃন্দাবনর প্রেম মথুরার রাজত্ব দ্বারকার রাজ্য উহানরকা ত্যাগ করেছিল।  
কলির পাপে গৌরঙ্গ অয়া হরিনাম বিলেইল ভক্ত উদ্ধাররকা,  
এসাদে সত্য প্রতিষ্ঠাতা প্রভু করের যুগে যুগে লীলারমা।  
এব সত্য উহানাত জয় শাস্তি আনন্দ মঙ্গল হাবিতা আছে,  
পাপীর কত শাস্তি জেল ব্যাধি ধ্বংস অইতারা উসাদে।  
সত্য, সততা মহত্বতা পুণ্য এবাকাউ আছে পালয়া,  
সত্য উহান সৎজনে মানতারা অন্যায় নাকরতারা পাপ বুলিয়া।  
মহৎ জ্ঞানী গুণী জন এব সত্য উহানাত থায়া সত্যর গুণ গেইতারা,  
সারাজীবন পবিত্র অয়া পুণ্য কর্ম করতারা।



## ইমা লক্ষণা

### গুণর মর্যাদা

জলবরির ফুল কতি হবা সাতর, তেব পূজাত না দিয়ার,  
তিরার ফুল বুজে কেলয়া পরলেও উল্লিহা না চেয়ার।  
কদম সূর্যামুখী সাতর বুজে ডাঙর ডাঙর অয়া,  
গতহান নেই বুলিয়া না গনতারা।  
নুংশি গতর সিঙ্গারেই গোকুল মালতিল ফুলর ডাল গিঠিয়ার,  
প্রভুর গারে পিদা দিলে প্রভু হবাপার।  
কেতকী সাতইলে বনে নুংশি গতে গঙালারা,  
কাটা অইলেও চিকংলেই কতি নুংশি গত উতার।  
গতর গুণে নুংশিপেয়া সিরিয়া পিদতারা,  
গতনেই ফুলরে নিয়াম আদর নাকরতারা।  
মানু ও সাত হবা অয়া গুণ নেয়ইলে মানুয়ে না গনতারা,  
বিদ্বান মহৎ গুণী উগর জ্ঞানরে শ্রদ্ধা করতারা।

- ০ -

### বীর ছাত্র

ধন্য ধন্য ধন্য হে ছাত্র তুমি,  
যেতায় কুরুক্ষেত্রর ডেকি বীরত্বল যুদ্ধ করিয়া  
মহাভারতে যেন অমর থাকি,  
আন্দোলন কত আন্দোলন করিয়া  
বিষ্ণুপ্রিয়া মণিপুরী সমাজরে পালকরেছি।  
উতা হুদা তুমি, ছাত্র সংস্থার বলি বলি বীর,  
ধর্ম যুদ্ধ লালফামল পালকরিয়া থানা মনারাই যুদ্ধা মহাবীর।  
যেসাদে সাহস বিক্রম অভয় হাদি,  
সম্রাট মহাসম্রাট যেমন তোমার সৈন্য বীর সেনাপতি।  
জাতহান ঠারহান পালকরতে তোমার প্রতিজ্ঞা,  
তুমি পারেছ জগতে সমাজর অস্তিত্ব রক্ষা  
সমাজরে ইঙাল ঙালে করেছ ভাষাল প্রতিষ্ঠা।  
তোমার মহৎ মন পরম পুণ্য জীবন তুমি রচলাই জগতে,  
পালয়া ঙালয়া থানার ইতিহাস থইলাই নিজে ইকরে ইকরে।  
কি মহৎ হাদিল শহীদ অইলি সুদেষণ জাতরকা ভাষারকা জীবন দিয়া,



## ইমা লক্ষণা

তেইর লগে আকতা অগনিত জখম অইলা গুল্লি বিদ অয়া ।  
ঔ মৰ্মান্তিক দুঃখ জ্বালা যাতনা সহ্য করিয়া আছি,  
উসাদে ধন্য ধন্য জীবন কুঙ্গই রচিয়া থছি ।  
ঔ মহামানবতা কার জীবনে অর কার হৃদিরমা,  
অমর অক্ষয় কবিতা যারী উপন্যাস থার কারতা ঠারল রচিয়া ।  
তোমারে দেহিয়া ডরে আলইলা পিঠিয়েদে কত কত বিরোধী,  
আসাম মণিপুর বাংলাদেশ ব্রহ্মদেশ হাব্বিয়ে  
হারপেইলা দেখলা তোমার বীরত্ব কতি ।  
তোমার লগে কত কত বীর বীরাঙ্গনা বুজন কনাক মুনি বেয়াপা,  
সহাই করলা সাহস পাঞ্চাল দিলা পরম বিরোধী না গনিয়া ।  
তুমিয়ে জিঙে মহৎ বীর জ্ঞানী হাব্বিয়ে হারপেয়া মাতলা,  
মনেইলাই হৃদা সমাজরে খৌরাংল পালকরিয়া থনারকা ।  
ধন্য ধন্য ধন্য বিষ্ণুপ্রিয়া মণিপুরী ছাত্র গেয়া গেয়া  
অছে জয়র এলা দিনরাতি,  
ধন্য ধন্য মুনি বেয়াপা সহযোগীতাল জাতহান পালকরলাই তুমি ।  
উতাই অন্যায়রে নাকরতারা নিন্দা করতারা  
নাকরতারা অন্যায় কারীর অধর্ম বিরোধী আচরণ,  
কতি মহৎ জ্ঞানী ঙাল তানুর হৃদি মন ।  
জাতহানরে মহৎ আদর্শত থনা মনেইতারা,  
আদর্শহীন বিশ্বাস ঘাতকতা পাপ কর্ম তানু অন্যায় বুলতারা ।  
পাপ কর্ম করে উগ হিনচাপা পাপীগ তানু রামায়ণ মহাভারতে ছনেছি,  
ঈশ্বর ধ্বংস করেছে যুগে যুগে উতারে হারপেয়া অজ্ঞান মহাপাপী ।  
হে মহাভারত রামায়ণ প্রিয় পুণ্যবান বীর তুমি ধন্য পুণ্য কর্মরমা,  
ঈশ্বর সারথি-অর পুণ্যবানরকা জনম জনমরমা ।  
পুণ্যবানরে পুণ্য দেব বর দেব পালকরের,  
পাপীরে পাপকর্ম দিয়া পাপরমা বিনাশ করে ।  
হে পুণ্যবান রচ সাহিত্য ইতিহাস হাজার হাজার লেরিক পুণ্য কথাল,  
থয়া যেইগা খ্যাতি জগতে পুণ্য কর্মরমা হারপেয় উতারে ঈশ্বর বানাপারগ ।  
ধন্য ধন্য ধন্য তুমি ছাত্র,  
তুমি জাতহানর বংশ ।  
ইতিহাস থাইতয় তোমার গুণর কীর্তিল ।



## ইমা লক্ষণা

### কুরিয়া

কুরিয়া উগর জাং না অরর, অরে না পারা দের,  
বাবু সায়া নাটক করিয়া পথেদে বুলের।  
লেউ আকজার মকছি আকজার রুয়ানা না মনার,  
বুলে বুলে পররতা খেইতে ও সুপ লাজ নাপার।  
লেরিক তামকরিয়া বিদ্বান অনা আটলে না মনেইল,  
খানিপারা তামকরিয়া কুঙ্গ অইতারা পণ্ডিতগ।  
কথা আহান মাতলে দশহান উত্তর দিতয় উরেয়া,  
কিসাদে জীবন চলতয় না খালকরের উতা।  
ঘরে ঘরে গিয়া বহের খার, হুকানা যারি দের লাহলে,  
হাবির কথাত হমেয়া উত্তর দের কত রঙে।  
হাবির বিচার দলাদলির কথা টটরেয়া দিন কাটার,  
টটরেইল সটন দিয়া কাম না করিয়া থানা মনার।  
কুরিয়ারতা মন্ত্র নেই প্রতিকাররতা,  
উপাস থায়া দিন কাটার মুড়িগুলি চাবিয়া।  
মানুর ঘরে ভাত থানা লাজ নাপার তা,  
নিজর আতর কামাইর হুয়াতহান হারনাপার আটলে আকয়া।  
কুরিয়ার জীবন নিজকর্মা।

- ০ -

### বসন্তকাল

হয় ঋতুর শেষ ঋতুহান বসন্তকালহান,  
জার নেই গরম নেই নিয়াম হারৌর সময়হান।  
বিয়ানত কোকিল আয়া গাছে গাছে রকতারা,  
নুংশি নুংশি ফুল সাতর উবাকা।  
গুবাটি কেতকী কাপকলেই উরুলেই নাগেশ্বর হাবির সাতর,  
ক্ষেতির ধান বাসমিয়ার কিস্তারউ অভাব নেয়র।  
দুঃখর নিধান নেয়র উবাকা,  
হৌপাত ডাইল খই হাবিতা বেমলবেঠা,





## ইমা লক্ষণা

উহানল হারৌর বসন্ত বুলতারা।  
মহাপ্রভু জরমো হারৌর রংখেলা,  
শত্রুমিত্র নেই হাবি হারৌত মিলতারা।  
ভক্তির রাস কীর্তন উৎসব হাবি উবাকা করতারা,  
শুভদিন নিঙে বিয়া মহৎ কাম ফাঙ্কুনে করতারা।  
মানু পাহিয়া পলি জীব হাবি থাইতারা হারৌয়ে,  
বরন ডাহের চাতক বসন্ত লয়ইতে।  
তকপাই রহিয়া রাতি সুখ না দুঃখ মাস্তারা,  
উহানল বসন্তকাল গেলেগা হারৌ নেয়র বুলতারা।

- ০ -

## রাহালর লগে কৃষ্ণ

কানাই কানাই কানাই গুরু রাহিকগা আই,  
বেলি কাইল, গুরু রাহাত যেইকগা, তোর ইমারাং ল বিদাই।  
গুরু রকতারা কলে হাসা হাসা বুলে বুলে,  
তি এব বয়া আসত ইমা নন্দরানির উরে।  
আমার ইমা গাছিতে গুরুল যেইগা বুলতারা,  
তোরতাতে নিক্কা নিক্কা লাগের বিদাই লনা।  
তি নাইলে গুরু রাহাত যানা নার আমারতা,  
তোর লগে থায়া আমি হারৌ অয়ারতা।  
তিতে হিঙ্গাপা মারর ডর নাপার আকগরে,  
নই লক্ষ গুরু রাহিয়ার তোর বাশীর রৌওয়ে।  
সাল লাগা রাহাল বেশ, খা সেংকম ননী,  
তোর ইমার কতি বানা হারপা নীলমনি।  
আকগ আদরর পুতক তোরে উরে লয়া থাইরি,  
তোরে লয়া চুমা দিয়া কতি হারৌ অইরি।  
কানাই অইলগা সাল যেইকগা আই আই আই,  
খেলা খেলা হারৌত গুরু রাখতাঙায়।

- ০ -



## ইমা লক্ষণা

### আহকা সত্যর মূল পথে

প্রেম বানা আদর নিং  
হমাক ঘরে ঘরে হাবির হৃদয়ে বৌহানে আনেদিয়া,  
হাবিরে সুখ শান্তি দিয়া হারৌত থদক,  
হিংসা নিন্দা দলাদলী বেলেয়া এক অয়া থাইবাতা।  
সত্য উহানাত থায়া অসত্য উতা পাছরিয়া বেলবাতা,  
অসত্যল ডেউটি হংকরিয়া ঘর জ্বি নাদবাতা  
সত্য উহান এ জনম পরজনম জনম জনমর পথগ,  
হিঙ্গাপাই উহান হারনাপেইতে  
যুগ যুগ কাটেইলা অন্যায়েল।  
সত্য ত্রেতা দ্বাপর গেলগা এহান কলিযুগ,  
পাপ করলে পাপর ফলল জিরজীবন পেইতারো দুঃখ ভোগ।  
জ্ঞানর গীতা ভাগবত মহাভারত  
রামায়ন চৈতন্য চরিতামৃতত আছে এ কথা,  
পাকরিয়া হারপেইতারো জ্ঞানী মহান,  
জ্ঞানীয়ে উহানল ভুল অন্যায়েত না চলতারো।  
হাবি উৎসব পর্বত পাকরতারো ধর্মগ্রন্থ জ্ঞান পানার সালে,  
কত বৈষ্ণব ভক্ত হনতারো মুনি বেয়াপা যানারকা পুণ্যর পথে।  
হে ভগবান হাবিরে নিয়াদেগা সৎ পথ দেহাদে,  
ভুল পথেন্তু আলথক আহকা যেতা গেছিগা,  
আহকা মহৎ জ্ঞানর সত্যর মাজে।  
পাপ অন্যায়ে ব্যাধি জগতে আর নেয়ইবতা,  
হাবিয়ে সত্যর সত্য যুগে পুণ্যত থাইবাতা।

- ০ -

### ইমা সরস্বতী

ইমা সরস্বতী বিদ্যাদায়িনী হাবি জ্ঞানীর ইমা,  
কৃপা করিয়া দে জ্ঞান, বিদ্যা, লদে, লদে ইমা হমা।  
পৃথিবীও ইমা, লক্ষীও ইমা, দুর্গা, গঙ্গা ও ইমা,  
বিদ্যারকা ইমা তি সরস্বতী,



## ইমা লক্ষণা

তি জ্ঞান নাতে আকগৌ নাইতারা বিদ্বান গুণী জ্ঞানী ।  
ছাত্রই পূজা করতারা তোরে বসরে বসরে স্কুলে স্কুলে,  
ভক্তই পূজা করতারা ভক্তিত নিংশিং অয়া অন্তরে,  
সঙ্গীত, সেতার, যন্ত্র, বাশী, হাবির তি বিদ্যা দায়িনী,  
জগতর শিক্ষিত তোর কৃপায় অইতারা হাবির হমা ল তি ।  
ইঙাল ঙাল দলা পূর্ণিমা মেরাক কতি তি হবা,  
দলা বসনে বউরী তি দলা বাহনে সেতার ধরিয়া ।  
লদে লদে ইমা হমা, ক্ষমা করিছ ইমা ভুল যদি অর মোরতা,  
কতি হারৌত লউরী কনাক ছাত্রই পূজা দিতারা উবাকা ।  
মোরেও উসাদে কনাকগ নিঙে মোর ভক্তি লদে ।  
বানাপেয়া মোরে জ্ঞান গুন দে,  
হমাদেউরী ইমা তোর চরণে ।

- ০ -

## পাহিয়াই সময় চিনতারা

কওয়াই রকলে হারপেইছ বিয়ান ফুওইলহান,  
কোকিল রকলে হারপেইছ বসন্ত আহিলহান ।  
নংকুপি রকলে নিংকরিছ সইনেই বরন দিতয়,  
দিন গুজুরিয়া হাকহান মেঘলাই গুরতয় ।  
জ্বির পেপুরা নুকুলেতে বরন ডিল নাইতয়হান,  
এতা হাবির আহিত দেহা লগে লগে প্রমান ।  
লাংটিয়া সেকপি ঘরর গজে বইলে অমঙ্গল বুলতারা,  
ময়না তেনুয়া ঘরে পাললে কৃষ্ণ কথা টটরতারা ।  
ফেউ আলিয়ে রকলে হারপেইছ বাঘগ আহেরহান,  
অসময়ে কওয়াই নিয়াম রকলে হারপেইছ  
পৌ পেইতেয় কিহান আহান ।  
চেরৌয়ে রকতারা প্রহর প্রহর রাতি,  
কতি হারপেইতারা প্রহর প্রহর সময়র রীতি ।  
শুকসারী নেই এপেয় রকতারা বৃন্দবনে,  
রাধা-কৃষ্ণ নাম গেয়া থাইতারা আনন্দে ।

- ০ -



গুনে জিঙে

রাতাছড়া, বুতুছড়া, দেউছড়া  
নাং এতা কোন্‌তাই থছিতা,  
গাঙর নাংতে নাও আছে  
এতা হাবি ছড়া।  
বুনা বুলা চেপালা খইতং এতা  
কি নাং বুলিয়া থছি,  
কৃষ্ণ জগবন্ধু গৌরঙ্গ গোবিন্দ নাং থয়া  
ঈশ্বর আকগউ নাছি।  
বিদ্যা হুনা রূপা নুঙেইপা নাং থয়া  
কুংগউ নুঙেই অনাউ নেই,  
ইমা বাবাই এতা নাং থয়া কিহানাত  
হারৌ অছি চেই।  
বারমুনি, বারপুয়া গাং বুলতারা  
মানু থাছি নিয়ামপারা,  
দুধপুরে সেংকম নেই, খালি দুধপাতিল  
কিসাদে আছেতা।  
খালপার, বিলপার - পার অইলেও  
পানি অইলে বুরের,  
কৃষ্ণপুর ধর্ম‌নগর বুললেউ বৃন্দাবন অনা নুয়ারের।  
নাঙে বিদ্যাই গুনে আকতা অইলে  
মানুয়ে সলকরতারা,  
চরিত বেবার হবা অইলে, দেশর উন্নতি অইলে  
মানু হারৌ অইতারা।  
ডঃ কালিপ্রসাদ, সেনারিক, অমর, নগেন্দ্র,  
বিপিন, মতিলাল, বুললে মানুয়ে উঙাইতারা,  
নাঙেত্তউ নিয়াম গুনে জিঙে  
এতা দৌ বুলতারা।





## ইমা লক্ষণা

### বেকার

দেশ জুরিয়া চিকারী, হাহাকার, বুজে বুজে বেকার,  
রোজগারর উপায় নেই, কত শিক্ষিতই নিরুপায়।  
হাজার হাজার লক্ষ কোটি কোটি শিক্ষিত  
নুকুলতারা স্কুল কলেজ ইউনিবাসিটিত তামকরিয়া,  
ডাক্তার, ইঞ্জিনিয়ার, শিক্ষিত বাদনেই হাবিয়ে উপায় খালকরতারা।  
লেইরা বরা বাদনেই হাবির অগতি,  
কোংগই খালকরতয় এহানর উপায়র গতি।  
দিন দিন ঠয়ইতারা কমনি নেই,  
ধন আলাই রাজনীতি করতারা,  
মন্ত্রী এম,এল,এ, এম.পি অইতারা।  
লেইরাপাই লেইরা অইতারা দিনেদিনে,  
বাটিয়া লয়ইল ক্ষেতির বি মাটি চারিবেদে।  
মানু জঙ্গল টেঙারা বুজলা, মানুর প্রভাবে আর জীব নেয়ইলা,  
তেব না খালকরতারা কিহান অইতয় দেশরমা।  
শিক্ষার মূল্য কমইল, বেকার শিক্ষিতর ইজ্জৎ নেই,  
ইমা বাবা বেইবুনি পালিল ক্ষেমতা নেই।  
কোনগউ সুখী হারৌ অ নুয়ারতারা,  
খালকরিয়া পাগল, অকাল মরন চিন্তা।  
লয়ইতে দুঃখ গিয়া কোনদিন সুখ আয়া উবা অইতয়,  
দুঃখর সমুদ্রর ডেউ পার বাগিয়া একাকার করতয়।  
উপেয় হারনেই কি দশা অইতয়,  
দুঃখর অবক্ষয় অকরলে কুঙগই রক্ষা করতয়।  
ব্যবসা ব্যবসা বুলিয়া হাবিয়উ ব্যবসা করানি মনেইতারা,  
কুঙগই লইতয়, হাবিয়উ মনেইলে ব্যবসা।  
কততাই কারবার বুলিয়া আছে ধন হারেইলা,  
কততাই নাপেইতারা ব্যবসা অকরিল রূপা।  
দুঃখই, ভগবান কিতা কররতা বুলিয়া বিলাপ করতারা,  
হাহাকার দুঃখ হাবির হাদিত, কোনগউ নেই সুখ শান্তিরমা।



## ইমা লক্ষণা

### দুনিয়া

কতি হবা দুনিয়া, কতি হবা দৃশ্য, সমুদ্র গাট বন টেঙারা,  
কতি হবা সৃষ্টির হাকহান গ্রহ নক্ষত্র বেলি জুনাক তেরা।  
কত মানু কত জীব পক টেঙারা থল পানি গাছ বুজে,  
কই জাতে কইগ লেহা নেই — এমাটিক নিয়াম অপরিসীম জগতে।  
চেইতে চেয়া লইনার, পেইতে পেয়া লইনার,  
অগাদ অপরিসীম জন্তু জীব জলে থলে টেঙারাত লেহানি সম্ভব নার।  
কিসাদে হঙসে কুংগই হংকরেছে এতা হাবি,  
নক্ষত্র গ্রহ উপগ্রহ এমাটিক হবা মাটি নদী উপনদী।  
আহি নাক কান প্রাণ আছে হাবিরতা,  
চেইতে দুগই তিল নেই তঙাল তঙাল রূপ হাবিরতা।  
হবা অপরূপ সৃষ্টি অপরূপ হবা,  
কিয়া সৃষ্টি আছে হারনেই, কিয়া কারকা।  
বৌ দের, বরন দের, সাগর সমুদ্র বুজে,  
খং বিল টেঙারা নদী আওর হাবিতা সুওছে।  
জীবে আছি কতি হুরু হুরু জীব গাছলতা দেহানি লেহানি সম্ভব নার,  
কি অপরূপ সংসার অপরূপ সৃষ্টি হাবি হারপানি সাধ্য কার।  
হাবিয়ে পরিচয় পানা জানা জানি অনা প্রেম থনা কুংগউ নুয়ারতারা,  
সাধ্য নার হাবির দেহা পানা কি অপরূপ প্রভুর সৃষ্টির এ দুনিয়া,  
তা নায়া কুঙগউ হারপা নুয়ারতারা।  
হারপেইতারা সৃষ্টি তত্ত্ব অপার অপরিসীম হুদা মানুয়ে,  
আর হারপেইল জ্ঞান নেই সৃষ্টির জীবর মাজে।  
কইগ নিক্কা মরতারা কইগ জরম অইতারা,  
কইগ থাইতারা জীব, কুঙগউ নুয়ারতারা মাতানি,  
কারৌ সাধ্য নার এ হিসাব মাতানি উহানেই আচানক সৃষ্টি।  
উহানল আচানক দুনিয়া।

- ০ -




## দেশে শান্তি নাইল


বিদ্বান গুণী বুজে বেকার চাকুরী নেই দেশে,  
সরকারে দেশ চলা নুয়ারের ভোট দেনা লাঞ্ছলে।  
হারৌ মনেয়া আন্দোলন করিয়া দেশ স্বাধীন করলা,  
পৃথিবীত দুঃখী নিয়াম ভারতে ইচ্ছা বসরে ও দেশর কিহান অইলতা।  
বনে, সাগরর পারে, টেঙারা, গাঙে, দুঃখী উপাস মরতারা কংকেই,  
জুরে জুরে কান্তারা নিক্কা দেহিল আকগৌ নেই।  
দুঃখী উতার উন্নতি নেই হমেইতারা তলেদে,  
আকতাই চালাক চতুর ঠক ঠকামিয়ে চলতারা সংধর্ম নেই বিচারে।  
লুটে লুটে হরিলুট দিনরাতি,  
এম.এল.এ মন্ত্রীর আতে রূপা সুযোগ আছে কতি।  
জজকোটে ঠিক বিচার নার,  
কতি দেশর দুগতি।  
যুগে যুগে হীধগপা মরিয়াও লইনাছি পারা,  
শান্তিরদেশ কুঙ্গই হংকরতয়তা,  
দেশর হাবিষয়ে না চেতইতে এতা হাবিষ অরতা।

- ০ -





লেখক - নরেন্দ্ৰ চন্দ্ৰ সিংহ  
সিঙ্গারী শিলচৰ - ৭



নয়নমনি সিংহ (উত্তরাধিকারী)

### মোর ইকরা লেরিক প্রকাশ আছেতা - দশহান

- ১। আরতি - (এলার কবিতার লেরিকহান) - (হাবি জাতর এলা)
- ২। বনমালা - (এলার কবিতার লেরিকহান)।
- ৩। বিষ্ণুপ্রিয়া মণিপুরী ঠারর এলা - (এলার কবিতার লেরিকহান)।
- ৪। বিষ্ণুপ্রিয়া মণিপুরীর জাতীয় বৈশিষ্ট - (বিঃ মঃ সমাজর কথা)।
- ৫। শ্রীকৃষ্ণর যত নাং - শ্রীকৃষ্ণর শতনাম।
- ৬। হাকর ঙাল তেরা - (এলার কবিতার লেরিকহান)।  
(পচিশ জাতর ৩০১০ হান এলা)।
- ৭। কর্মর বিধান - (পূজা ও শ্রাদ্ধ কর্মর লেরিকহান)।
- ৮। আমার নিজর জাতীয় কৃষ্টি - (বিঃ মঃ সমাজর কৃষ্টি)।
- ৯। মহৎ জ্ঞান তত্ত্ব - (নীতিজ্ঞান ভক্তির লেরিকহান)।
- ১০। ইমা লক্ষণা - (হাবি ভাবর কবিতা)।

### শাপা নাছেতা পাচহান

- ১১। মণিপুরেস্ত হস্তিনা পেয়া (হুৰু যারী) - (কতহান যারী)।
- ১২। বিষ্ণুপ্রিয়া মণিপুরী ছাত্র সংস্থার ভাষা আন্দোলন
- ১৩। এলার অমৃত ভাণ্ডার (হাবি জাতর এলা) - (৪০০০ হাজার এলা)।
- ১৪। উপন্যাস - (কতহান উপন্যাস)।
- ১৫। মণিপুরর কথা

### মোর লেখারকা সমাজে Award দেছিতা

- ১৯৭৩ ইং - কবিতাত - প্রথম পুরস্কার - ২০০৪ ইং - লেরিকে - শ্রেষ্ঠ লেখক  
২০০৭ ইং - লেরিকে - শ্রেষ্ঠ লেখক সংবর্দ্ধনা দিলা কালীঞ্জরে শহীদ দিবস  
২০০৮ ইং - লেরিকে - সাহিত্য রত্ন।



## নিখিল বিষ্ণুপ্ৰিয়া মণিপুৰী ছাত্ৰ সংস্থাৰ আন্দোলন কৰলা ৮বসৰে (১৯৮৯-১৯৯৮) পেয়া

২৪হান আন্দোলন ২৪ ঘণ্টাত ১০০১ ঘণ্টা পেয়া

৫০১ ঘণ্টা রেল বন্ধ আন্দোলনে প্ৰতাপগৱৰ বিলবাড়ীত ১৬ই মাৰ্চ ১৯৯৬ ইংত পুলিছৰ গুলীত শহীদ অইলি সুদেষ্ণা সিংহ, কচুবাড়ী বাৰো জখম অইলাতা - শ্ৰীমতি প্ৰমোদিনী সিংহ, কচুবাড়ী, দীপঙ্কৰ সিংহ, যামিৰ আলা, বিকাশ সিংহ, গোকিলা, অৰুন সিংহ, চন্দ্ৰকান্ত সিংহ, প্ৰতাপ সিংহ, ৰত্না সিংহ, নমিতা সিংহ, শ্যামল সিংহ, বিলবাড়ী, পাথারকান্দি, কৰিমগঞ্জ, আসাম। আসাম সরকারে হাবিৰ দাবী পূৰণ কৰতৌ বুলেছে ০৬.০১.২০০৫ ইংৰেজীত মাইনুটছে। ধন্যবাদ আসাম সরকার।

বিষ্ণুপ্ৰিয়া মণিপুৰী ১৪৯গ পাঠশালা স্কুলে আসাম সরকারে চালাদিলতা জানুৱাৰী ২০০১ ইংৰেজীত বৰাক ভেলীত।

আন্দোলন পৰিচালনা কৰলাতা - অনিলকৃষ্ণ ৰাজকুমাৰ, সভাপতি বাকি সহযোগী সুবল সিংহ, বাচ্চু সিংহ, পুৰ্ণেন্দু সিংহ, সমীৰ সিংহ, তম্বকসেনা সিংহ, ৰীতা সিংহ, মঙ্গল সিংহ, সূৰ্য্যকান্ত সিংহ, হীৰেন্দ্ৰ সিংহ, গোপীনাথ সিংহ, নেঙ্গ সিংহ, নিৰ্মল সিংহ, গোপীদাস সিংহ, সূৰচন্দ্ৰ সিংহ, বীনা ৰাজকুমাৰী, সুচিত্ৰা সিংহ, সমৰেন্দ্ৰ সিংহ, তম্বকসেনা সিংহ লগে আৱতা।



অনিলকৃষ্ণ ৰাজকুমাৰ

সভাপতি

বিষ্ণুপ্ৰিয়া মণিপুৰী ছাত্ৰ সংস্থা  
কালীঞ্জৰ, শিলচৰ - ৭, কাছাড়, আসাম

এ ইতিহাস থাগেলগা।

জয় জয় বিষ্ণুপ্ৰিয়া মণিপুৰী ভাষাৰ জয়